


CIKONDO CYÀ ÈKÈLEEZIYÀ

WA LAÒDÌKIYÀ

 Mpindyewu, kàvwa mujikije aci to. Mème kwamba ne: “Mvwa mufike pashiishe bwà dibàkà dyànyì... Ngààkalediibwa pashiishe ndambù, mufike pashiishe ndambù bwà dibàkà dyànyì, bu mèmè mwà kufikaku ànu pashiishe bwà lufù lwànyì’s!” Ki dibà dimwèpelè dīndi njinga bulelèlè kufika pashiishe, pashiishe menemene.

² To, bìvwa mmabiikila à ku nshinga kwànyì kumbèlu, ncìvwa ne mùshindù wà kuumuka to, bìvwa bikolè. Nènkù dībà adi paanyimà pàà mukàjàànyì ne bwònsò bamanè kuumuka kumpàla kwà dībà, mvwa ne bintu byàbùngì byà dyenza. Nènkù pashiishe bantu bàà mu myaba mishìilèshìilàngàne, bàà kusambidila, ne ndi mfùma ku dibwela ànu mpindyewu; ne dibuulula dyà kùdi Mukalenge kulwa bwà mwanèètù wa balùme kampànda; kùdi mwanèètù wa bakàjì mwimane lwà paanyimà pààpa, ùsaama; nudi bamanyè cīndi nswa kwamba aci, ndi ànu ntwa eku, ntwa kwàka, ntwa eku, ntwa kwàka. Ne ncyènà nànsha mupete mpùngà wa kulabulangana ku cyanza ne bàmwè bàà ku balunda bàànyì bàà ku Georgie bàdi mwab’ewu to ne bàà mu myaba mishìilàngàne ku nseke yònsò, ne bàà ku Canada kwaka. Ndi ànu mudyumvwe bibì bitàmbe bwà mùndi ncìyi mupete mwà kunùlabula ku byanza.

³ Nènkù, nànsha nànkù, Fred ùdi penyì dilòòlò edi, Fred Sothmann? Fred, udi muvùlùke cikondo ciwàkambiikidila ku Canada aci, uvwa ukeba kupweka kuneeku, ki mèmè kukwambila ne kulù dyà mashinyi to anyi? Wèwè kulwa, ànu’s; kupetakanaye ne njiwu, mwamba . . . kusùnsula kashinyi kèndè, kwambabi kushipeesha mukàjèndè, ne dīkù dyèndè, kutapikaye dyulu dyèndè, ne kushàalabo bwònsò mu lùpitaadi.

⁴ Mu katanci emu pàmvwà nguumuka, ànu mu nkànkala emu, Mwanèètù Ben ewu ùvwa mwimàne pambèlù pààpa, kulwayè mutàngile kùndi. Ki Rosella kulwayè mwaba awu, kwambayè ne: “Nkàadi nya kumbèlu.”

Mèmè kwamba ne: “Rosella!”

Yèyè kwamba ne: “Kùdi bwalu anyì, Mwanèètù Branham?”

Mèmè ne: “Ncyènà mudyumvwe ànu bìmpè bwà diya dyèbè adi.” Nwamònu anyi?

Yèyè kwamba ne: “Kùdi bwalu bwàngenzekelà anyi?”

Mèmè kwamba ne: “Ncyèna mumanye to. Bìdi bimwèka bu ne, Cintu kampànda ncindimwije.”

⁵ Mmumbiikile kwenji tusunsa tukesè, ne mmupetakane ne njiwu. Nàнку awu, muntu nànsha umwe kí mmujúke to, kàdi cìvwà ncyanza cyà Mukalenge. Nènku mmufinùnùke (Njila yònsò ùdi ne mabwe à nêjè mu Nord mwàmwa.) nènku mmufinùnùkile lwà mu Indianapolis, kàdi kutwadija kufinunuka wàtwa eku ne eku kwà njila mu lubilu lwà njààjàmà mùshindù ewu. Ki kwelayè lubilà lukolè ne: “Éyi Mukalenge, nkwàcishèku!” Kàshinyi kutwà ncintà kusenunuka mùshindù ewu cyàkàbìdì, kwalukila ne kuyaku ku dyàbalume, ne kutwadija kuya ànu bîmpè. Kubàndàye ne njila awu, kwambayè ne: “Ekèlekèle, ekèlekèle, mùshindù mwinè wùndi ne kusàkidila bwà mùndi mupàndùke ku cyòci aci, bwalu màshinyi makwàbò àvwa alwila ànu luseke lùmwèlùmwè alu, munzùlùle mbilu yà dikèma.” Ki kusambukaye njila, ne pashìishe kwimanayè kuntwaku. . . Ngèèla meeji, cintu kampànda, kwimanayè bwà kunwàku dikopo dyèndè dyà káfè anyi cintu kampànda. Kàdi ànu kàyi mwanji kupatuka mu kàshinyi amu, kakwàbò kàshinyi kudibyanukulaku ànu lwà paanyimà pèndè apu, kakwàbò kàshinyi paanyimà pèndè apu, kakwàbò kàbìdì ànu paanyimà apu, nènku kudikùngwijatu twònsò mwaba awu. Kàdi kwambayè ne ùvwa munyùkùshìibwe ndambù, kàdi kí mbyà bibi to, kàdi ùvwa muswè kusàkidila Mukalenge, ne kubìikila bwà kwambila èkèleeziyà bwà kusàkidila Mukalenge bwà mùvwàye kàyi mujiwuke anyi ní ncinyi ní ncinyi, ne ùlomba èkèleeziyà bwà kutùngunuka ne kumusambidila bwà wàmòna mwà kufika kumbèlu. Nwamònu’s, ùcidi mwendeshi mupyamùpyà, ngùcìpetelaku mukàndà wèndè wà bwendeshi. Pa nàнку, ndi ne kusàkidila kuvulè be.

⁶ Kàdi bitu misangu yònsò ànu ne dikwàcisha bwà kwangata didimwija dyà Mukalenge adi ne mushinga. Yèyè ne: “Èè,” yèyè ne, “S’ndi mufwànyine kupangila ditùkù dyà mudimu.” Ditùkù dyà mudimu ki cinyi’s? Bìdì bimutùùdishà mfranga mipite bwà kulongolweshà paanyimà pàà kàshinyi apu, nwamònu’s. Nàнку mbitàmbe bwîmpè bwà—bwà kukuwwija. . . kushààla ne Mukalenge. Kì mmwòmò anyi? Yèyè mutwambile ní ncinyi ní ncinyi cyònsò, mbîmpè twètù kushààla naaCì. Bwalu Yèyè ùtu misangu yònsò ànu mubinge. Kì mmwòmò anyi? Misangu yònsò!

⁷ Mpindyewu, kaa, eci ncyenze ànu bu. . . cìvwà lumingu lulenga lwà dikèma. Ncyèna ànu mumanyè mùshindù wà kwambila Nzambi ne kunwàmbila bwà lumingu lulenga lwà dikèma elu to. Aa àvwa àmwè à ku matùkù mwandamukùlù à disànkà ditàmbe ànkaadiku muyiishe kacya bandela. Mbulelèlè. Ndi—ndi muyiile bikolè be kùdi Mukalenge ne luse Lwèndè lujaalàme, ne byònsò bìdiYe mutwènzèle abi, bwà kumòna Nyumà Wèndè ùkwàtulula mudimu mu èkèleeziyà. Nènku ndi ne disànkà dyàbùngì dyà kumòna mapà àbanga kukwàta mudimu mu èkèleeziyà. Nwamònu anyi?

⁸ Mpindyewu, pàdiwumù apu, pàndi nciiyipù, mbyenze ànu bu

ne muntu kampànda neálwe kubwelamù, wíkale ànu—ànu mwà kuànyangakaja, nudi bamanyè's, mbafwànyine kubanga kwenza ní ncinyi ní ncinyi. Kàdi nwènù bafwìshe mapà awu bundù, Nzambì neànùfwìshe bundù. Nwamònu anyi? Ncyà bushùwà. Bikèngela nùkwatè naawù mudimu mu mùshindù mujaalàme. Nènku, mùshindù utùdi baàswè mpàdìwù ànu àkwàta mudimu mu bulongame, mùshindù udibò bààkula mu myakulu. Kí ng' ànu kwambulula Mufundu to, kàdi nkwamba bwalu kampànda bùdi bwamba kwenzeka. Nènku nwènù mwà kutùngunuka ne kwikala ne kaneemu kàà menemene naawù, neàtwàdije. . . Muntu yèyè mupàtùke mu bulongame mu èkèleeziyà, Nyumà Mwímpè neàcyèle patòòke kubàmbila ne n'nganyi awu. Nènku dībà adi, neà—neàdymvwe munyookiibwe ne kuyaye ku cyoshelu. Ki mudimu wà mapà ngwòwò awu.

⁹ Nènku pa kumòna mpaasàtà wetù ewu, Mwanèètù Neville, ùvwa nsongààlùme wa bundù, uvwa kàyì muswè kuumvwika to. Kàdi ndi nwambila, yèyè ùvwa. . . ùvwa ùmweka bu ne kàvwakù mwà kukwata ku byà Mpenta to. Kàdi pa kumòna ujuuka ne wandamuna myakulu ne wamba ciprófetà, ndi nnwàmbila ne, yèyè mmwèle cidya cile citàmbe. Cyà bushùwà. Tùsambidilàayi mpaasàtà wetù.

¹⁰ Nènku, nwamònu's, mapà mmabangè kubwela mu èkèleeziyà. Ne mukwàbò mwanèètù mukesè, mupwekele mwab'ewu, ùdi kaaba aka, ùdi. . . ùdi ne cyà kwikala kaaba aka mwaba kampànda. Ngèèla meeji ne ùdipù, ùtupu ànu misangu yònsò. Mmwabilaayi mukesè mupwekele wa dikèma, ùtu pa ciibidilu umwe wa ku balubuludi kaaba aka mu èkèleeziyà emu, Mwanèètù Higginbotham, muntu wa mushinga mukolè, wa difwàna dyà Nzambì. Ne pa kumòna ne mmupete dipà dyà dyakula dyà mu myakulu, nganyi uvwakù mufwànyine kwela meeji ne Mwanèètù Higginbotham mmufwànyine kwenza nànkù? Muntu mukesè mwena bundù, wa mùshindù wà kàyì muswè kudileeja to, kàvwa muswè nànsha bàmmumanye, mu mwaba nànsha ùmwe to, usòmbela ànu paanyimà pààpa. Kàdi, nwamònu's, Nzambì ùdi mwà kwangata muntu wa mùshindù awu ne kukwàta nendè mudimu, nwamònu's, bwalu yèyè kèna muswè kucyènza to, dyàmbedi. Yèyè muswè kucyènza, mmufwànyine kushààla mwena madìleeji. Kàdi pàdiye mu mwaba wà kàyì muswè kucyènza to, pàmwàpa Nzambì ùdi mwà kukwàta nendè mudimu mùshindù awu.

¹¹ Junie ùdi kaaba aka, ùdi. . . kaa, ùdi paanyimà pàà dikunji didi dìnjike edi.

¹² Ndi ngàmba nùnkù, nkààdikù mumvùmvwe bantu bààbùngì bààkula mu myakulu. Ne ndi ngèèla meeji ne byònsò mbifùmìne kùdi Nzambì, bwalu kwena mwà kwenza cyònà cìdì kaciyì cyumvwija cintu kampànda bwà muntu kampànda, mu mwaba kampànda nànsha. Nudi bamanyè's, Bible ùdi wamba ne: “Kakwèna cyònà cìdì kaciyì ne dyumvwija to,” mbwena kwamba

ne kakwèna cyônà cidi kaciyi cyumvwijaku cintu kampànda to. Kwèna mwà kupàtula mwàkù ní ngwà mùshindù kaayi ùdi kawùyi umvwija cintu kampànda nànsha. Mvwa misangu yònsò ndikonka mùvwabi bifwànyine kwikala too ne pangààkaya mu Àfrikè ne kuumvwa mitooyi yònsò ayi, ki mèmè kujandula dîbà adi ne civwa ndíyi dyà muntu kampànda. Misangu mikwàbò ndíyi dyà mwanjèlò, ne bikwàbò.

¹³ Kàdi Junie Jackson, muyiishi wa ku musòkò wa kàyì muswè kudìleeja, ùdìciina, wa lumùmàmùmà ndambù mupàtùkile mu èkèleezià wa ba-Méthodiste, lwà kwinsì—kwinsì eku mu matongu à mu Elizabeth, mu Indiana, lwà paanyimà mu meetu amu. Mupùwe, kàyì mufwànyine kwambaku cintu to, mwenze bu udi udìciina, ùmwèka bu udi . . . mvwa mwà kumòna misangu mikwàbò, bu ne ndi muswe kumwangata, kumunyùkulaku, kwamba ne: “Aakulaku’s, Junie, nwamònu’s, lekèla kwikala ànu kacya washààla musòmbe mwaba awu mumbàngàmèene.”

¹⁴ Tuvwa mwà kusòmba pa cikuuku mu meetu amu, ne yèyè ùvwa mwà kusòmba mwaba awu kwamba ne: “Èè, . . . ngèèla meeji ne . . . bidi ànu bimpè’s.”

¹⁵ Mvwa mwà kwamba ne: “Kaa, Junie, ndi—ndi nguumvwa bu ne ‘undekèlè nkwambidìle bwalu ebu,’ nudi numòna’s. Bwànyì mèmè udi—udi ne lujòoko be, wamònu’s.” Kàdi Nzambi mmumupèèshe di—di—dipà dyà kwakula kwà mu myakulu; kacya ncitukù mwanji kumvwa ngààkwilù kampànda mutàmbe kutòoka tòò kacya bandela to. Nwamònu anyi?

¹⁶ Mutàngilaayi mu èkèleeziyà. Nwamònu mukàjì mukesè awu uvwa wakula mu dindà emu kàyì mumanyè mukàjì mukwàbò awu anyi? Wa bwalu ewu kàyì mumanyè mukwàbò awu to, ne ewu ewu, cyônà cyà díyi civwaye wàkwilamu aci; kàdi pààkandamunyiibwaci, mu cyônà cimwècimwè aci, maleetà majìkùke, bimanyinu byà mu difùndà; ànu bìmwèbìmwè, byàlukila. Ne mukenji wùvwa mupwàngàne, kùdì èkèleeziyà. Nwamònu mùdì aci anyi? Mpindyewu, tudi beena dibànza dyà kusàkidila Nzambi. Mpindyewu, kwikadi wàlwà kuditàmbisha to. Wèwè mwenze nàнку, neùdyele cibùlà, ne dyabùlù neàkutwè byanza. Ikàlà ànu mudipwekeshe; wamba ne: “Èyi Mukalenge, nsokokèku, kundekèdì njuuka kumpàla kwà dîbà nànsha.”

¹⁷ Kàadyàkukulekelaku ùpàtuka mu mulongo nànsha. Wèwè mupàtùkemù, misangu mikwàbò, aci kacya—aci kacya kwenza bwalu to. Wèwè mwenze nàнку, mòna’s, mpaasàtà ewu neà—neàkwambile. Nwamònu’s, ma—mapà kaèna ne cyà kukwàta mudimu paùdì . . . patùdì munkaci mwà kuyiisha to. Pa ciibidilu, mapà ówò mafikè ku dikwàta mudimu bimpè mu èkèleeziyà, nebikèngele bwà nudisangishe ntàntà mule kumpàla kwà disangisha dikwàbò; Mukalenge àkwate neenù mudimu kuntwaku, nudi numòna’s, bwalu dîbà adi mu eci citùpà kabàyàkucìpangisha to nànsha kakesè. Mpindyewu, patùcidi mu

disangisha apa, míngà misangu bikèngela nùshaale bapùwe bwà katançi kakesè. Kàdi piikalàbi ne Nzambì ùdi ne mukenji, mwaba kampànda anyì kasanga Yèyè neàwùtwalè, nwamònu's, Mulekèlaayi nkàâyendè, kàdi nucyenzè bilondèshile dilongesha dyà Bible. Nènku Mwanèètù Neville pàmwàpa neikale mwà kulongesha bintu ebi, bwà twàmòna mwà kubyènza. Nenteetè bwà kumwambulwisha ne mwànyì pàànyì mwònsò, twètù bwònsò pàmwè, bwà kubítwala ne kunùleeja mùshindù wà kukwàta naabi mudimu.

¹⁸ Udi udyumvwa bìmpè anyì, wèwè mwanèètù wa cyena Pologne? Mbìmpè. Kaa, mùshindù mwine ùvwà Mukalenge mumubènèshe's wè! Kukaadi bidimu mwandamukùlù, mwva mumwambile ne cintu kampànda civwa mwà kwenzeka. Ùvwà mupete cibwejàkàji, mwena dilongesha dyà búsàtù wa kàyì tuseku. Ki Mukalenge kwamba, ditùkù adi ne: “Nekùlwe muntu mulùme kampànda, ùdi ne nsukì mifiike ne mèsù makùnzùbile, munène wa katankù. Kumwipàci to, Mèmè ngudi umutùma kùdi aku.” Mèmè kubàkula Mufùndu ànu mwaba ùvwaye upetela cibwejàkàji awu, mèmè kuwùfùnda pa cipese cyà dibeji ne kuwùtèeka mwaba awu. Paanyimà pàà katançi ki yèyè ewu pwàa.

Mukàjàànyì kwambayè ne: “Kùdi muntu pambèlù ùkèba kukumòna.”

Mèmè ne: “Nyèyè, mubweje munu.”

¹⁹ Nènku yèyè—yèyè kungambila civwàbo bamwambile mu...mu busonsodi bwà Nyumà Mwìmpè. Mùshindù ùvwaye wítabuujà misangu yònsò ne mwele nzadi ku Mukenji, ne bikwàbò, munkaci mwà cisambà cyèndè; nànsha mwàkadyùdiibwaye, yèyè wàkashàala ànu naaWù. Kwambaye ne, kukaadi cikondo kampànda, mu masangisha, ngaakaakulangana nendè ne kumutèela mu dìnà. Ne mùshindù mene ungàakamba dìnà adi, ncyèna mumanye to. Kwambaye ne byàkakèngela bwà—bwà mèmè kuditèela dileeta ku dileeta, anyì cintu kampànda, mu disangisha amu. Yèyè ne ùvwà mwambule mwànà wa mu dibòko mu mabòkò èndè uvwa ne bijùjì kwìsù, ne kwambayè ne mwànà mukesè wa mu dibòko ewu wàkakezudiibwa yèyè yònsò, ànu mu kaabujimà. Ne mùvwà Mukalenge...

²⁰ Ki mèmè ne: “Èè, cintu cyùdi naaci dijinga mpindyewu ncyà kupweka ku èkèleeziyà kwaka bwà kubàtijiibwa mu Dìnà dyà Yesù Kilistò.”

²¹ Mwva mutuutàkèene nendè kwènji katançi ku lusongo lwà mukùnà kwaka, bwalu wàkapweka, wàkabàtijiibwa mu Dìnà dyà Yesù Kilistò. Mpindyewu mmusànkishiibwe mu byònsò, udyumvwa bìmpè, munkaci mwà kwalukila kumbèlu. Ndi ntèkemena ne neànkudimunku mu Pologne mwàmwa dimwè

dyà ku matùkù aa, ne mu Allemagne, ne mu, mwàmwa mu myaba ayi amu. Mukalenge àkubènèshè, mwanèètù wanyi.

²² Bintu binène bibanjike búngì cyanààna byenzenza Mukalenge wetù's wè! Ànu bwà kumòna luse Lwèndè—Lwèndè, mùshindù wùdi kuumukila ku esètè, ku wesètè, ku nord, ne ku sud, mùdiYe ùlombola bânà Bèndè bananga; badikwingija, bènda bàpàtuka, badìnyukusha. Byàbúngì be byà kwamba's!

²³ Mpindyewu, kanùpu mwoyi to, mu dyàlumingu dilwalwà dilòòlò, bu Mukalenge wetù mwà kwanyisha, dilòòlò dyà dyàlumingu dilwalwà edi, netwikale ne...mu dyàlumingu dilwalwà edi, èyowà's wè, disangisha dyà dyondopa. Cìndi ngambila cyôci aci, pàmwàpa díbà adi kwòkò kwikàle bààbúngì batàmbidile mu dindà dyà dyàlumingu amu nengàngate dyàlumingu dilòòlò bwà kujikija, nudi numòna's. Kàdi mèmè mwà kubangata bwònsò mu dyàlumingu mu dindà, èè, mbímpè.

²⁴ Mu diisàtù dilòòlò kùdi masangisha à milòmbò à munkaci mwà lumingu. Mpindyewu, bwènù nwènù bàdi pabwìpì pabwìpì aba, disangishaayi mwab'ewu, ne enzàayi masangisha à milòmbò. Kanùàpùmbishikù to, shààlaayi ànu naawù, nwamònu's. Nènku nusambile, nukebe mwà kutàmba kusemene pabwìpì ne Nzambì. Kanwitabiku bwà dikolesha dyà maalu kubweladi munkaci mwènù nànsha. Lamàayi... Kùdi bishùwashùwàlà byàbúngì be mu mùshindù wà katùyi ne cyà kwitaba cyà mashimi to, nwamònu's, kanù—kanùyiku ku luseke lubi to. Shààlaayi mu bulelèlà.

²⁵ Ngǔmvù “Amen” díbà adi ùntù mumvùmvwe pa ciibidilu kukaadi bidimu, wa Mwanèètù Russell Creech. Mbangambile ne Patty ke uvwa wakula mu myakulu lwà paanyimà pàpa dilòòlò adi. Patty, udi kwepi? Udi kaaba aka anyi, munanga wanyi? Èyo, ekèlekèle, ncyèna mufwànyine nànsha kumumanya to bu mèmè mumumòne's. Kàdi ngèèla meeji ne ngàakambula mwànà awu mu mabòkò àanyi emu ne kumulàmbula kùdi Mukalenge, mwab'ewu mene. “Kàdi's ukaadi mushikankunde,” Meda mmwambe ne: “nsongàakàji wa citende, mulenga kumòna, citendetende cyà cisàkuka,” mwikàle ne bukòlè bwà Nyumà Mwimpè pambidi pèndè, wàkula mu...Russell, wèwè's udi muntu mubanji. Èyowà's, ke cyùdi's.

²⁶ Mwanèètù wa bakàji Creech ùdi kwepi? Ncyèna mumumòne to. Ùdi kaaba aka anyi? Lwà paanyimà. Kaa, Mwanèètù wa bakàji Creech, mùshindù mwine ùndì ne disakidila bwà mùdi Nzambì mukupèeshe mwànà bu awu, mòna's, kwena mumanyè mùndì—mùndì ne kusàkidila to. Mu cikondo cidì nsongàakàji yà bitende munkaci mwà kukenyangana ku mènù ne kuseka ne kwenza maalu à lukutukutu, nudi bamanyè's, ne musumbà wa lukutukutu kùdi balùmyànà aba, bàdi ne nsukì mikosa bu milùndù yà mpaatu ne bikwàbò byònsò aba, mùshindù awu; kàdi

mwânà mukesè ewu ne bukolè bwà Nyumà Mwímpè, wàkula mu myakulu mwab'ewu. Kaa, ekèlekèle!

27 Hmm! Mbantu búngì kaayi dilòlò edi, bayiishi bàà beena Mpenta, bàdi bafwànyine kufila mwoyi wàbò mujimà bu bwòbò mwà kumòna wabo nsongàakàji wa citende, udi muye ku maja à bidundadùndà awu, wenza nànkù.

28 Mwanèètù, anji—nji citwekù mushinga. Ndi mumanyè cyùtù wenza kwàka ku Cibeeba aku, ntu mwenze cintu cimwècimwè aci, mukwàte mudimu bu wakufwilakù, kàdi, mwanèètù...bwà kukolesha bânà abo. Kàdi wàvùluka ne, Nzambì ngwa lulamatu, Ùdi ùfuta. Èyowà's, mmwòmò! "Nèmfutulè."

29 Nzambì àkubènèshè, Patty. Munanga wanyì, ncìvwa—ncìvwa mufwànyine kukumanya to bu mèmè mukumòne, ngèèla meeji, kàdi kùdìdingi walekela njila mululàme awu to, munanga wanyì. Kudìdingi kulekela dyabùlù utèeka ní ncinyi—ní ncinyi cyònsò munda mwèbè to, cifwànàngàne ne pomme mulenga wa ùbàlakana to, bwalu neciikale didimà dyà mpùsù, wamònu's. Imànshà cilumyànà aci ne cilekèle ànu nànkù. Lamà mèsù èbè ànu pa Kilistò, ànu pa Nkùrusè. Kàdi ùtùngunuke ne kuya kumpàla, bwalu dîbà dikàadi pabwîpî. Nwamònu anyì?

30 Kùdi bintu búngì cyanàànà byà dikànkamika bìndì ànu mwà kwamba, bwa mabènesha à Nzambì. Ncìvwa mukùmbàne mwà kukùmbula bààbúngì, nènku lumingu lujimà elu ncyèna musambidile bantu bapite pa makumi àtaanu to, ngèèla meeji, ne dipàtuka dibwela, ne maalu à makolè à lukasa ne bilwalwà ebi, ne bikwàbò, kàdi mwà mutàmbe kufila dîbà ku dilonga. Kàdi mpindyewu, mu dyàlumingu dilwalwà edi, netwikalè mwà kusambidila bantu, ne kulòmba Mukalenge bwà kutùluka ne kutùpèèsha bukolè bunène abu, ne kuDìmwenesha kutùdì mu dindà dyà dyàlumingu dilwalwà edi, bu Mukalenge mwà kwanyisha.

31 Kaa, ncyèna muswè kubanga cikondo cyà èkèleeziyà eci to bwalu ndi mumanye ne ki cyà ndekeelu ku byònsò. Nènku mpindyewu, mu eci, neciikalè nde—ndekeelu wa Bikondo Mwandamutekètè byà Èkèleeziyà. Nudi basànke naaci anyì? [Disangisha dìdi dyàmba ne: "Amen."—Muf.] Mpindyewu, vùlukaayi ne, ndi ngàmbe eci ku ndekeelu ànu mùmvwà mwambe ku cibangidilu amu, kùdi mwà kwikala bintu byàbúngì, kùdi mwà kwikala bintu byàbúngì byùdì kùyì upetangana naanyì to, kàdi kùnkwàcidi ciiji to, wamònu's, nnangeku ànu, nànsha byà munyì, bwalu cyònsò cyùdì mwà kwenza anyì cyùdì mwà kwamba kacýàkushintulula bwalu to, mèmè nenkwelèle meeji ànu mùshindù ùmwèùmwe awu; kòkò cingà cintu, matàmbidile, wamònu's, kabiyi nànkù to, nenkwelèle meeji matàmbidile. Kàdi ndi munùngè, Nzambì mmumanyè nànkù, kakwènakù muntu udi mwà kutèèla Dìnà

dyà Yesù Kilistò ûndi nciyì mufwànyine kunanga to. Nwamònu anyi?

³² Nènku ncyênaku muswè bululu nànsha bùmwè anyi dibenga kucyùkangana, nànsha twètù mwà kupangilanga byà bibi. Bu ne tuvwa basòmbe ku mèèsà ne ewu ùdya dyàmpà dyà mùshindù kampànda, ne mûngà, dyà mûngà mùshindù, aci's ncifwànyine kwikala ànu cìmpè mwaba ewu mene, nwamònu's. Bwà pa bìdì bitàngila bwobùmwè bwà muntu ne mukwèndè, tudi banangàngàne. Kàdi twètù katùyì twenza nànkù to, dîbà adi bikèngela twenze nànkù. Nènku bu . . . katwàdyàkuyaku ntàntà mule ne Nzambi twètù katùyì benze nànkù mu bulelèlè to.

³³ Kanùpùku mwoyi to, kanùpù mwoyi ne dipà ditàmbe bunène dyà ku mapà wònsò n'dinanga to. “Nànsha mèmè ngàakula mu myakulu yà bantu ne banjèlò, mufile ne mubidi wànyì bwà kwoshiibwawù bu mulàmbù, ngumvwa dimanya dyònsò, ne bikwàbò, mèmè ncyèna cintu nànsha cìmwè to. Pa nànkù . . . Kàdi pàdì cìdì cipwàngàne aci, cìdì dinanga . . .” Piikala mapà wònsò à nyumà kaàyi maswikakaja pàmwè kùdì nshàmenda wa dinanga to, kaàkukwàta to. Dìna nshàmenda mukwàbò kanà yònsò ewu neàvingutukè ne: “Kàdi dinanga neditùngunuke kashidi.” Nwamònu's, aci's n'Kolintò wa Kumpàla 13.

³⁴ Mpindyewu, dilòlòlò edi, munkaci mwà kubwela mu cikondo cinène cyà èkèleeziyà eci. Kaa, ekèlekèle! Mpindyewu, tudi mwà kwikala bu ne tusunsa dikùmi ne tùtaanu paanyimà pàa cìtèemà (dilòlòlò edi.) Nènku mpindyewu ndi bushùwà muumvwe bibi be bwà mutùdì katùyì ne mwaba mukùmbàne, kàdi . . . bwà kusòmbesha bantu bwònsò, kushikamija bantu bwònsò, èyowà's, kàdi katwèna ànu naawu to, nènku pàmwàpa dîngà ditùkù netùpete.

³⁵ Kàdi mpindyewu ndi muswè kunùlòmbe bwà nungenzèlèku dyèsè kampànda. Nudi bamòne ngiimànyinu wanyì ne nudi bamanyè cyànkèngelaci dîngà ditùkù, nudi numòna's, ne dîbà dikaadi pabwípì mene. Nwamònu anyi? Mpindyewu, ndi muswè bwà nwènzè eci, nùnsambidilèku misangu yònsò. Nènku vùlukààyi ne, ndi ne meeji matòòke ànu mùndì mumanyè mwà kwikala ne meeji matòòke amu, nwamònu's. Nènku ndi mumanyè ncicyèna kàbìdì mwàna mukesè to, ndi ne bidimu makumi àtaanu ne cìmwè. Nènku ndi—ndi pàdì wanyì . . . ncyèna mwà kuya pàdì Nzambi kàyì mumbiikile to. Nènku nényè mùshindù ùdìYe muswè bwà mèmè kuya, nènku neciikale nànkù. Nwamònu anyi? Kàdi ndi ne cyà kwikala ne meeji matòòke ne kwamba Bulelèlè, nànsha byà munyì. Pa nànkù ndi mumanyè ne misangu mikwàbò ndwendu lwà kalumankààya, kàdi bu mùdìYe neebè, nebishintulule cinyi? Nwamònu anyi?

³⁶ Mpindyewu, kumpàla kwà twètù kubwela mu cikondo cinène cyà èkèleeziyà eci, ndi ndikonka ní tudikù mwà kwimana kuulu mpindyewu bwà disambila, bwà katanci kakesè cyanàana

kàbìdì. Bìdì byenzaku ne nudyolòleku ne nudyûmweweku bîmpè. Mu disangisha dyà dijikija naadi edi, kùdiku...Mbanganyi mwab'ewu bàdì baswe bwà kubàvùluka kumpàla kwà Nzambì? Elàayi ànu byanza muulu kùdì Nzambì ne: "Wamvùlukakù, Éyì Mukalenge, ku ndekeelu kwà cikondo. Pààjika mwoyi wónsò, wàmùvùlukakù."

³⁷ Taatù wetù wa mu Dyulu, katwèna ne myakulu mikùmbàne to bwà kukuleeja patòòke disàkidila dyètù bwà Bwikadi bwà Nzambì udi ne mwoyi uvwa munkaci mwètù lumingu lushààle elu, bwà bintu bitùdì bûmwè Kùdì, mùshindù Ûdì muDìbuulule kutùdì munda mwà bikondo, ne mùshindù Ûdì mutùtòòkeshile Dìyì Dyèbè. Mùshindù mene utùdì baKweyèmene, ne mùshindù utùdì—utùdì batèete kuleeja patòòke dinanga dyètù, kàdì kupangila bwà kucyènza, Mukalenge, Bwalu myakulu yà cifwàkà kayìvwa mwà kwenza nàнку to. Bwà kus-...bwà kutùsùngila mene, ne Wèwè...bwà kutùpèèsha mene nzala Bwèbè. Bwalu mbafunde mu Dìyì ne: "Bàà disànka ng'aba bàdì ne nzala," (ànu bwà kwikala ne nzala, ndibèneshà) "nzala ne nyòòtà yà bwakàne." Pashiishe Wèwè wákamba cikùmà cinène cyà dìyì adi ne: "Bwalu nebùkucishiihwè!" Mpindyewu, tudi twitabuujà nàнку, Mukalenge. Tufwileku luse ku mapanga ètù.

³⁸ Nènku patùdì tubwela mu dilòlò edi apa ku...ku cikondo cyà ndekeelu cyà èkèleeziyà eci apa, cìdì ciikale Laòdìkiyà, paanyimà pàà twètù bamòne Mifùndu ne maalu-malonda bituutakeena dìbà dyònsò ànu mu byòbì menemene. Pa nàнку, Taatù, tudi bamanyè dìyì dyamba dyà ku cipròfeta Cyèbè cinène eci mwaba ewu, cyà cikondo cyà ndekeelu eci, neciikale ànu bu mùvwà bikondo bikwàbò bisambòmbò abi. Taatù, ndi ndòmba bwà Wèwè kulekela Nyumà Mwîmpè alwe kutùdì dilòlò edi, mpindyewu, nènku túbènèshèku patùdì tutùngunuka ne kuKwindila apa. Mu Dìna dyà Yesù. Amen. Sòmbaayi.

³⁹ Bu Mukalenge mwà kuswa, mukàndà newikale... dyàkàmwè patùdì ànu tupeta mùshindù. Mwanèètù Leo ùdì munkaci mwà kubyàngacila pa mukàbà wà mèyì, bwà kutùngunuka too ne ku...kutùngunuka ne kudibifùnda ku byanza, kuumukila aku kubìtuuta ku màshinyì, pashiishe kubyènza mukàndà.

⁴⁰ Nènku ànu mùshindù awu, Rosella neàpetè mukàndà wèndè dyàkàmwè wa ne: *Kanwàyi Musungidùbwe*. Nwènù bònsò nudi bavùlùke bwalu bulonda bwèndè abu, mwàkamubiikilà Nyumà Mwîmpè mu disangisha amu. Nènku yèyè ùvwa...ukaavwa mulekelela kùdì nzùbu yà byondopelu yìnaayi minènanènààle yidì yitangila tunwàyi, ne mwipata mu mpitaadi yivwà yìsanganyiiibwa mu Chicago ayi. Kàdì Mukalenge Yesù, mu katùpà kakesè kàà dìbà, kubipàtula byònsò mu yèyè. Yèyè ùyaaya kuumukila ku buloko ne ku myaba mikwàbò, wènda ùlondela bantu mùdì Nzambì mukùmbàne mwà kupikula,

uyiikilangana ne tunwàyi ne bakwàbò. Ùkaadi . . . ku bujaadiki bwèndè, mupètèle Kilistò bantu bààbùngi.

⁴¹ Mpindyewu, cikondo cyà kumpàla cyà èkèleeziyà, nudiku mwà kungambila ne civwa ncinyi anyi? Efèsò. Ciibìdì? Seemùnà. Ciisâtù? Pègàmò. Ciinâyì? Twatilà. Ciiitànù? Sààdi. Ciisambòmbò? Filàdèlàfiyà. Cyà mwandamutekète? Laòdikiyà.

⁴² Cyà kumpàla paanyimà pàa lufù civwa mpankaci cidimu cyà 55 ne 170 cyà cikondo cyètù eci, Efèsò. Seemùnà, 170 too ne ku 312. Pègàmò, 312 too ne ku 606. Twatilà, 606 too ne ku 1520. Sààdi, 1520 too ne ku 1750. Filàdèlàfiyà, 1750 too ne ku isambòmbò . . . 1906; mpindyewu, kubangaci cikondo cyà Laòdikiyà, kutentamanganaci, nènku dilòòlò dishàale tuvwa babwele mu ditentamangana dikesè adi. Mpindyewu, tudi dilòòlò edi, twangata ndekeelu wa Laòdikiyà.

⁴³ Tudi twitabuuja ne èkèleeziyà wa Laòdikiyà wàkabanga mu cidimu cyà 1906 Paanyimà pà Lufu mu cikondo cyètù eci. Ndi ndyanjila kwamba . . . Mpindyewu, nwàvùlukaayi ne: “kudyanjila kwamba,” nangananga nwènù bàdi batèeleja mukàbà wà mèyi. Ncyèna ngàmba ne nebùikale nànkù to, kàdi ndi ndyanjila kwamba ne neciikale ne cyà kushùikidila lwà mu cidimu cyà 1977, ne èkèleeziyà neikale mudibwinke yèye yònsò nkòong mu dipambuka ne neikale mulùka mukana mwà Nzambi. Ne Dilwa Diibìdì, anyi Dyambwibwa dyà Kilistò, ndifwànyine kulwa díbà kanà dyònsò. Mpindyewu, ndi mwà kutùpakana ku aci mu cidimu cimwè, ndi mwà kutùpakanakù mu bidimu makumi àbìdì, ndi mwà kutùpakanaku mu bidimu lukàmà. Ncyèna mumanye kùdici . . . Kàdi ndi ànu ndyanjila kwamba ne bilondèshile cìkèènà-kumòna cyàkandeejàYe, ne mu ditàngila dyà cikondo, mùshindù ùdìbi byenda biya, ndi ngàmba ne nebyenzeke misangu mikwàbò pankaci pàa cidimu cyà 1933 ne 1977. Kàdi—kàdi nàshna nànkù, ditunga dinène edi nedìditwè mu mvità yìkalà mwà kudisùnsulula mu tupesetupese, nwamònu’s. Mpindyewu aci’s cidi papwipi menemene, cidi pabwipi pàa dikèma. Kàdi ndi mwà kutùpakana, ndi munkaci mwà didyanjila kwamba. Bantu bwònsò mbumvwa anyi? Ambàayi ne: “Amen,” panwìkalà bumvwa. [Disangisha dìdi dyàmba ne: “Amen.”—Muf.] Nwamònu anyi?

⁴⁴ Kàdi Mukalenge wàkandeeja cìkèènà-kumòna cyà mukàjì munène wa bukolè, mu cidimu cyà 33, 1933, cidi pa dibèji. Cyà mùshindù ùwà “Roosevelt mufwànyine kwenzeja . . . wàkafikisha buloba bwà kuyabù mu mvità.” Mùshindù ùwà “Mussolini mufwànyine kwenza dibùcikila dyèndè dyà kumpàla mu Ethiopie ne mùvwàye mwà kumwangata, kàdi ùwà mwà kufika ku ndekeelu wa bundù.” Ne mùshindù ùwà “Dìbà adi tusùmbù túsàtù: Nazisme, Fascisme, ne Communisme, mùvwabi byònsò mwà kulwa kutùkina mu Communisme.” Nènku mbanganyi mwaba ewu bàdi bavùluke mùmvwà ànu mutungùnuke, mushàale munwimanyike kuulu, ne ncyàmbulula

ànu kucyàmbulula, mvwa nwàmabila ne: “Tàngilàayi Russie! Tàngilàayi Russie, mfùmù wa Ku Nord! Tàngilàayi Russie, mfùmù wa Ku Nord!”? Mbanganyi bàkaadiku bangumvwè ànu ncyàmba, ncyàmbulula, kàbìdì? Beena kale, nudi numòna’s, mu cikondo cyà ntwàdijilu cyà èkèleeziyà ewu. Mwimane ànu mwaba awu ngenda ncyàmba ncyàmbulula ne: “Tàngilàayi Russie, mfùmù wa ku Nord! Nwamònu’s, cìikalaye mwà kwenza, bwalu tusùmbù twònsò atu netùkungwile mushiki mu Russie.”

⁴⁵ Pashiishe mèmè kwamba ne: “Ditùngà edi ndekeelu wa byònsò nedibwele mu mvità ne Allemagne. Ne Allemagne neikale mwibàkiibwe mu lumbu lwà nshàmenda.” Nènku aci’s cìvwa Cimanu cyà Maginot, bidimu dikumi ne cìmwè kumpàla kwà cyòcì kubanga kwibakiibwa, bidimu dikumi ne cìmwè kumpàla. Ki mèmè kwamba ne: “Beena Àmèrikè nebàtucike bibi byà menemene ku cimanu aci.” Bàmwè bàà ku bàna bèètù kaaba aka bàvwa basanganyibwa ku cimanu aci, Mwanèètù Roy Roberson ne bakwàbò; bakonkaayi cyàkenzeka. Bààkatuucika bushùwà. Èyo. “Kàdi ndekeelu wa byònsò,” mungàakambà, “netùcimune ne netwikalè bàmwè bàà ku bacìmunyi mu mvità yìkala pankaci pèètù ne Allemagne.”

⁴⁶ Mpindyewu, mèmè kwamba ne: “Pashiishe paanyimà pàà cikondo aci, maalu à mamanya awu neikale mwà kutanta menemene.” Àkatanta, s’mbenze bòmbè bwà mushindà ne bikwàbò byònsò. Mèmè kwamba ne: “Mu ditanta dyàbò adi, nebìikale mwà kwenza...tùshinyi netùbange misangu yònsò kwangata mbungakeenu wà diyi.” Nènku s’nudi nuvùluka cibwikidi cinène cyà kale cyà mu 1933, cyànyimà cipwekelele mùshindù ewu, ne lukata lwà dishintulula paanyimà pààkù apu anyi? Tàngilàayi numòne mùdìbi mpindyewu, nwamònu’s: kapunga be, nwamònu’s, kafwànàngàne ne diyi. Ki mèmè kwamba ne: “Ndekeelu wa byònsò nebènzè kàshinyi kùkàla kakàyi dijinga ne yèndà munda mwàkù amu nànsha. Mèmè kumòna dīkù kampànda dyènda dipweka...Kucibiikila ne: ‘njila,’ mu kàshinyi kàà cibwikidiji cyà lumwènù, njila minène yà mmwèkelu mulenga kumòna ne kàshinyi kalenga. Nènku bàvwa basòmbè, batàngilàngàne muntu ne mukwèndè, ne kàshinyi munkaci mwà kudyendela nkààyaku, kènda kaya katùngùnuke mu bibèndà amu ne bikwàbò byònsò.” Kàdi’s bakaadi ne kàshinyi aku patùdì twakulangana apa, bakaadi bamanè kukènta. Bàdi ne kàshinyi. Ki mèmè kwamba dībà adi ne: “Kaa, maalu à mamanya neàtante mu ditùkù adi’s wè!”

⁴⁷ Mèmè ne: “Pashiishe mèmè kumòna...Nebàanyishile bakàji ne bàdi munkaci mwà kwanyishila bakàji bwà kwenza masungula. Ne ku disungulangana, nebàsungule muntu mubì dīm̀wè dyà ku matùkù aa.” S’ki cinwakenza ku masungulangana mashààle aa. Mmasungula à bakàji àkasungula Kennedy. Tudi bamanye aci, nwamònu’s, pankaci pàà mashingi à diibila ne

bintu byà diibila, bivwa FBI mwele patòòke abi. Ne mùshindù úvwà ní nganyì ní nganyì mwà. . . Mbwà cinyi kabèèna bènza cintu kampànda bwà bwalu abu? Mbwà cinyi kakwèna ní ncinyi cyakùdiibwe? Ha! Bàdi ne bwôwà bwà ne muntu kampànda mmufwànyine kujimija mudimu wèndè. Nudi numòna's, cidi ànu musùmbà wa cidiidi cyanààna, mubole too ne penyì. Kwajiki. Cyà bushùwà!

⁴⁸ Kawèna nànsha—kakwèna nànsha. . . kakwènakù, mfwilaayiku luse. Kakwèna lupàndu mu ditùnga edi to, kakwèna lupàndu mu ditùngà nànsha dimwè to. Lupàndu lùdi mu Yesù Kilistò ne mu Yèyè nkààyèndè! Uh-huh! Ncyà bushùwà. Mpindyewu, ndi ne kusàkidila bwà Àmèrikè. Mbipiciibwe ne mèmè musòmbèle kaaba aka kutàmba mwaba kanà wònsò mukwàbò pa buloba, bwalu. . . pambèlù pàà Canada. Canada ne Ètats-Unis mmapàsa, aci kaayi tudì bamanyè, matùnga matwàngàne mutumba, mwaba mulenga wà kacya, kàdi ndi—ndi ngiitabuuja ne mbipiciibwe ne mèmè musòmbèle muneemu kutàmba ní mpenyi ní mpenyi pàndiku mumanyè, bwalu nkwètù kundela. Ndi ne disànkà dyà ne ndi mwena Àmèrikè, ne kusàkidila bwà bwalu abu. Kàdi ndi ntwàmbila, didi bushùwà dikèngela ditàbuluja dyà dikandameena, ki cidi cikèngela. Kàdi kadyàdyàkudipeta to! To, mukalenge. Kààdyàkujuukakù kàbidì to! To, mukalenge. Bwàdi mbutùukè! Nudi bavùlùke, kùkaadi bidimu bitwè ku bitaanu mu Chicago mwàmwa, aci's cidi pa mukàbà wà mèyi. S'udi naawu, Gene. Mèmè kwamba ne: "Anyi nebàCiitabe cidimu eci, peeshi nebàtungunuke ànu ne kudishinda." Kàdi's bàkaadi bacyènze, nwamònu's, ne nebàcyènzè too ne mwàfikaye ndekeelu wa byònsò ku nshìkidilu wèndè.

⁴⁹ Kàdi nekwikalè mukàji wa bukolè! Mpindyewu, nwàvùlukaayi! Eci cidi pa mukàbà wà mèyi, kàbidì. Mukàji wa bukolè, mukàji munène, yèyè neikale anyi Mfùmù wa ditùnga, anyi neciikale mukàji uleeja mpàla wa èkèleeziyà wa Kàtòlikè (ùndi ngèèla meeji ne nyèyè) neàkòòkeshe mwab'ewu dìngà ditùkù ne yèyè neàlombòle ditùnga edi. Ditùnga edi nditùnga dyà mukàji. Dibèndele ndyenza kùdì mukàji, n'nombà wa dikumi ne isàtù. Dyàkabanga ne, mìtootò dikumi ne yisàtù, mishoonyi dikumi ne yisàtù, matùngà makesè dikumi ne asàtù. Byònsò bidì ànu dikumi ne isàtù, dikumi ne isàtù, dikumi ne isàtù, bitùngunuke ànu nànkù. Mìtootò dikumi ne yisàtù pa ndola wèndè wa cìcyele awu mpindyewu. Byònsò bidì ànu dikumi ne isàtù. Bidì ànu nombà wa dikumi ne isàtù, nènku ùdi ùmwènekela mu nshapità wa 13 wa Bwàkabuulwibwà. Byònsò nkòong ànu dikumi ne isàtù! Byònsò bidì ànu "mukàji, mukàji, mukàji, mukàji, mukàji," ànu kacya bimònàngàne. Nènku ùkaadi mukòòkesha midimu yònsò yà biro. Yèyè's mmukòòkeshe Hollywood. Yèyè's mmukòòkeshe matùnga. Yèyè's mmukòòkeshe midimu yònsò. Yèyè's mmukòòkeshe cintu cyònsò cidiku eci;

manèème à dyàcimwè ne mulùme, wenza masungulangana pàmwè ne mulùme, ne bwakulàvi bu mulùme, ùnwa maalà bu mulùme, cintu kanà cyònsò. Nènku ànu ciishi ku ndobo bwà èkèleeziyà wa Kàtòlikè, bwà dikuukwila dyà mukàjì's! Bakaadi munkaci mwà dikuukwila mukàjì, twamb'eku twamb'eku.

⁵⁰ Yèyè's mmutàmbe . . . Mukàjì wa masandi nciishì cyà ku ndobo citàmbe bwímpè cikaadiku kacya dyabùlù mupeta. Yèyè's mmubi mutàmbe nzùbu yònsò yà binwinù byà maalà yitùku eyi. Yèyè's ùdi mwà kutùma misùukà mipite bùngì mu iferno kutàmba nzùbu yònsò yà binwinu byà maalà yidi mu ditùnga emu. Ncyà bushùwà.

⁵¹ “Mukàjì mwímpè ncilengà cyà ku cifulu cyà butùmbi cyà mulùme,” mwàkambà muntu wa lungenyi lutàmbe wa pa buloba. Bikèngela mulùme apeeshe mukàjì mwímpè bunème, nwamònu's. “Kàdi wa mubi yèyè mmâyì mu mashi à mulùme,” pèndè mashi èndè ki mwoyi wèndè. Nwènù balùme bàdi ne bakàjì bimpè, kanwèna nànsha bamanyè muvwabi bikèngela bwà nwènù kusàkidila Nzambì bwà mukàjì mwímpè to! Bwalu bu Nzambi mufwànyine kupèèsha mulùme cintu citàmbe bwímpè bu mumukwàcishi, s'Úvwa kwikala mucyenze. Kàdi mukàjì ke mukwacishi mutambe bwímpè wa mulùme udi Nzambì mufwànyine kumupèèsha. Kàdi pàdibo bàkùdimuna . . .

⁵² Mukàjì ke uvwa Sàtaanà musungùla mu budimi bwà Edènà bu cyamu cyèndè cyà mudimu. Kààkangata mulùme to, wàkangata mukàjì. Cyàkabèngelaye kuya kùdi Adàmà bwà kumupèèsha nkùkà nciyni? Wàkalwa kùdi mukàjì ne kumupèèshaye, nwamònu's, bwalu yèyè ke uwayne musungùle. Nzambì wàkangata muntu mulùme, ne Sàtaanà wàkangata muntu mukàjì.

⁵³ Nènku tàngilààyì ànu ku mbangilu too ne ku ndekeelu . . . Pààkashiibwa Baabùlòònà ku ntwadijilu, mu *Baabùlòònà Yibidi* yà Hislop, mukàjì kampànda! Pààkapwekabi too ne mu cikondo; mpindyewu cikondo cyà Bisàmbà byà bendè cidi munkaci mwà kwenda kujika. Baabùlòònà wàkabanga mùshindù awu, ne ùdi ùjika ne dikuukwila dyà mukàjì (Màriyà) mu èkèleeziyà. Ditùkù kaayi ditùdi ne mwoyi edi's wè!

⁵⁴ Mpindyewu, *Laòdìkiyà* awu, cikondo cyà—cyà Laòdìkiyà, mwakù awu wùdi wùmvwija ne “civùmvù.” Ncyùle tètè ne mabanji, ne cyèla meeji nekacyèna dijinga ne cintu to. Kàdi Bible ùdi wàmba ne cidi “cikèngeledi, mpofò, cyena dikènga, ne butakà.” Ngiikàdilù kaayi's wè!

⁵⁵ Difutu dyà aba bàdi bàcimuna mu cikondo cyà èkèleeziyà eci, ndyà “kusòmba pa nkwasà wa butùmbi ne Mukalenge.”

⁵⁶ Mpindyewu, mùtootù awu, anyi mwanjèlò, anyi mùsànjeela wa cikondo cyà èkèleeziyà eci, kí mmumanyike to.

⁵⁷ Mpindyewu, mùsànjeela wa cikondo cyà kumpàla cyà èkèleeziyà, ùvwa nganyi? Pòlò, Efèsò. Seemùnà? Irenée.

Peegàmò? Martin Munsantu. Twatilà? Colomban. Sààdi? Luther. Filàdèlàfiyà? Wesley. Ne mu...cyà Laòdikiyà eci, katwèna banji kumanya to, ne pàmwăpa katwăkumanya to too ne pààjika byònsò.

58 Kàdi ndi muswè ànu kufila àànyi mèyi bwà cìkala mwanjèlò ewu, utùdì bìndile ewu. Ncifwànyine kwikala cìmpè anyi? [Disangisha dìdì dyàmba ne: “Amen.”—Muf.] Bu mùdìbi ne tudì ne kaacikondo kakesè, ndi mufunde ànu kaadìyi kakesè mwaba ewu kàà cìndì ngèèla meeji.

59 Mwanjèlò wa èkèleeziyà wa Laòdikiyà ewu, bwà kucijikija. Mpindyewu, yèyè neikalèku ku ndekeelu wa cikondo, ànu bu bakwàbò bwònsò abu, bu mùdì Bible. Yèyè neikalèku ku ndekeelu kwà cikondo. Kì nku mbangilu kwàcì to, ku ndekeelu kwàcì, bwalu mwanjèlò ùtu misangu yònsò ùlwa bwà kutàndisha...bwòbò abu bwà cìvwabo benze. “Fùndila mwa—mwanjèlò wa èkèleeziyà wa Laòdikiyà bintu ebi.”

60 Nwamònu’s: “Fùndila mwanjèlò wa èkèleeziyà wa Seemùna bintu ebi.” Nwamònu’s, cyònsò ncyambila mwanjèlò ku ndekeelu kwà cikondo. Pòlò, ndekeelu wa cikondo. Ànu nànkù too ne kwìnshì, ku ndekeelu kwà cikondo. Ditentamangana, ndekeelu wa cikondo. Ndekeelu wa cikondo, ke cìdì cìcìvwijà ditentamangana ncyòcì aci. Nwamònu’s: “Kùdì mwanjèlò,” wàkula cìvwàku. Eci ncientàmàngàne mwab’ewu ne: “Kùdì mwanjèlò,” ku ndekeelu wa cikondo aci. Nwamònu’s, wàmbwila ànu apa, wenza ditentamangana ànu bu mutù bidyacilu byà cibàndilu bibànda amu, Bikondo Mwandamutekète Byà Èkèleeziyà.

61 Mpindyewu, mwanjèlò udi ubwela mu ditùkù edi awu, ndi muswè ku...Ndi ne cintu kàmpànda cìfùnda kaaba aka, ndi muswè ànu kucibala. Kàdi yèyè neàmanyiibwè mu citùpà cyà ndekeelu cyà cikondo. Ne bwalu tudì pabwìpì menemene ne aci—pabwìpì menemene ne cikondo cyà Bukènkè aci, pàmwăpa yèyè ùdì pa buloba patùdì twakulangana apa. Nwamònu’s, katwèna bamumanyè to. Yèyè neikale mupròfètà wa—wa bukolè wàbèngiibwa kùdì bukwa èkèleeziyà, bwalu bwòbò nebàtùngùnùke ànu mu mpèkaatù yàbò ne ndekeelu wa byònsò Nzambì neàbàtwile mukana, kubàpatula mukana mwà Bwikadi bwà Nzambi.

62 Ngèèla meeji neikale bu Eliyà. Nemfilè twànyì tubingilà. Mpindyewu, tubuululàayi ànu kaaba aka mu Mukànda wà Maalàki, bwà katancì kakesè cyanààna, nènwambile bwà cinyì ndi ngèèla meeji ne neikale muntu mulaaba kùdì Nyumà wa Eliyà. Mpindyewu, ndi muswè bwà nùvwalè kafulu kèènù—kèènù kàà ngàsà aku mpindyewu. Maalàki, nshapità mwì4. Mpindyewu, tèèlejàayi pàndì mbala apa, ne nwènù nubala mu Bible wenù amu. Mpindyewu, anjì elàayiibi meeji ne ntèmà yònsò

mpindyewu bwà tusunsa tukesè tùdi tùlondà etu, mpindyewu, kumpàlà kwà twètù kubwela mu cikondo cyà èkèleeziyà.

Bwalu, mònaayi, ditùkù dilwalwa, diikalà mwà kwosha bu cikitu cyà kapyà; ne beena dyambu bwònsò, èyowa, . . . ne beena lwonji bwònsò, nebùkale bu bisònsà: ne ditùkù dilwalwà adi nedibàbùtùlè, mùdi MUKALENGE wa bilwilu wàmba, ne kadyàkubàshùla ní muji ní ditàmba.

63 CidiYe wàmba ncinyi? Yèyè ùdi wàkula bwà ditùkù dilwalwà. Udikù mwà kwitaba aci anyi? Ku ditùkù dyà dilwa dyà Mukalenge.

Kadi kunùdi nwènù . . .

64 Mpindyewu tàngilàayi, mpindyewu Yèyè ùdi wàkula ne Izàlèèlà. Mpindyewu, cyàkambàYe ncinyi? “Bwalu, mònaayi ditùkù dilwalwà (dicidi dilwa) diikalà mwà kwosha.”

Kadi bwènù nwènù bàdi bàcùina dìnà dyànyì . . . Dìbà dyà bwakàne nedìjuukè ne dyondopa mu mapwàpwà àadi; ne nwènù nenùpatuke, ne kutùpika bu twànà twà ngombe twà mu cikumbi.

Ne nwènù nenùdyatakaje beena lwonji ku makàsà; bwalu nebùkale butù mwinshi mwà bidyacilu byà makàsà ènù mu ad- . . . mu ditùkù ndingèza eci, mùdi MUKALENGE wa bilwilu wàmba. (Kì . . . Ditùkù diikalàYe mwà kwosha buloba, netwèndelè pamutù pàà butù. Aci’s ki Bukalenge bwà bidimu cinunu, mu bushùwà bwà bwalu, nwamònu’s.)

Vùlukàayi . . . mikenji yà Mòsà musadidi wanyì, ungàakatamina dìyì . . . yèyè mu Holebà bwà beena Izàlèèlà bwònsò, ne mèyì matùma ne cilumbulwidi.

Mònaayi, nènùtùmìnè Eliyà mupròfetà kumpàlà kwà dilwa . . . ne ditùkù dinène ne didì dikwacisha bwòwà dyà MUKALENGE adi:

Ne yèyè neàkùdimunè myoyi yà baataatù bwà kuyààluja kùdi bàrà, ne myoyi yà bàrà kùdi baataatù abu, bwà ncilu kutuuta buloba ne mulawu.

Ndekeelu wa Dipungila Dikùlukulu.

65 Mpindyewu, Yesù wàkamba . . . Maatàayi 17:10, wàkula bwà cyòci eci. Beena Yudà bwònsò mbìndile Eliyà ulwàlwa awu. Mpindyewu, tàngilàayi nùmonè cidi Yesù mwambè pa bwalu abu, Maatàayi 17:10. Netùbangilè ku mvensà wa 9, Maatàayi 17:9:

Nènku bu mùvwàbo bènda batùùluka ku mukùnà, Yesù wàkabòmekela bujitu, wàmba ne: Kanwàmbidi muntu nànsha umwe . . . Kanwàmbidi muntu nànsha umwe cìkèènà-kumòna to, (Nwamònu’s: “Kanwàmbi

eci to. Nudi bacìmanyè, kàdi nuci lamè bwènù nwènù nkaayenù.”)...*Kanwàmbidi* muntu nànsha umwe cikèèna-kumòna eci to, *too ne pààbùka Mwànà wa muntu... ku bafwè.* Kanùcyambi to.

Ke bayiidi bèndè kumukonkabo, bàmba ne: Kàdi mbwà cinyi bafundi bàmba ne Eliyà ùdi ne cyà kulwa dyàmbedi? Bwà cinyi bidi ne Eliyà ùdi ne cyà kulwa dyàmbedi bangabanga ne Kilistò ewu kulwayè, Dìbà dyà bwakàne adi? Mbwà cinyi mbàmbe nùnkù? Mwab'ewu, Wèwè ukàadi kaaba aka, kadi bafundi mbambè ne—ne Eliyà ùvwa mwà kulwa dyàmbedi.

Mpindyewu, tàngilàayi:

Ki Yesù kwandamuna e kubàmbila ne: Mbulelèlè ne Eliyà neàlwe, neàlwe dyàmbedi, ne kwalujulula bintu byònsò.

Kàdi ndi nkwàmabila ne: Eliyà awu ùkaadi mumanè kulwa, kàdi nwènù kanwàkamumanya to, (Nwamònu's, Yèyè kàakamba ne ùvwa nganyi to, nwamònu's.) kàdi nwàkamwenzela cyònsò cinùvwa baswè aci. Mùshindù awu ke wàkengeshiibwa Mwànà wa muntu kùdìbo.

Ke bayiidi kuumvwabò ne ùvwa ùbàmabila bwà Yone Mubàtiji. (Mpindyewu—mpindyewu, Yone Mubàtiji nguwva Eliyà uvwa ne cyà kulwa awu.)

⁶⁶ Mpindyewu tàngilàayi, ndi ngàalukila ku Maalàkì nshapità mwi⁴, cyàkàbidi. Mpindyewu vùlukàayi ne, Yèyè wàkamba kaaba aka ne: “Kumpàla kwà Ditùkù dinène ne dyà luumù, ne didi dyenza bwòwà dyà Mukalenge kulwadi, Nènnùtùmìnè Eliyà mupròfeta.” Mvensà mwi⁵:

Kàdi Nènnùtùmìnè... mupròfeta... Nènnùtùmìnè Eliyà mupròfeta kumpàla kwà dilwa dyà ditùkù dinène ne dyà dikwacisha bwòwà dyà... [Disangisha didi dyàmba ne: “MUKALENGÈ.”—Muf.]

⁶⁷ Ncinyi citùdi tusangana “mu Ditùkù dyà Mukalenge”? Ku ndekeelu kwà cikondo! Ki dìbà diikalà bàà pa buloba mwà kwoshiibwa. Nudi bavùluke mutwàkaMwangata mwikale ne kafulu katòoke ku mutù, nudi bamanye's, ne—ne cyàdi Cyèndè, ne mukàbà musenya lwà pa cyàdi. Nudi bavùluke aci anyi? Nènku twakajaadikila ku Bible ne, kacivwa ditùkù dyà *nsabatu* anyi *dyàlumingu* to, cìvwa n'Ditùkù dyà Mukalenge. Ncyà bushùwà anyi? Nènku ki ditùkù didiYe ùlwa bu Nzuji ne: “Ne neàtuute buloba ne mulawu.” Ncyà bushùwà anyi?

Nènku nènnùtùmìnè Eliyà mupròfeta kumpàla kwà dilwa dyà ditùkù dinène ne dyà dikwacisha bwòwà dyà MUKALENGÈ:

⁶⁸ Mpindyewu, tàngilàayi dilwa dyambakàne dyà Eliyà. Mpindyewu, bu nwènù mwà kumòna, Mufundu wònsò ewu

wùdi ne dyumvwija dyambàkàne: “Kàdi Ncisokoka ku mèsu kwà beena meeji ne badimuke, ne cibiulwila bàna bakesè bàdi baswè mwà kuyiila.” Kanwèna nwitabuuja aci anyi? Mpindyewu, lamàayi Maalàki 4 ànu mwab’awu.

⁶⁹ Nènku mpindyewu twàlukilàayi ku Maatàayi 2 katanci kakesè cyanààna, ànu luseke lukwàbò lwà dibèji alu, Maatàayi 2. Ngèèla meeji ne bivwa bikèngela bwà mémè kwamba ne Luukà 2 pamutù pàa Maatàayi 2. Ndi naaci cifundà kaaba aka, kàdi mvwa ndwijakaja ànu mu katanci kakesè emu, ne Nyumà Mwîmpè ùvwa pambidi pàanyi mu cibambalu amu ne mvwa munkaci mwà kupicila mu cikondo cîmpè citàmbe. Pa nàнку mvwa nswa kwamba...2, twànjibi kumòna ní ncyòci. Mpindyewu, ngànjibi kulonga eci ànu bwà katanci kakesè. Maatàayi 2 anyi? Aci kî ncîndi nkeba to, kî mmwòmò anyi? Mpindyewu, indilaayibi kakesè, nencipete ànu mu... Anji mpèshaayibi kaacikondo kakesè kaaba aka bwalu ndi muswè bwà nwikale batwishiiibwe ne nudi bacimòne, ne Mufundu ùtu ne dyumvwija dyambàkàne mu Wòwò. *Dikuukwila dyà Anna; Dyalukila ku Nazàlèetà; Paasàkà; Mudimu wa bwambi wa Yone.* Mpindyewu, ngànji mmonèbi ní mvwa mwà kwikala mwambe Luukà, mvwa mbala mwaba kampànda ne... Ndi—ndi njinga kwamba ne Maakò pamutù pàa Luukà, mbifwànyine kwikala Maakò. Kàdi ndi muswè bwà nùpetè Mufundu ewu bwà—bwà nwènù kumanya ne mmudimu wa Mukalenge, ne Yèyè bushùwà ngudi wenza cyòci eci mu mùshindù ewu. Mpindyewu, nennwambile mwaba ùndi nkebangana naawù, mwaba wà ne: “Ngàakabiikila mwan’Àanyi pambèlù pàa Èjiipitù.” Kùdiku muntu kampànda udi ne mèyi à kumpenga kwà dibèji udi mufwànyine kufikakù ne lukàsà lwònsò ne kucipeta anyi? “Ngàakabiikila mwan’Àanyi pambèlù pàa Èjiipitù, Ngàakabiikila mwan’Àanyi.” Mpindyewu, anji indilaayi kakesè.

⁷⁰ [Mwanèètù kampànda ùdi wàmba ne: “Luukà 1:17.”—Muf.] Luukà 1:17. Twasàkidila, mwanèètù. Ncyà bushùwà, Luukà 1. Maakò... Luukà 1:17, pamutù pàa 2. Ndi muswè kupeta mvensà wa 14, ki mwaba ùdi... Ki cyòci aci, mwanèètù. Ncyà bushùwà menemene, Luukà 1:17. Èyo. Mpindyewu, mpindyewu nudi mwà kucifunda. Mpindyewu, ncinyi aci, mpambèlù pàa mabènesha à Mukalenge, kwàkabèneshiibwaci.

Ne wèwè neùpetè disànkà ne musàngèelu; ne bààbúngì nebàsankè ku dilediibwa dyèndè.

Bwalu yèyè neikale munène ku mèsu kwà Mukalenge, ne kàakunwà ní mvinyò ní mmaluwu makolè;

⁷¹ Muntu ulwàlwà ewu neàlongeshiibwe kacya ku dilediibwa dyèndè bwà kàyì kunwà maala to anyi bwà kwikala ne cintu kampànda cyà dyenza ne mpèkaatù wa mùshindù awu. Nwacyùmvù anyi?

...ne yêyè neikale mûjîibwe ne Nyumà Mwîmpè, kacya ànu munda mwà mamwëndè.

Ne bààbúngì bàà ku bânà bàà Izàlèlèlà neàbaalujè kùdì Mukalenge Nzambì wabò.

Ne yêyè neàye kumpàlà kwèndè mu nyumà ne bukolè bwà Eliyà, bwà kwaluja myoyi yà baataatù kùdì bânà, ne bantòmbòjì ku lungenyi lwà baakàne; kulongolwela Mukalenge cisàmbà ciikale pabwîpì.

⁷² Mpindyewu, mpindyewu tudi tufika ku dyumvwa ne yêyè ùvwa mwamba mu cipròfetà, ne muntu awu ùvwa Yone's! Ncyà bushùwà anyi? Yone ùvwa Eliyà awu, wa ditùkù adi, uvwa ne cyà kulwa.

⁷³ Mpindyewu, tudi kàbìdì bamanyè ne Mufùndù misangu mikwàbò útù umvwija bintu bibidi. Newikale mwà kwamba cintu kampànda, bu mùdì lwà mu Maatàayi mùdìWu mwàmbe ne: “Ngàakabiikila mwan'Àanyi pambèlù pàà Èjiipitù.” Èyo, ngèèla meeji ne aci ki cìmvwà ngenda nkeba ne: “Ngàakabiikila mwan'Àanyi pambèlù pàà Èjiipitù.” Nènkù díbà adi wènú bakèbùlùlàngàne ne “mwànà” mu byà dileedila amu, Yêyè ùvwa . . . kàvwa . . . Ncyalùkile mu Hoshèyà, cìvwà kaciyi cyùmvwija ne Yesù, Mwan'Èndè to; cìvwà—ùvwa ny'Izàlèlèlà, mwan'Èndè: “Wàkabiikila Izàlèlèlà pambèlù pàà Èjiipitù.” Kàdì cìvwà ne muumvwija mambàkàne ne luumvu lutàmbe bunène mu cyòci pàvwàci cyumvwija ne cyàkula bwà bwalu bwà—bwà dilwa dyà Yesù, uvwa munène mutàmbe Izàlèlèlà awu, pàakabiikilaYe Izàlèlèlà pambèlù. Èyo.

⁷⁴ Mpindyewu, tudi kàbìdì tusangana ne . . . mu dilwa Dyèndè dyà kumpàla kadìvwa ku Ditùkù dyà Mukalenge to. Ncyà bushùwà anyi? Mpindyewu, twàlukilàayi ku Maalaki, twànjìbi kwolola eci dyàmbedi ne: “Kulwa ku Ditùkù dyà Mukalenge.” Mpindyewu, tàngilàayi dilwa Dyèndè dyambàkàne, dilwa dyeèndè dyà kumpàla ne Dyèndè diibìdì. Nudi ne ngeelèlù wènú wa meeji wa nyumà awu pabwîpì anyi? Mvensà mwi6 mpindyewu: “Yêyè neikale . . .”

...Yêyè neatumè . . . Eliyà . . . kumpàlà kwà . . . ditùkù dinène ne didì dikwàcisha bwòwà dyà MUKALENGÈ: (Ncyà bushùwà anyi?)

⁷⁵ Mpindyewu, tudi bamanyè ne awu kàvwa Yone to, bwalu kacìvwa Ditùkù dyà dikwàcisha bwòwà dyà Mukalenge to (mmwòmò anyi?), ne Yêyè . . . Kàvwa nànsha mwòshe buloba to. Pa nànkù cìvwà ne cyà kwikala cyumvwije mudyanjidile, anyi—anyì dilwa dikwàbò dicìlwalwà dyà Yone . . . anyì dyà—dyà Eliyà. Mmwòmò anyi? Bwalu Wàkamba ne: “Nèntumè Eliyà, ne Nèngiikale ne cyà kwòsha buloba bujimà, nènkù Nèmbùkezùle, ne nenwènde pa butù bwàbò.” Aci's ke Bukalenge bwà bidimu cinunu, aci kaayi tudi bacimanyè. Paanyimà pàà bòmbè bwà mushìndà humanè kubùtaayisha mu tupesetupese,

dìbà adi nekwikale. . . buloba nebùlongoloke. Nènku nekwikale Ditùkù dinène pa buloba apa, ne Èkèleeziyà neàkòòkeshè ne Yesù pa buloba munda mwà bidimu cinunu. Ncyà bushùwà anyi? “Kàdi kumpàla kwà Ditùkù dinène ne dyà dikwacisha bwòwà dyà Mukalenge adi, pààtaayishiibwabo, Nènùtuminè Eliyà mupròfetà.” Mmwòmò anyi? Pa nànkù kabìvwa biswa kuumvwija ne n’Yone Mubàtiji mu ngiikadilu awu to, bwalu Ditùkù dyà dikwacisha bwòwà dyà Mukalenge kadìvwa dìbà adi to, bidimu binunu bibìdì bitùùke. Ncyà bushùwà anyi?

⁷⁶ Mpindyewu, tàngilàayi mvensà udi ulonda awu. Nènku bu nwènù mwà kwikala bàà nyumà menemene mpindyewu; mpindyewu, eci’s mmukàndà wà dinanga, ne bìdì bikèngela nwènù kuwùbadila munkaci mwà milongo nènku dìbà adi nebyumvwike bimpè. Nudi bamanyè cìndì njinga kwamba aci. Vùlukàayi mùmvwà mwambè, Mufundu ne: “Yesù wàkasàkidila Nzambi bwalu Yèyè ùvwa muWùsokòke beena meeji (ku mèsù ààbò) ne batàlame, muWùbuulwile bânà bakesè.” Mpindyewu, ntu misangu yònsò mfwànyikija ànu mùtù mukàjàànyì pàtùye umfùndila mukàndà; Ndi mwà kumòna cidiye wamba mu mukàndà, kàdi ndi mbala munkaci mwà milongo bwà kumanya cidiye muswè kwamba, nwamònu’s, bwalu ndi mumunange ne ndi—ndi mumanyè ngiikàdilù wendè. Nènku bìdì bikèngela ùmanyè ngiikàdilù wa Nzambi ne ùMunange, dìbà adi Mifundu yìdì yìvwijiibwa yà bushùwà kùdì. Yèyè ùdì ùCibuulula.

⁷⁷ Mpindyewu, tàngilàayi mvensà udi ulonda awu:

Ne yèyè neàkudimùè myoyi yà baataatù kùdì bânà,
(Mpindyewu, tàngilàayi.) *ne myoyi yà bânà kùdì*
baataatù, . . . (Nwamònu anyi?)

⁷⁸ Mpindyewu, pààkalwà Yone bu Eliyà, wàkakùdimuna myoyi yà beena Izalèèlà, myoyi yà bânà bàvwà dìbà adi bìitaba mukenji wendè, myoyi yà baataatù kùdì bânà. Kàdi pàlwalwàye ewu musangu, neàkudimune myoyi yà Èkèleeziyà kuyàaluja kùdì baataatù bàà ku Mpenta. Nwamònu’s, bìdì mùshindù anyi mukwàbò mwaba awu. Nwàcyùmvù anyi? Mpindyewu, Cibalàayi’s!

⁷⁹ Mpindyewu, tèèlejàayi ne ntèmà mpindyewu:

Ne yèyè neàkudimunè myoyi yà baataatù kùdì
bânà, . . .

⁸⁰ Mwakwidi mukùlumpe wa ngiitàbijilù yà cyena kale; neàbàmbilè ne: “Mòna’s, Nzambi ùdì ne bukolè bwà ku mabwe àdì kaaba aka aa kujuudila Abraham bânà. Kanwènaayikù nwela meeji ne nudi mwà. . .” Nwamònu anyi? Mpindyewu, neàngate myoyi mikàyàbale yà baakwidi bakùlumpè bàà ngiitàbijilù wa cyena kale abu ne kukùdimuna myoyi yàbò ku Diitabuuja òvwa naadi bânà kaaba aka. Nwamònu’s: “Mpindyewu, aba bwònsò bààkabàtijiibwa ne bàdì bindile dilwa dyà Maasiyà abu. Nganyi udi munudimwije, nwènù

ndelàngànyì yà nyòka yà ntòòkà eyi, bwà kunyeema ciji cìcilwàlwà?” Kaa, ekèlekèle! Nudi numòna ne: “Ùwva ùkudimuna myoyi yà baataatù kùdì bânà.”

⁸¹ “Ne myoyi yà bânà kùdì baataatù.” Mpindyewu, pààlwà Eliyà munène ewu mu ndekeelu wa cikondo eci, yèyè neàngate Mukenji wa Mpenta bwà kukùdimuna bânà ku Diitabuujà dyà baataatù, bwalu neàbàtandishe bwà mùdibo kabàyi balamè Diitabuujà dimwèdimwè edi dyàkadiku kale wàwa ku cibangidilu. Amen! Mpindyewu, ngèela meeji ne tudi bamanyè bîmpè menemene ne neciikalè Eliyà. Kí mmwòmò anyi? Mpindyewu tudi bacimanyè.

⁸² Ne cidi ne...Mpindyewu nudi numòna's, Ditùkù dyà dikwàcisha bwòwà dyà Mukalenge kí ndyanji kulwa to. Ntu ndikonka misangu yònsò ne: “Muntu ewu mmufwànyine kwikala muiishi, díbà adi anyi?” Eliyà wàkenza bishimà byònsò, kakùyi diyiisha to. Kàdi pàvwà Nyumà wendè, pambidi pàà Yone, wàkenza diyiisha dyònsò kàdi cishimà nànsha cimwè. Bwà cinyi? Yesù ùwva ne cyà kumulonda, Ùwva mwà kwenza bishimà: “Bwalu Díbà dyà bwakàne nedijuuke,” mwàkambaye, “ne dyondopa mu mapwapwà àadi.” Pa nàнку Yone kàvwa ne dijinga dyà kwenza bishimà to, wàkamanyisha ànu dilwa dyà Kilstò. Nènku bwòbò . . .

⁸³ Mpindyewu, vùlukàayi ne, ne Yone ewu . . . anyi Eliyà wíkala mwà kulwa ewu, nebàmúmvwè bibì, neikale muntu munène wa bukolè kumpàla kwà Mukalenge mu mùshindù wà bantu beela meeji ne yèyè mene ke Maasiyà.

⁸⁴ Bwalu balundà bèndè bàà batàmbe bwîmpè bààkamwambilà ne: “Wèwè ki Maasiyà awu.”

⁸⁵ Yèyè ne: “Mémè ncyèna mukùmbànyine bwà kusùlula bisàbaatà Byèndè to, kàdi Yèyè ùlwalwa paanyimà pàànyì apa!”

⁸⁶ Bwalu bàvwa munkaci mwà dindila ne myoyi yizùka, díbà adi, bwà kumòna Maasiyà, bààkadyàmbidila ne Maasiyà ùwva ulwa . . . Pààkamònabo bwalu bwà cikùmà bunène ebu bujuuke munkaci mwàbò, kwambabo ne: “Yèyè ke Maasiyà awu.”

⁸⁷ Yone wàkamba ne: “Mémè ncyèna Yèyè awu to! Kàdi Yèyè ùlwalwa paanyimà pàànyì!”

⁸⁸ Kaa, ekèlekèle! Nwàcyùmvù anyi? Pa nàнку balundà bèndè bàà katàpùlù katèkà nebéle meeji ne m'Maasiyà.

⁸⁹ Mpindyewu, mònayì cìkwàbò cintu cyènzeka, ngiikàdilu wa cyòci eci, yèyè neàlwe ànu kumpàla menemene kwà Ditùkù dyà Mukalenge. Mpindyewu, buloba kabùtukù bwòshike mu matùkù à Yone to, nàнку mmu matùkù àcìlwalwà. Pààkalwaye musangu wà kumpàla, wàkayiiisha ànu cyanààna; musangu mwibìdì, yèyè—yèyè neènzè byònsò bìbìdì kuyiisha ne kwenza bimanyinu bilaya kùdì Yesù Kilstò. Èyo, mpindyewu,

tùtàngilàayi ngiikàdilù, cùikalèye, ngiikàdilù wa mupròfetà ulwálwa awu.

⁹⁰ Mpindyewu, tudi basànkishiibwe ne mwanjèlò wa cikondo cyà ndekeelu cyà èkèleeziyà eci, ùvwa mudyànjila kwamba kuumukila mu Dipungila Dikùlukulu; mpindyewu, bakwàbò abu kabàvwa bóbò badyànjila kwamba to. Pòlò, Irénée, kabàvwa badyànjila kwamba to. Kàdi cikondo cyà ndekeelu eci, ku ndekeelu kwà dikumbana dyà maalu wònsò, ndekeelu wa buloba, neciikale cikondo cyà mikùùkùkù citùdì naaci ànu kumpàla kwètù eku, mu mùshindù wà ne mwanjèlò wa eci cikondo ùvwa mudyànjila kwamba kacya kale wàwa mu Mifundu, Mifundu yà Kale, ku ndekeelu wa cikondo eci. Ng'Elìyà, mulaaba munène awu.

⁹¹ Mpindyewu, tàngilàayi! Ngiikàdilù wa mùshindù kaayi wíkala nendè Elìyà? Dyàmbedi, yèyè neikalè mupròfetà wa bukòlè wa lulamatu ku Díyì dyà Nzambì, bwalu Elìyà ùvwa ne lulamatu, ne Yone ùvwa ne lulamatu. Ncyà bushùwà. Wenza bimanyinu ne maalu à kukèma, neàlujè myoyi yà bânà ku Diitabuuja dyà baataatù bàà ku Mpenta. Neàkine màngumba ànu mùvwa Elìyà muàkina amu. Ncyà bushùwà, neenzè nàнку! Ngèèla meeji ne tudi bamutwàdijile mudimu mpindyewu; s'ke cikondo cyà yèyè kulwa eci's. Yèyè neàkine màngumba! Elìyà ùvwa muàkine, nènku ki mùvwà kàbidì Yone mukine dìngumba.

⁹² Yone wàkamba ne: “Kanùlù to, nwela meeji ne: ‘Mpindyewu tudi ne Abraham bu taatù wetù.’ Nwènù Bàfaalèsà ne Bàsadokà, nwènù musumbà wa nyòka yà ntòòka nwé! Nyòka yà mu bisoosa,” mèyì makwàbò. “Bwalu nyáwù nnwambila, Nzambì ùdi ne bukòlè bwà kujjudila Abraham bânà ku mabwe aa.”

⁹³ Elìyà wàkamba ne: “Bwònsò mbapàmbùke, muntu yònsò wa kùdìbò! Kì nkushààle muntu to ànu mèmè nkààyaniyì.” Kaa, ekèlekèle!

⁹⁴ Yèyè neàkine kàbidì bakàji bàà maleela! Elìyà wàkabàkina: Izàbèlà. Mmwòmò anyì? Yone wàkabàkina: Helodiàsè. Bapròfetà bwònsò bàbidì abu, Nyumà, Nyumà, Nyumà umwèumwè awu. Bààkakina bukwà-màngumba, èkèleeziyà wa pa buloba. Bààkakina, kàbidì, bakàji bàà maleela, bàà babì abu. Bwòbò . . . Cintu kampànda mu nyumà wabò cyàkeela lubilà cipiisha cintu aci's! Izàbèlà wàkenda ùkèbangana ne mutù wà Elìyà ne ùvwa ne cyà kuwùkosa; ne wàkakosa kàbidì mutù wà Yone, Helodiàsè awu's. Bùbidì bwàbò!

⁹⁵ Mupròfetà ewu neikalè munangi wa cipèèlà! Bu Elìyà, yèyè ùvwa musòmbèle mu cipèèlà, nkàayendè. Yone, mu cipèèlà, nkàayendè. Dìbà adi tudi bamanyè ne neciikalè Elìyà. Èyo.

⁹⁶ Ne mupròfetà ewu neikalè umwe wíkala mwà kushààla ne Díyì dilelèlè dyà Nzambì. Èyowà, yèyè neàshaalè naaDì, Díyì dyònsò. Bwà kwenza cinyi? Bwà kwakajulula Diitabuuja (ku èkèleeziyà wa Efèsò) divwà dijimija cikondo cyònsò eci,

Diitabuuja, mu èkèleeziyà ùvwa ne “Ciibi cyunzulula” citèeka kumpàla kwèndè kàdi kuCibenga.

⁹⁷ Kî mmutnu mulonge mukàndà to. Eliyà kàvwa muntu mulonge mukàndà to, mwena Tiishibà awu. Yone kàvwa muntu mulonge mukàndà to. Luukà 1:7, Bible mmwambe ne yêyè ùvwa... “Mwànà awu ùvwa munda mwà...mmwenze ànu ùlediibwa, kuyaye mu cipèèlà, ùvwa mu cipèèlà too ne ku ditùkù dyàkaleejiibwàye kùdi Izàlèlèlà.” Ncyà bushùwà. 1:... Luukà 1:7 too ne ku mvensà wa 80, panwikala baswè kucifùnda.

⁹⁸ Mupròfeta ewu neikale muntu wa cilunji cyà buumfiikààmùndà. Eliyà, paanyimà pàà yêyè mumane kwenza disangisha dinène, muntu nànsha umwe kàvwakù mwà kupetangana nendè to. Eliyà ùvwa ne mabika ne mala. Pààkapatukàye kuntwaku ne kutùulula kapyà mu dyulu ne kwoshaku byoshelu byà Baalà ne bikwàbò byònsò, wàkapatuka kubwela mu cipèèlà e kwambayè ne: “Mukalenge, ncyèna mwimpè mutàmbe baataatù bàanyi nànsha, mfwè nànsha kufwà.” Ncyà bushùwà anyi? (Ne Yone...) Yêyè—yêyè wàkasòmba mwinshi mwà kacì kàà mupenga, ne paanyimà pàà ditàbuluja dinène, mpindyewu ùvwa muswè kufwà.

⁹⁹ Nènku Yone, pààkamwelabo mu bulokò (mukàji wa maalu mabole ewu) wàkasòmba mwaba awu ne kubanga kubìnduluka. Ngèèla meeji ne ùvwa m’Pember anyi umwe wa ku bwòbò wàkamba ne: “Mèsù èndè à mukanku awu kubwicidilawù, mu bulokò amu.” Kutùmaye bàmwè bàà ku bayiidi bèndè.

¹⁰⁰ Nènku, mòna’s, yêyè ùvwa mwakule patòòke, mwambè ne: “Wàwa ki Mwànà wa mùkòòkò wà Nzambì udi uumusha mpèkaatù wa bàà pa buloba.” Yone kumòna Dikunji dyà Kapyà dilembèlèle pamutù Pèndè, bu mùdi Nkuci amu, dipweka, dishikama pambidi Pèndè. Kucijaadikaye cyònsò, ne kwamba ne: “Wàwa ke Mwànà wa mùkòòkò wà Nzambì!” Ki yêyè ne: “Bidi bikèngela bwà mèmè kubàtijiibwa Kùdi, kàdi bwà cinyi Wèwè udi ulwa kùndi?”

Yesù kwamba ne: “Itàbà bwà bìikale nàнку mpindyewu.”

¹⁰¹ Kàdi pààkamwelàbo mu bulokò, pèndè kumba kushààla mwena dibungama ne lùkàsà lwònsò. Nwamònu’s, bìdi ànu bu bikolè’s, mbikolè bwà kudipetululaye. Nènku pààkenzabo nàнку, kwambaye ne: “Ndaayi nukaMwebèjè ní n’Yêyè Awu menemene, anyi nebikèngele bwà twètù kwindila mukwàbò bwà kulwa?” Ànu mwàkenzà Eliyà amu menemene, nwamònu’s, ànu byà mwomùmwè.

¹⁰² Yêyè, muntu wa cilunji cyà bumfiikàmùndà, nàнку tudi tumuumvwila luse bwalu tudi bamanye ne ciine aci ncinì. Èyo.

¹⁰³ Mpindyewu, mpindyewu ku...È—èkèleeziyà, ku dimwèneshiibwa dyèndè...Mbimpè ndekele aci’s. Ku dimwèneshiibwa dyèndè, Èkèleeziyà awu—awu... Pààdimanyishaye, Eliyà wa bukolè wàtùtùmina Nzambì

awu, pààdimanyishaye bu mwàkadimanyisha Eliyà amu, Èkèleeziyà ùkaavwa mudilongolole bwà kupikudiibwa, ùvwa mupikùdìibwe ku byanza byà cimpààngaanù. Mmwômò anyì? Ànu pààkajuukàye kuntwaku e kwamba ne: “Netùjaadikè ne nganyì udi Nzambi,” Eliyà wàkapikula Èkèleeziyà. Nènku Yone, ànu mwà kenza Yone amu, wàkamba pààkamònaye Yesù, kwambaye ne: “Ndi ne cyà kupweka ne Yèyè ùdi ne kubàndà.” Yone wàkabanga kuyiisha, wàkadimanyisha pabwìpì menemene ne dilwa dyà Mukalenge. Ànu ku ndekeelu mene, dimwèneshiibwa. Èyo.

¹⁰⁴ Mpindyewu, tudì tujandula ne Eliyà ùdi ne cyà kumvwija cikondo eci kùdì Èkèleeziyà ewu. Bwà kujaadika ne ùvwa ng’Eliyà: Eliyà paanyimà pàà yèyè mumanè kufila cipròfetà cyèndè, Eliyà kàvwa ne cyà kufwà to, wàkatentemunyiibwa ne wàkambwibwa mu Dyulu; cifwànyikijilu cyà Èkèleeziyà (ku ndekeelu kwà Eliyà wìkala mwà kulwa awu, ku ndekeelu kwà cikondo *cyèndè*), Èkèleeziyà neayè mu Dyambwibwa, kàyì ùpicila mu mindìmbì yà lufù to. Necìkalè Dyambwibwa! Ngèèla meeji ne Eliyà munène, udi ne cyà kulwa awu, neikale Eliyà mulaaba udi mwamba mu cipròfetà bwà matùkù à ndekeelu awu. Amen! Ngèèla meeji ne yèyè neikalè, pààlwàye, mwanjèlò, anyì mùsànjeela kùdì èkèleeziyà mu matùkù à ndekeelu (cisàmbà cibèngùibwe, cipwekèshiibwe milongo, bu mwikalà èkèleeziyà ewu mwà kubwelamù, ne ùkaadimù mene). Ngèèla meeji ne Eliyà mmulayiibwè mu Bible. Ngèèla meeji ne tudì mwà kuumvwa aci, ne Eliyà ùvwa ewu wàkalayiibwa mu Bible bwà kulwa ditùkù edi awu. Nudi nwi tabuuja aci anyì?

¹⁰⁵ Mpindyewu, twàlukilàayaaku mpindyewu ku Laòdìkiyà ne netùmonè cìdì Mukalenge wetù ne cyà kutwàmbila dilòlò edi bwà Laòdìkiyà, Laòdìkiyà. Èyo, mwoyi mwela èkèleeziyà:

... kùdì mwanjèlò wa Mukalenge. . .

¹⁰⁶ Mvensà wa 14 wa nshapità mwi3 wa Bwàkabuulwibwà:

... fùndila mwanjèlò wa Mukalenge. . . wa. . . beena Laòdìkiyà; Maalu aa ke adibo bamba kùdì Amen, ntèmù wa lulamatu ne mulelèlè, ne cibangidilu cyà bufùkì bwà Nzambi;

¹⁰⁷ Kaa, ekèlekèle! Tudì ne byònsò. . . Bu twètù mwà kushàalapù bufùku bujimà ànu pa bwalu ebu, mùshindù mene ùdi Mukalenge mufwànyine kutùbuulwila’s wè! Tàngilàayi’s!

¹⁰⁸ “Amen” ki wa “Ndekeelu.” Yèyè mmumwènèkemwènèke mu bikondo byònsò too ne ku ndekeelu, ne bintu bishiilèshiilàngàne, kàdì’s ke cikondo cyà ndekeelu cyà èkèleeziyà eci mùdìbo bamba ne: “Ndi. . . Eci’s ki dijikija, Ndi wa Ndekeelu.”

¹⁰⁹ Mpindyewu, bwà kuleeja ne Yèyè ùvwa “Wa kumpàla” kàbìdì, mùvwàYe amu, Yèyè ke “cibangidilu cyà bufùkì bwà Nzambi.” Kaa! Nudi nuCyùm vwa anyì? Nwamònu anyì? Mmunyì mùdì Nzambi mwà kwikala mufùkibwe piikalàYe

ùdi Nyumà? Mmunyi mùvwàYe mwà kwikala nàнку? Yéyè—Yéyè ùdi wa Cyendèlèlè! Yéyè kààkafùkiibwakù to, Yéyè kààdyàkufùkiibwakù to, bwalu Yéyè ùvwa Nzambi ku cibangidilu. Kàdi Yéyè udi “cibangidilu cyà bufùki bwà Nzambi” ùvwa n’Yesù Kilistò pàvwàYe mumwènèshìibwe, pàvwà Nzambi musòmbèle munda Mwèndè. Yéyè ki *bufùki* bwà Nzambi! Kaa, ekèlekèlè! Nwamònu’s: “Wa Kumpàla ne wa Ndekeelu; Amen, cibangidilu cyà bufùki bwà Nzambi.” PààkaDifùkilà Nzambi mubidi, Wàkapweka ne kulwa kusòmbelamù, ki cibangidilu cyà bufùki bwà Nzambi ncyòci aci. Nwamònu anyi? Kaa, kî mMulenga anyi?

¹¹⁰ Mpindyewu, tudi tusangana dyàmbedi ne, Wàkaleeja Bunzambi Bwèndè *kaaba aka* mene ne: “Mémè ndi wa Bukolè bwònsò! Mémè ki Yéyè Wàkadiku, Udikù Awu, ne Wàlwa. Wa Bukolè bwònsò!” Wàkacyàmbila èkèleeziyà wa Efèso, misangu yisàtù. Mmwòmò anyi? Ùlwa buludi too ne ku Laòdikiyà wàmba ne: “Ndi Amen. Mvwa wa Kumpàla lwà *mwab’ewu*, Ndi wa Ndekeelu lwà *mwab’ewu*. Ne Ndi cibangidilu cyà bufùki bwà Nzambi. Mu bikondo byà èkèleeziyà bidì bikèngela bwà twètù kwikala naabì, nenùyiile ne Mémè ndi Nzambi, Nzambi mufùka mu mmwènèkelu wa muntu. Mémè ndi cibangidilu cyà bufùki bwà Nzambi!” Amen.

¹¹¹ Aci’s ncifwànyine kufikisha Presbytèrien ku dyela mbilà. Anji elààyibi meeji bwà bwalu abu! “Cibangidilu cyà bufùki bwà Nzambi.” Mpindyewu, ndi. . . Kaa, mùshindù mwine wùndi munange aci’s cyà ne: “bufùki bwà Nzambi,” pààkafùkiibwa Nzambi, pàvwà Nzambi muvwijìibwe mubidi mu Yesù Kilistò ne musòmbèle munkaci mwètù.

¹¹² Mpindyewu—mpindyewu, mvensà udi ulonda mmufwànyine kwikala (bwà èkèleeziyà mikwàbò) ùtwa makùmbù, kàdi Yéyè kèna ùtwa èkèleeziyà ewu makùmbù nànsha. Yéyè ùvwa ne didyùla bwà bwalu bwèndè, kî ngùmùtwa makùmbù nànsha. Kàvwaku mwà kutwà ewu makùmbu bwà bwalu nànsha bùmwe to, cikondo cyà Laòdikiyà eci. Ne Bukènkè bwònsò bùvwàbo naabù abu, ne kwalukidilaPù, kabàvwa bakùmbànyine ditwà dyà makùmbù nànsha dyà kànà to. Uh-huh. Bìvwa bìkèngela kubàtàndisha, kàdi ki bòbò kwakanagana naadi’s wè! Yéyè ùvwa ne didyula bwà èkèleeziyà ewu, kî nditwà dyà makùmbù nànsha.

¹¹³ Mpindyewu ndi muswè kubala mvensà wa 15 ne mvensà wa 16 kaaba aka mpindyewu:

Ndi mumanyè byenzedi byèbè, . . . wèwè kwèna ní nku mashika ní nku luuyà to: mvwa kuswa bwà wèwè kwikala ku mashika anyi ku luuyà. (Mu ngaakwilù mukwàbò ne: “Kwikadi—kwikadi ànu civùmvù to.”)

Nàнку dìbà adi bwalu wèwè udi civùmvù, ne kùyì ní nku mashika ní nku luuyà, nènkutwìle mukana mwànyì. (Hmm!)

114 Mémè kwela meeji ne... Aci nditwa dyà makumbu anyi? Aci's nditandisha dyà cikondo cyà Laòdikìyà cidi kaciyi cineemeka Nzambi eci, citambe bubì cyà ku byònsò. Byònsò bikwàbò abi mu mayooba ne byònsò byàkapìcilabi abi; kabàvwa ne kantu nànsha kàmwè to, bāvwa balandike ne ku ménù, bàlálakana bavwàle bisèbà byà mìkòòkò ne byà mbuji, ne bapòòpòdìibwe, ne bakòshìibwe ne scie ne bwòsha babutula, ne beelela nyama yà ntambwe, ne bikwàbò byònsò, kàdi kacya ànu bààkwàta ku Diitabuuja. Kàdi ewu musumbà wòwù wùdi “mubanjì ne kawùyi dijinga ne cintu nànsha cìmwè,” ne bikwàbò byònsò, ne ndumbà! Ncyà bushùwà.

115 Mpindyewu, tudi ne dileesònà dinène dyà menemene, ndi ntékemena bwà ne Mukalenge àtùkwàcìshèku. Yèyè—Yèyè kwamba ne: “Bwalu kwèna ní nku luuyà ní nku mashìka, mwikale civùmvù.”

116 Byenze bu mabèèle, nwamònu's. Mabèèle mimpè matalàle atù mimpè. Kí mmwòmò anyi? Mabèèle à luuya mmimpè bwà mubidi. Kàdi mabèèle à civùmvù neàkulùkishè.

117 Ndi mvùluka ne dilòòlò kampànda ngakasaama, ku musùlu kwàka, kùkaadi bidimu bìipacila ku makùmi àbìdi ne bitaanu nànkù. Mvwa nsanganyibwa mu katuntatunta kàà kazùbu kacỳòke, musòmbelemù. Mémè kusaama, ne kulwaboku, bukwennda bwànyì ùvwa muye naanyi kwà Ngàngàbuka Isler. Yèyè ne: “Bwalu bùdi bishi?”

Mémè ne: “Cifù cyànyì cidi cìnsaama bikolè be!”

118 Yèyè ne: “Nwakukù ngalasa wa mabèèle à cyuyuyà.” Kaa, mwanèètù! Mabèèle à civùmvù, atù angendesha ku mwoyi, ki mèmè kuàlùka ànu wònsò ne byònsò bìvwà munda.

119 Mpindyewu, Nzambi kwamba ne: “Mvw'a kuswa anyi nwikale ku luuyà, ne luuyà lukolè lwà ngwèng, anyi mukwàte mashika à dibwe, kwikala eci anyi cikwàbò. Kanwikadi civùmvù to, bwalu nudi nuNgendesha ku mwoyi.”

120 Ki cidi cikondo cyà èkèleeziyà ewu cyènzela Nzambi, cìMwendesha ku mwoyi! Nwamònu anyi? “Anyi udi... Kuteeci... Any-... kuteeci kwikala wà lwà ngwèng-... Anyi ikala ku luuyà lwà ngwèng anyi... Kuteeci kwikala wa civùmvù nànsha! Cyuyuyà anyi luuyà, bwalu udi uNgendesha ku mwoyi.”

121 Dikwàcika dyà mashika dikolè dyà èkèleeziyà wa ba-Anglicans mu matùkù à John Wesley dyàkamufikisha ku diya kenza masangisha mwaba mu kwàbò, bwalu ùvwa ne mashìka, mu kwàcike mashika makolè.

122 Dikwàcika dikolè dyà mashika dyà èkèleeziyà wa ba-Méthodistes dyàkafikisha William Booth ku dilwa muyiishi wà lupàndù wà luuyà lukolè lwà ngwèng. Nudi numòna ne Nzambi wàkamba ne: “Nwènu kanùyì balwe kunyingalala

to, Nèngùumushe citèekedi cyà mwëndù pa mwaba wàci. Nèncyumùshe, kucipèesha mukwàbò muntu.” Nàнку pààkabenga èkèleeziyà wa ba-Méthodistes bwà kwakidila dijidiibwa dyà John Wesley, William Booth kujuukaye ne Armée du Salut kutungunuka naadi. Ncyà bushùwà. Bwà cinyi? Bààkacivwija bulongolodi! Aci's mmwômò menemene. Kucivwija bulongolodi, ki Nzambì kwamba ne: “Ndi mukine cintu aci!”

¹²³ Nàнку awu ke . . . William Booth kupàtukaye ne kucyàngata, ke Armée du Salut awu, dîbà adi civwaye mufwányine kwenza ncinyi? Cintu cimwècimwè aci, kukùdimuka e kucivwija cyàkàbìdi bulongolodi. Paanyimà pèndè kulwaku beena Campbell, ne kushàalabo katanci nàka; ne pashiishe John Smith ne ba-Baptistes; ne pashiishe paanyimà pàà cyòci aci kulwakù ba-Nazaréens; ne pashiishe paanyimà pàà ba-Nazaréens kulwabò kùdi Mpenta.

¹²⁴ Ba-Nazaréens, Cyàkenzàbo ncinyi? Kwenzabo cyàbò aci ànu mùshindù ùmwèùmwe awu, kucivwija dingumba.

¹²⁵ Cyàkalwà ncinyi mu cikondo aci? Mâpa makesè àbìdi, Église de Dieu ne bikwàbò, kupàtukilabi muntwamu. Bààkenza cinyi? Kudyènta bulongolodi; kubàlekela ànu baya batungùnuke.

¹²⁶ Kulwaku beena Mpenta ne mvùla mishìishè yà dibènesha, cyàkenzabo ncinyi? Kudyènta bulongolodi, ki Yèyè kubalekela bàtungunuka. Ncyà bushùwà.

¹²⁷ Mpindyewu netùfike kwìnshì eku kundekeelu, nudi nupeta cintu kampànda cyà cìkolè menemene mu katanci kakesè emu. Èyo.

¹²⁸ Èyo, Yèyè mmuswè bwà wìkale ku luuyà lukolè lwà ngwèng anyi—anyi ku mashika à dibwe, eci anyi cikwàbò. Kwikadi civùmvù to! Kudidìngi kwela meeji ne udi cintu kampànda cyùdi kùyì naaci to, anyi kwikala ku kapyà bwà Nzambì anyi kwalukila mu—mu—mu bulongolodi. Kwikadi—kwikadi civùmvù to!

¹²⁹ Ncintu cimwècimwè aci mpindyewu! Ki cintu cimwècimwè aci kwenzekaci mu . . . èkèleeziyà eyi kaaba aka. Yèyè mmuswè wìkalè anyi ku luuyà anyi ku mashika. Kì mmusweku wa “civùmvù nànsha.” Aci's ki kùdi Mpenta mukafikè, ngiikàdìlù wa civùmvù. Bàdi balenga pyàno ku musangu ne musangu, ne biine abi ne ndambù wa ngoma, kàdi kwenza ndambù wa mutooyi katanci kakesè; ne bapeta mijiki mikùmbàne, muntu kampànda ujuuka ne mùshindù wà . . . nudi bamanye's, dyakula dyà mùshindù bu wà ne: “Mukalenge àtumbe! Àlèluuyàh!” Uh-huh. Ki mùjiki mwangatangàne ne: “UH, Uh, uh, uh,” ànu nàнку awu's. Kaa, ekèlekèle, cidi cyendesha ànu Nzambì ku mwoyi Kwèndè! Nwamònu anyi? Uh-huh. Èyo.

¹³⁰ Kakwèna nànsha cyànsongo cidi cyenzeka dîbà adi to, bwà—bwà bìdi bitàngila ditabuluja dyà luuyà lukolè lwà ngwèng

dyenzeke munda mwàbò, kàdi bàvwa ànu ne byamu byà bivuma búngì kabùyi kwamba mu èkèleeziyà amu, nudi numòna's, bwalu bàvwa babanji ne, kaa, ekèlekèle, bàvwa munkaci mwà kudiſanga ne bènza masangisha manène ne bikwàbò byònsò. Bàvwa munkaci mwà kucyònkòmòka mu èkèleeziyà ewu, bwà aci kaayi ncilelèlè, kàdi's mbyamwamu byà bivuma cyanààna. Kàdi kakwènàkù luuyà lwà Nyumà Mwîmpè to. Nwamònu anyi?

¹³¹ Tàngilàayi mwab'ewu cyàkambàYe mu mwaba ewu, nwamònu's:

Ndi mumanye byenzedi byèbè, . . . wèwè kwèna ní nku mashika ní nku luuyà: mw'á kuswa bwà wèwè kwikala ku mashika anyi ku luuyà.

Kàdi *bwalu wèwè udi civùmvù, . . . kùyi ní nku mashika ní nku luuyà, nènkutwile mukana mwànyi.*
(Nwamònu anyi?)

¹³² Mpindyewu, Wàkamba ne: “Mvw'á kuswa wìkale ku mashika anyi ku luuyà. Kàdi bwalu kwèna nànkù to, nebikèngele bwà Mémè—Mémè—kukulekela, kwàjiki, kukukùpula ànu mukana Mwànyi.”

¹³³ Mpindyewu, bàvwa ne mfrangà búngì cyanààna, bàvwa ne nzùbu minène, bàvwa ne bintu binène byènzeke, kàdi kabàvwa ne luuyà lwà Nyumà Mwîmpè nànsha. Kaa, bàvwa ne byam- . . . n—ndongolwelu kampànda. Kaa, ekèlekèle! Bàvwa ne èkèleeziyà mudisange pàmwè, balumyàna wa yààyà, bàvwa ne nzùbu mitambe bunène yà kacya ne kacya, ne bintu munkaci mwà kwènzeke, kàdi Nyumà Mwîmpè nànsha wa mafi. Nwamònu anyi? Ki cidi Nzambi mutùme bwà Èkèleeziyà, Nyumà Mwîmpè.

Mpindyewu, patùdi tutùngunuka mu mvensà wa 16 ewu apa.

¹³⁴ Bàdi ne tusùmbù twà mîshindù kanà yònsò. “Kaa, tudi ne ndongolwelu munène wa cyòci aci. Cisùmbù cyà bainábànzà banunu cyà dyambulwishangana, ne di—dinaya dyà baansòngà dyà ambùlè mfùmù ùdye mbonga, ne—ne dinaya dyà mubèlè mu diitaanu dilòlò, ne di—dinaya dyà ndundu wa bibòndu mu dyàlumingu mu mapingaja, ne, kaa, dinaya dyà ndundu wa byanza mu ditùkù *kampànda*. Nènku, kaa, tudi tufuma kudyenza kasùmbù kàa muyiiki wà bantu balùme. Kàdi, kaa, tudi ne bintu byà mîshindù yònsò.”

¹³⁵ Ndi nnwambila ne, mmukùngwije mushiki wà, tusùmbù, ne tunsànkì, ne baamùyàpàndi, ne binganyì bikwàbò, kàdi luuyà lwà Nyumà Mwîmpè nànsha lwà mafi. Nwamònu's, cinùdi naaci ndongolwelu munène, kàdi kanwenamù ne cintu cidi mwà kufila luuyà to. Nudi nudinàngulula ku maalu à buloba kàdi kî nkùdi Nzambi to, ki bwà cinyi nudi civùmvù.

¹³⁶ Kaa, nudi ne bidimba bipite ne binùvwà naabi kwònsò eku. “Bushùwà's, mulumyàna! Mòna's, tudi bapete mùliyò mukwàbò mutenteka mu cidimu cyà 1944,” ki mùdi ba-Baptistes

bàmba. Kàdi—kàdi cinùdì naaci ncinyi? Mushikì munène wà byamwamu!

137 Ànu mu èkèleeziyà umweumwe mungààkumvwa bàmba bwalu ebu, bivwa bikèngela banji kutangalaka mu tusunsa dikumi, bwà kupèèsha mpaasàtà mpùngà wa kupàtukakù, ne balami bwònsò ne bwònsò bwàbò abu, bwà kunwàku mfwanka, ne kubwela kàbìdì. Nwamònu anyi? Ki bwalu mbwòbù abu's. Mbitòòke tòò ne Bible ùdì ùpiisha bintàkanyi abi! “Wèwè ukooyisha mubidi ewu. . .”

138 Bangàngàbukà bàdi bàcìpiisha bàmba ne: “Cìdi ne kansèrè ntèntè.” Pashiishe bàyaaya ku cisanji bàmba ne: “Kataacilu kàà muntu udi wela meeji.”

139 Bu mwàkambà Billy Graham ne: “Yèyè mmukùtākàne bwà kwela meeji mùshindù awu ku cibangidilu.”

140 “Kataacilu kàà muntu udi wela meeji,” muntu *wa wela meeji* kèna mwà kumunwàku to nànsha kakesè, ncyà bushùwà, udi wangata ngeelèlù wa meeji mwibìdì. Kàdi ùdì wambila bakàji ne cidi cibàvwija bà tunyitunyi, nudi bamanyè's, bwà bààmòna mwà kulwàta yimwè yà ku nkanzu mipyamìpyà yidìbo naayi. Balùmyànà, aci cidi cileeja's! Bakàji bààbùngì bānwanwa mfwankà kutàmba mùdì balùme bānwa mpindyewu, ne mukàji ùnwanwa mfwankà misangu yisàtù pa ùmwè, kutàmba mulùme. Ncyà bushùwà menemene, bwalu mmuswè kunyaana. Yèyè kèna ùmānya ne aci ndisaamà dyà cyàdì ne kansèrè ne bintàkanyi bìdì munkaci mwà kumuvwija nānku awu abi, ànu mu mmwènekelu wa bìcibangilaku, kàbwela munda mwèndè, kènda kāmukunya mùshindù awu, munkaci mwà kumushipa. Kakwena cintu cidi mwà kupatukamù to ànu bubì! Ncyà bushùwà. Nwamònu anyi? Kàdi aci's: “Cìdi—cidi kataacidi kàà muntu udi wela meeji.” Ha! Kaa, ekèlekèlè!

141 “To! To! Kaa,” mùdìbo bàmba ne: “kàdi twètù tudi ne. . .Mwanètù Branham, ndi ngèèla aci kadyòmbò! Tudi ne masangisha manène! Tàngilàayi cìvwa naaci Billy Graham mu ditungata dijimà.” Kaa, bushùwà, ndongolwelu munène, bàfuta batangadiki, balombodi bàà misambu bàfuciibwa.

142 Èyowà, bàdi bàfuta batangadiki bààbò. “Èè, nenùmpèeshe cinyi bu mèmè mwà kulwa kwenza ditàbuluja adi? Èè, wèwè kùyi mwà kupatula binunu byà ndola *bùngì cyakaa* to ncyàkulwakù to nànsha kakesè. Ncyà bushùwà. Nènku nganyì uwàlekela bwà kulombola misambu? Èè, uyààya kafuta *Kampànda*, mmwìmbi munène wa solo. Udi umwangata ku mudimu bwà. . . Neànkungwijile cyàbìbìdì cyà musùmbà wānyì, neàcyenze yèyè nkaayendè.”

143 Bimbi bàà solo bafuciibwa! Batangadiki bafuciibwa! Mòna's, mbikafike too ne mu cipidì cyà ne disùngila dyà misùkà dikaadi mushinga wa dyenda. Disùngila dyà misùkà kí mmushinga wa dyenda wà èkèleeziyà to, mbukolè bwà Nyumà

Mwîmpè mu èkèleeziyà. Disùngila dyà misùùkà kí...kwena udisùmba ku mfranga to. To, mukalenge! To! Cyònsò cididi, cìdi mbyenzedi, byenzedi, byenzedi, batangadiki bàfuciibwa, balombodi bàà misambu bàfuciibwa, kòralè yifuciibwa, ne bikwàbò byònsò. Nzambi kàtu muswè aci to, byònsò bidi ànu byenzedi! Nzambi kàtu muswè byenzedi to, Yèyè mmuswè Nyumà Mwîmpè àkwàcila mudimu munda mwèbè. Ncyà bushùwà.

144 Mvensà wa 17 ùdi wàmba ne:

*Bwalu wèwè udi wamba ne: ndi mubanji,...
mubanji ke bikolè, ne ncyèna dijinga ne cintu to;
kàdi kwèna mumanyè ne udi mukèngeledi wa luse,
(Kaa!)...kwèna mumanyè ne udi mukèngeledi wa
luse,...mwena dikènga,...mupèlè,...mpofo, ne
butakà: (Hmm! Hmm!)*

145 Bàvwa bèèla meeji ne bàvwa “babanji,” beena Mpenta aba mu èkèleeziyà yà cikondo cyà ndekeelu eyi. Bàdyambidila ne... Ne bàvwa bàà mmwenekelu wa kwisù. Èyowà’s, mukalenge. Mbabanji. Anji elààyibi meeji bwà èkèleeziyà, ùvwa ne ciibidilu cyà kwikala kùkaadi ndambù wa bidimu, wîmana pambèlu lwà mu ditumba, bàvwa bàlálakana bàtwa eku ne eku, bàvwa bàpicila mu cikondo cikolè. Kàdi mpindyewu bàdi ne yimwè yà nzùbu mitàmbe bunène yìdiku.

146 Nudi numòna mwaba ùdi Assemblées de Dieu yàya, yìvwà ne ciibidilu cyà kupetela mwaba mu nzùbu wa cyanààna mwenzà ne mabaya, cintu kampànda bu ewu ewu, kàdi mpindyewu bàdi munkaci mwà kwibaka nzùbu wa mìlìyò yisambòmbò yà ndola, ne bàdi bàmba: “Yesù ùlwalwa àbìdi aa.” Byenzedi byènù bìdi bijaadika ne kanwèna nwitabuuja aci to. Nduzombo! Baditwe mu kwibaka nzùbu yà mìlìyò yà ndola ne bintu byà mùshindù bu nàнку, eku nwamba ne: “Yesù ulwalwa àbìdi aa.” Kàdi baa mìsiyònèrè bakwàte ne byà luse mu budimi bwà bwambi, bapangile bisàbaata ku makàsà, baa mìsiyònèrè bàà bacìina Nzambi bulelèlè, kabàyi bisàbaata ku makàsà, kàdi bapeta losà njila yìbìdi ku lumingu; bàdya misangu yìbìdi ku lumingu bwà kutwàla Èvànjeeliyò mu meetu ne bintu byà mùshindù awu, bwà kuMutwàdila bàna bààbò. Kàdi pèètù twibaka nzùbu yà mìlìyò yisambòmbò yà ndola, ne èkèleeziyà miikale ne madidiishi manène, à mmwenu milaaba mukubu, ne bikwàbò byònsò, ne kubitèeka pa cyòci aci. Kaa, nudi mene ne mfranga mipite búngì mu mùshindù wà ne misangu mikwàbò bàdi ne tusùmbù twà disombeshangana mfranga mu èkèleeziyà yàbò ayi. Ncyà bushùwà!

147 Ngàngàbukà mwómò amu bwà kukenketa batangadiki bààbò anyi baampàndànjlà bààbò abu. Nènku muntu yèyè muswè kuya mu bwambi, bàdi bàmupicisha ku diteeta dyà ngàngàbukà bwà kumòna ní ùdi...anyì kùdì ngàngàbukà wa

mitù, bwà kumòna ní udi. . . kaa, piikalaye ne mutù wèndè ne Cipidi cyà Dimanya mu cyóci, nudi numòna's. Nyumà Mwimpè ngudi ukenketa aci, kabyèna bìkukèngela ngàngàbukà wa mitù to.

¹⁴⁸ “Kàdi, mubanji ne kàyì dijinga ne cintu nànsha címwè.” Kaa, bushùwà's. Nudi ne mfranga yìyiila ne panshì. Mmwènekèlu wa kwìsù, mabanji àyiila ne panshì; biikale ne nzùbu myalàbale, ne mmwenu myela mùkubù.

¹⁴⁹ Ne bayiishi baakudi bàà dipòkò! Kaa, ekèlekèle. Ekèlekèle, ncinwambidì, hmm, mbaakudi bàà dipòkò. Bàdi mwà kwimana ne kuyiikila bufùku bujimà, kàdi kabàyi ne cìdìbo bàmba to. Nwamònu anyi? Pàdìbo bajuuka. . . Ndi nswa kwamba ne mbwà bintu bìvwà kabìyi bìkèngela ne bàakule nànsha, nudi numòna's. Bàjuuka kuulu, ne bàmwè bàà ku cintàkanyì aci, kàdi kwakula bwà *cikampànda* cikesè ne *cikansanga* eci. Nènku's nudi bamanyè mùshindù ùtùbi awu. Bimbi bàà misambu bàfuciibwa. Ncyà bushùwà. Èyo. Kàdi, bàbanda mu cyambilu, bayiishi baakudi bàà dipòkò. Bòbò kabàyi balwàte nkooci wa kapelu ne nkoolù mujìngila mu nshingù, ne nkooci mwenzu bu udi ne mukila pambidi, mòna's, disangisha dyàbò dìdi didyùmvwu dyediibwe màyi ku makàsà.

¹⁵⁰ Ki bimbi bàà misambu abu bàpàtuka mwaba awu, bakàjì abu, ne nsuki mìbèbula mishiya mìpì bu Izàbèlà, ne mùkubù kwìsù bùngì bukùmbane mwà kufiita ku cikùmbì. Pàdìbo ànu ne bàvwùlu nkanzu awu, bàdi bàvwàla tùpùtulu ne bilàmbà byà bantu balùme, pèndè Bible mmwambè ne: “Mukàjì yèyè muvwàle civwàlù cikùmbànyine muntu mulùme, ncinyangu ku mèsù Kwèndè.” Bènda bàpweka ne mùsèèsù ne dyulu dyela muulu, mvùla yèyè mudidìnge mulòke mbafwànyine kwinyijiibwa. Ba-Izàbèlà bàà bamanyè byònsò, beena dyambu, bàà cilunji cibànde! Ki bwà cinyi katwèna ne ditàbuluja to, ncinkunkutu cyà mitooyi yà byamu munkaci mwà didilakana.

¹⁵¹ Kaa, udi mwà kwikala ne díyi bu mwàrkanjèlò, kàdi Nzambì neàkulumbùlwishè bwà bwalu abu! Ba Elvis Presleys ne bakwàbò, ne Ernie Fords, anyi ní ncinyi mene cìdìbo bàbàbìkila aci ne mèyi malenga kàdi bàkwacila naawu dyabùlù mudimu, Nzambì mmwàmbe ne: “Nèmbalòmbewu.”

¹⁵² Ki bwà cinyi ntu nneemeka mpofo Fanny Crosby; mukàjì neebè kacya katùkù mwanji kupaanyisha dipà dyèndè ku maalu à buloba to. Mmushàale mudilamine ne Nzambì.

¹⁵³ Bààbùngì bàà ku bantu aba mbimbi bàà dipòkò, bantu baakudi bàà dipòkò, bantu banène, ne bikwàbò, pamutù pàà kukwàtabò mudimu ne dimanya dyàbò bwà Nzambì, dyabùlù mmubàkonyàngàje ne mbòbò abu kuntwaku munkaci mwà kumukwàcila mudimu. Bantu, bantu bàà ku bisanji ne ku télévisiyò, bàdìsumbisha, kuntwaku bwà maalu à buloba pamutù pàà kudifila kùdi Nzambì. Bàmwè bààbò bàlwalwa

mu èkèleeziyà, baya mu èkèleeziyà, bavwàle nkanzu munène mulenga, bàpatuka mwaba awu bimba mùshindù awu, kàdi bàalukila buludi bàkimba bindundadùndà dilòòlò didì dilonda. Bù bimbi bàábwena batùdì bamanyè, bàà mu maèkèleeziyà kampànda, banji baàpatuka ne bàdikwacisha maafòtò, fòtò yà mu sèndemâ ayi, bàpàtuka mwaba awu ne bimba bidundadùndà. Banène bàà bidundadùndà, kàdi kulàka mukana kwamba mùdibò batèndeleeedi! Cintu's ndiyele dyà dyabùlù's!

¹⁵⁴ Muntu kampànda ùvwa ne ndambù—ndambù mukùmbane wa meeji mîmpè lwà kaaba aka. Ùvwa wàmba ne ùvwa ne cyà kwikala muyiishi, kujuukaye mu dindà dyà dyàlumingu e kuyiisha, ne pashìishe kupwekayè kuntwaku mu... ne kufikaye ku tudyòmà kàdi kwimba misambu yà bidundadùndà ne bikwàbò byònsò byà bu nàнку, ki ndekeelu wa byònsò kwangatayè cingoma ne kuditàayishaye bwòngò. Ndi nneemeka muntu awu bwà mwàkenzaye nàнку. Ncyà bushùwà. Ncyà bushùwà. Ùvwa—ùvwa ne byàbùngì... Ùvwa ne luumvu lukumbàne ànu muvwabo naalù kùdì ngulube ayi, twamb'eku twamb'eku, pààkabwela dyabùlù munda mwàyì yàkapweka lubilu ku màyi ne kudikùpamù. Bàmwè bantu kabèena nànsha ne byà bu nàнку to.

¹⁵⁵ Ndi mukumanye... Ncyèna—ncyèna muswè kuumisha maalu nàнку to, kàdi, mwanèètù wa balùme, mwanèètù wa bakàjì, bikèngela—bikèngela kupoopela musonso bikolè bwà kuwùfikisha—kuwùfikisha ku dikwàta bikolè! Edi ki ditùkù ditùdimu ne mwoyi edi. Ngèèla meeji ne piikalabi ne Yesù wàkabiiikila Helòòde ne “mukenge wà kale,” ne Yone kubàbiiikila ne “lukòngò lwà nyòkà yà ntòòkà,” mbimpè.

¹⁵⁶ Bàdi ne nzùbu myalàbàle, ne mmwenù myela mùkubù, bayiishi baakudi bàà dipòkò, bimbi bafuciibwa. Èyowà's, mukalenge. Cidìbo naacimu ncinyi? Cidì munda mwàcì ncinyi? Kantu nànsha kàmwè kàà Nyumà Mwîmpè. Bajuuka kuulu muntwamu ne bàpàtuka ne bavwala tùpùtulu, kàdi bàbwela kàdi kwimba misambu mu kòralè. Wèwè mwena lubombo mukwàte luse wè! Èyowà's, mukalenge. Ncyà bushùwà.

¹⁵⁷ Ne wèwè, muyiishi, wíkala mwà kuya mu disangisha bwalu bàdi bàkupèèsha mfranga yàbùngì kutàmba mùdibò bafila mu mwaba mukwàbò! Wèwè mwenzàvì, kwèna mukùmbànyine bwà kwikala mu cyambilu to. Ncyà bushùwà. Mfranga! “Wèwè kuyì mwà kutùpèèsha binunu byà ndola *byàbùngì menemene* to, èè, katwèna mwà kulwa to. Bèètù—bèètù—bèètù balongolodi bàà ndongamu ne bikwàbò nebànji kulwa, wèwè mwà kukòòkesha mfranga ayi netùlwe. Mémè nciyi mwà kupeta dyelangana dyà dibòko ne bantu bwònsò to, ncyàkulwa to. Bantu bwònsò kabàyì bàswè kungeela mu dibòko to (èkèleeziyà yònsò) bwà ngàáfwanà kupeta mfranga yàbùngì bwà kujikija mabànza àányi, ncyàkulwa to.”

158 Mwanèètù, muntu wa Nzambi mulelèlà neàye piikala Nyumà Mwímpè mumulombole, nànsha kwikale cinyi mu milàmbù. Byòbì bikèngela bwà kudyàye cisùkwità cyà mukèlè ne kunwà mâyi à ku mulonda. Ncyà bushùwà, yèyè's mmusadidi mulelèlà wa Nzambi.

159 Kàdi bantu bàdi bàdiswika ku tudyòmbà ne ku bisanji ne ku télévisiyò, ne bintu byà mishindù yònsò byà pa buloba, mu mùshindù wa ne bikèngela kupetabo mfwalanga yà mùshindù awu. Ncyà bushùwà menemene. Nwamònu anyi? Aci kî n'Nzambi to.

160 Yèyè ne: “Kaa, wèwè's udi mubanji, kwèna dijinga ne cintu nànsha cimwè.” Bushùwà, kàdi cintu cyena diinà cidì cikukèngela, kwèna naaci to. Ncyà bushùwà. Kàdi kùvwa mucimanyè to. Nwamònu's: “Mubanji, kùyì dijinga ne cintu to.” Bafuciibwa bwà kwenza bidìbo benza, banaya twarta. “Kaa,” mùdì wamba, “tudi ne masangisha manène.” Kaa, bushùwà's. Èyowà's, mukalenge. “Disangisha ditàmbe bunène! Mòna's—mòna's, nudi bamanyè's, mulombodi wa cimenga ùtu ùlwa mu èkèleeziyà wetù.” Um-hum. Ncyà bushùwà. “Èè, udi mumanyè's, *Kampànda*, pàakafikàye mu cimenga, wàkalwa mu èkèleeziyà wetù.” Um-hum. “Tudi ne bantu bamanyike bikolè bwònsò mu èkèleeziyà mwetù.”

161 Èyowà, kàdi bansantu bapèle, ne bakèngeledi bàbwelebi mu èkèleeziyà, bàdi kadiwu kunùdì. Kanwèna nànsha babàswèmu to. Nudi ne bwòwà bwà ne muntu kampànda neàmbe ne “Amen!” panùdì munkaci mwà kuyiisha.

162 Byenze bu inàbànzà mukesè mwena bwalu bungàakabala musangu kampànda mu mukàndà mukesè kuntu kwaka, wàkabwela mu èkèleeziyà kampànda. Bàna bèndè, ùvwa mubàkoleshile mu èkèleeziyà wa cyena kale lwà mu meetu mwaba kampànda mùvwàbo bulelèlà bàà difwàna dyà Nzambi. Pa nàнку ki...Nsongàalùme kampànda kubwelamù dîngà ditùkù e kusèlayè nsongàakàjì awu. Yèyè ne ùvwa wa mu èkèleeziyà wa *pambèlù*, nudi bamanyè's, umwe wa ku èkèleeziyà minènè yà dîngumba dîmwèdîmwè adi lwà mu cimenga amu. Ki kwambilayè maamù ne ùvwa mwena Kilistò. Ki kusèlayè mwanèndè wa bakàjì ne kukwàta njila kuyayè nendè.

163 Èè, ndekeelu wa byònsò kuumushishaye mu èkèleeziyà mukesè wa kale wa ku cisuku mu mikùnà amu, kupatukaye mwab'ewu, ku èkèleeziyà munène menemene, wa dîna dîmwèdîmwè adi; kàdi mwitu mwamwà bàvwa ne Nyumà Mwímpè, pambèlù apa kabàvwa ne cintu nànsha cimwè to. Ki dîbà adi pàakabwelàbo, mu èkèleeziyà munène menemene mulenga ewu.

164 Ki Maamù kwambayè, dîngà ditùkù ne, ùvwa ùlwa bwà—bwà kumòna mwanèndè wa bakàjì awu. Èè, kudyèbejabò menemene mùshindù ùvwabo mwà kupita nendè. Pa nàнку

pàakalwàye ùwà ùmwènèka bu cintu kampànda cyà mu mukàndà wà biikùlùkuuku, ne nkanzu yà nshingù mile, yà mikesè ayi, nudi bamanyè's, yà mabòko male, ne yèndè nsukì mipingaja paanyimà apu, ne kwìsù kwengelela bu ditungulù dipeya, mùshindù awu (mikoka paanyimà, nudi bamanyè's). Ke kupwekayè, ne kwamba ne: "Èè, Àlèluuyàh, munanga wanyì! Nudi bishi nwènu bwònsò?" Èè, yèyè ne: "Mpindyewu, mu dindà pààmù emu n'dyàlumingu." Yèyè ne: "Nwènu bwònsò nenuyè mu disangisha, kí mmwòmò anyì?"

165 (Bàyèndè wa mwànà kwamba ne: "Netwènzè nendè bishi?" Yèyè ne: "Katwèna mwà kuya nendè kuntwaku mùshindù awu to!" Kì yèyè ne: "Èè, ncyèna mumanyè cyà dyaenza to.") Èè, yèyè ne: "Maamù, ndi nkwabamba's, twètù. . ."

166 "Kaa," mwàkambaye, "kàdi, munanga wanyì, ncyèna mwà kupùmbisha èkèleeziyà to. Ncyà bushùwà ne kùdi èkèleeziyà *kampànda* mwab'ewu." "Kaa," nsongàakàjì. . . mulùme kwamba. . . Yèyè ne: "Ndi mumòne mukwàbò lwà mu disangu mwàmwa, nényè ànu mwòmò amu."

(Kì yèyè ne: "Kaa, èè, nebikengelè ànu bwà twètù kucyènza.")

167 Nànku pàakabwelabomù, kwanjibo kumulekela yèyè kubwela dyàmbedi, (Nwamònu anyì?) bamuumvwa bundù. Kì yèyè udi usambuka mùsèèsù awu ne jipè wendè mukesè awu, nudi bamanyè's, ne Bible wendè mu dyàpà. Èè, mwanèètù, mmufwànyine kwikala kàyì ne dìnà dyèndè difùnda mu *Baa Lwàkamanyabo* to, kàdi ndi ndifwànyikijila ne yèyè ùwà ne dìnà dyèndè mu Mukàndà wà Mwoyi wà Mwànà wa mùkòòkò. Kì civwa cintu cyà mushinga ncyòci aci.

168 Pàakabwelaye mu èkèleeziyà wàkashikamina lwà paanyimà apu, kupetaye wendè nkwasà, nudi bamanyè's, ne kukangula Bible ne kubangayè kubala. Nènku ke bantu bwònsò kubanga kukènzakana, bàdyàmbedila ne muntu kampànda wa kale ne kalèèle ùwà mupàtùkile mwaba kampànda. Bàkènzakana mùshindù awu ne: "Kaa, ekèlekèle!" Bwònsò bavwàle bilàmbà byàbò bilenga, nudi bamanyè's, cimfwànyì cyà beena Laòdikiyà, ne nkanzu yàbò milenga ne bikwàbò. Bèèla mèsù paanyimà e kumònabò maamù mukesè ewu musòmbe mwaba awu, ne mimwemwe yà dikèma kwìsù kwèndè aku, nudi bamanyè's, munkaci mwà kubala Bible. Èyowa.

169 Nènku mpaasàtà, paanyimà pàà katancì, paanyimà pàà bamanè kupicila mu bintu bikwàbò byònsò abi, kí yèyè ndekeelu wa byònsò, ùwà ne tusunsa tutwè ku dikumi ne tùtaanu bwà kwakula. Kì kajuukaye e kwamba ne: "Mukalenge mmwìmpè."

170 Maamù ne: "Nzambì àtumbè! Ncyà bushùwà! Àlèluuyàh!" Kì bantu bwònsò kwololabu nshingù bu nyuunyi yà ntuubà, bàkènzakana ne: "Ùwà nganyì awu?"

171 Ki pashiishe paanyimà pàà katanci, kwambayè ne: “Uhm! Uhm! Uhm!” Yèyè ne: “Beena Kilistò mu cikondo ne cikondo cyònsò bàvwa ne cyà kwikala beena Kilistò bàà bukitù, banène ne bîmpè,” anyi cintu kampànda cyà mùshindù awu.

172 Yèyè ne: “Nzambi àtumbè! Ncyà bushùwà!” Ki bôbò bwònsò kukènzakana.

173 Ki yèyè ne: “Uhm!” kwoshayè kasùmbù kèndè kàà balami aku dîsù.

174 Ke kasùmbù kàà balami kuumvwakù cìvwàye ùswa kwamba. Kuyabo paanyimà apu ne kukwàtabò mukàjì mukèsè ewu ku dibòko ne kumwelabo pambèlù pàà ciibi, bàmba ne: “Wèwè udi wimanyika mpaasàtà.”

175 Nudi bafwè kàdi kanùyì bacimanyè to! Èyowà. Kaa, mmushinga kaayi ùdi naawù madìdiishi ènù à mmwenù myalabala awu? Bibàsà byènù bilamika myòsà abi mbyà bwalu kaayi? Ne disangisha dyènù dinène adi ndyà bwalu kaayi? Nuyààya ànu buludì mu ifernò, ànu mùdì kandìndì kàya ku diswa dyàkù amu. Bwalu wèwè kùyì ne Nyumà wa Nzambi to, udi mujimine! Wèwè kùyì mulediibwe cyàkàbìdì kwèna mwà kumòna Bukalenge bwà Nzambi to.

176 Aci cìdi ne bululu. Mbyenze bu pâmvwà ne ciibidilu cyà kunwà màfutà à mùdyàntondo, mvwa ngàmba ne: “Maman, ncyènà mene mwà kuàtwàla to.”

177 Yèyè ne: “Wòwò kàyi makuumvwija bibi to, kaàkukwambulwisha to.” Nàнку ndi ngèèla meeji ne ke mùshindù awu ùdi Eci, kàbìdì.

178 Kaa, bu wèwè mwà kwakula naabò! Kaa, nzùbu minène, milenga, ne bikwàbò. Kaa, bôbò—bwôbò—bwôbò. . . Paùyaaya mu èkèleeziyà wabò, udi mwà kufika ku dyamba. . . Ndàaku ànu mu èkèleeziyà wabò wambe ne: “Èè, ndi nkwambila’s, wèwè udi mwena Mpenta anyi?”

“Kaa, èyowà. Uh-huh. Bushùwà’s, twètù tudi beena Mpenta.”

“Udi witabuuja mu kulediibwa kwà cyàkàbìdì anyi?”

“Èyo.”

“Èè, ndi muswè kukuleeja cintu kampànda. . .”

179 “Kaa, tàngila nzùbu ewu! Udi mumanyè mùdì kwibaka. . . búngì bwà mfranga yìdì nzùbu ewu mudyè anyi? Ncìtùdila byà binaayi bisàtù byà mùliyò wa ndola bwà kwimanyika cintu eci. Nudi bamanyè’s, pa ciibidilu katùvwa nendà mùshindù awu to. Tuvwa—tuvwa ne ciibidilu cyà kwikala lwà kwinshì kwà kajila kakesè kwàka.” Um-hum, kàdi kènzakana, udi ujàndula bintu byònsò binène bìdìbo naabi ebi. Èyowà’s, mukalenge. Ne pashiishe bwôbò bàdì bàmba ne: “Kaa, twètù—twètù’s tudi ne bintu binène byònsò ebi!” Kàdi kabèèna ne bujitu bwà misùukà

mijimine to! Mbaswè díbà dyònsò kukuleeja búngì bwà nzùbu yidíbo naayi. “Tàngilà búngì bwà bèètù bantu bàà mu kàlaasà kàà Dyàlumingu, búngì búdíbu mene!” Bìdi ne dikwàcisha kaayi píikalábo kabàyi ne Nyumà Mwímpè? “Babanji, babanjike bikolè, kabàyi dijinga ne cintu nànsha címwè.”

¹⁸⁰ S’ki cyàkambàYe ne: “Udi wela meeji nàнку, kàdi kùyì mumanyè ne udi mupèle, mukengeledi wa luse, mwena dikènga, mpofo, butakà. Kàdi kùyì mucimanyekù to!” Nwamònu anyi? Ki cyòci aci.

¹⁸¹ Kaa, bushùwà’s, bàdi bàmba ne: “Udi mumanyè mùdi bwalu anyi? Tuvwa ne ciibidilu cyà kwikala. . . Kààèkèleeziyà kakesè katùvwà ne ciibidilu cyà kusambidilamù kàdi lwà paanyimà pàpa, ewu ke munène udikù mpindyewu!” Kàdi ndi nnwàmbila ne, kakùyìku bujitu bwà misùukà nànsha, kàdi bikèngela bwà kumòna ne bàdi batabaleela bintu byònsò ebi. Dyambulwisha dyà bainàbànza, ne bintu bikwàbò byònsò ebi, bikèngela bàbitabalèèle byònsò, kàdi nànshapu bujitu bwà misùukà mijimine. Kaa, mulùmýànà wa yaààya, mmu cinyi—cinyi mùdi èkèleeziyà ewu mukadisangane’s wè!

¹⁸² Kabàvwaku ne bujitu bwà misùukà to, kàdi bwàbù bùvwa bubàtonde ng’ànù bwà mabanji. Ncyà bushùwà. Bàvwa ne bujitu bubì. Bàvwa ne bujitu bwà mabanji ààbò kàdi kakùyìku bujitu bwà misùukà mijimine nànsha. Mufùndu mmwambè ne: “Kabàvwa bamanyè ne bàvwa bakèngeledi bàà luse to,” (Kaa!) “beena dikènga, mpofo.”

¹⁸³ Bàvwa bàdyàmbidila ne bàvwa mwà kwangata mfranga bwà kukùdimwisha bàà pa buloba micimà. “Kaa, bu twètù mwà kukùtula ndongamu, mutùdi mwà kupeta mfranga yàbúngì kaaba aka, ngèèla meeji ne tuvwa mwà kukùdimwisha bàà pa buloba micimà. Bu bàmwè bàà ku bantu babanji bàà mu èkèleeziyà wetù, Mwanèètù Branham, twètù ànu mwà kubàfikisha kudisanga kantu, nènku ndi ngèèla meeji ne tudi mwà kubanga kasùmbù kàà kafwànyine—kàà kafwànyine kuya buloba bujimà ne—ne kukùdimwisha bàà pa buloba micimà. Tudi mwà kwangata ndèkè ne kukùpa mikàndà yà dibala mu Àfrikè mujimà, ne bintu byà mùshindù awu. Bu twikala ànu ne ndambù wa mfranga!”

¹⁸⁴ Mwanèètù, bàà pa buloba kabààkukudimuna mucìma ku mfranga to. Bàà pa buloba nebàkudimune mucìma ku Nyumà Mwímpè; diyiiisha dyà bukolè dyà Nyumà Mwímpè ne Nkùrusè ke bìikala cintu címwèpelè cyàkudimwisha micimà yà bàà pa buloba. Ndongamu wa Nzambì kí ngwa mfranga to. N’Nyumà Mwímpè, ki cìdi ndongamu wa Nzambì bwà Cikondo cyà Èkèleeziyà wa Laòdikìyà anyi cikondo cikwàbò kanà cyònsò cyà èkèleeziyà. Èyowà’s, mukalenge.

¹⁸⁵ Mbaswè Nyumà Mwímpè. Kaa, bàdi bàmba ne: “Twètù tudi. . . tudi ne ngòlò.” Cìvwa ngòlò, èyo, kàdi kí ngwa mùshindù

mwîmpè to. Bàvwa ne ngòlò búngi kabùyi kwamba kàdi kàyi wa mùshindù mwîmpè to. Mpindyewu, nànkù Yesù kubàtumina díyì ne: “Ndi mumanye ne nudi babanji, ne biikàle ne ngòlò, ne kanùyi dijinga ne cintu nànsha cimwè,” kàdi:

Ndi nkubela bwà kulwa kusùmbà kùndi ngòlò muteeta mu kapyà, . . .

¹⁸⁶ Ngòlò wa mùshindù mushiilàngàne, èyowà’s, ngòlò udi muteeta mu cikùtù cyà kapyà awu, wàkápìcila mu kapyà kàà lufù, wàkápìcila ku Kàlvaryò, kùpatuka awu.

¹⁸⁷ Ngòlò wabúngi unùdì nendè mpindyewu mmubwicidìle, neàdiike kùdì kamunguji, neàkwatè dimòmènà. Bu nwènù mwà kufùnda eci, Yakòbò. . . Yakòbò Munsantu 5:1 too ne ku 4, nènku nenùmvwè cidìci, mmwambe ne: “Ndaayi, nwènù bantu babanji, mpindyewu ku dilwa dyà Mukalenge, dilàayi ne nùtwe mikèmu bwà makèngà ènù àdi ànukwata, ngòlò wenù mmukwàte dimòmènà munda mwènù.” Nwamònu’s, awu’s ki mùshindù wà ngòlò utu ukwàta dimòmènà.

¹⁸⁸ Kàdi ngòlò udi Yesù ufla n’Nyumà Mwîmpè, Maanyi à ngòlò à Nyumà, apongoloka munda mwà mwoyi wèbè. Nènku—nènku, kaa, ekèlekèle: “Ndi nkubela ne, lwà ùsumbè ngòlò kùndi, pawikalà muswè kulwa mubanji.” Kaa, èyowà.

¹⁸⁹ Kàbidì, bàvwa “mpofo.” Mpindyewu, mùshindù awu ke mubì wà kwikala’s. Ncyèna ngèèla meeji ne beena Kilistò aba bàvwa bafofomijiibwa mu kaabujimà to cìvwàbo bàvwa “beena mèsù bitaayitaayi.” Ngèèla meeji ne mmèsù bitaayitaayi. Cintu cimwèpelè cìvwàbo mwà kutàngila cìvwa nku nzùbu yàbò minène ayi. Cintu cimwèpelè cìvwàbo mwà kutàngila nku disangisha dyàbò dinène adi. Cintu cimwèpelè kuvwàbo bàtàngila kùvwa nku kòralè mulengeja bìmpè ne mìzàbì yàbò yònsò ne bikwàbò. Ngèèla meeji ne bàvwa ànu ne mèsù bitaayitaayi, kabàvwa mwà kumòna kule to, bìvwa bikolè. Ncyèna ngèèla meeji ne bàvwa mpofo to, bàvwa ànu ne mèsù à bitaayitaayi. Cyònsò cìvwàbo mwà kumòna cìvwa wàbò. . . “Èè, nudi bamanyè mùdì bwalu anyi? Twètù tudi beena *Cikampànda!*” Màngumba ààbò manène, mìsùmbà yàbò minène yà bantu, bidimba búngi cyanàànà, kàlaasà kààbò kàà Dyàlumingu, nzùbu yàbò milenga.

¹⁹⁰ “Kàdi bàvwa dijinga ne Nyumà Mwîmpè,” mwàkambà Yesù. Bàvwa bàjinga Nyumà Mwîmpè! Ki Mukalenge kubàmbila ne: “Dìsù. . . Panwikala. . . ne mèsù mabì nànkù, ne nudi biikàle ne mèsù bitaayitaayi be mu mùshindù wà kanùyi mwà kumòna kantu nànsha kàmwè ànu nzùbu wenù munène ewu ne disangisha dyènù dinène edi, ne yènù. . . mulombodi wa cimenga ne bwònsò bàlwalwà mu èkèleeziyà wenù, nènku nudi ne bantu bàà luumù. Kàdi nudi bampwè Mèmè mwoyi. Kàdi panwikala bafofomija mùshindù awu, ne mèsù ènù miikale manyanguke

mùshindù awu, Nénùsùmbishe bwanga kampànda bwà mèsù.” Eyowà.

¹⁹¹ Nwamònu’s, bìdi bikèmesha bwà balongeshi bàà bunzambi abu kabàyi nànsha ne cimwè cyà ku byòbi abi to, kí mmwòmò to? Bàvwa ne mànànanshì búngì cyanàànà, bàvwa ne tèòlòjì búngì cyanàànà. Kàdi bàvwa dijinga ne bwanga bwà mèsù, Nyumà Mwímpè wa Nzambi, bwà kufiita pa mèsù ààbò ne kubàfikisha ku dindila dyà dilwa dyà Mukalenge, kubàfikisha ku ditàngila ku Bible, kubàfikisha ku ditàngila ku Dìyi. Mbamanyè mwà kwamba ne “ah-man” ànu mu yèyè menemene. Bàvwa ne mànànanshì, bàvwa ne maanyi à mshindù yònsò. Kàdi: “Bàvwa dijinga ne bwanga bwà mèsù,” mwàkamba Mukalenge. Yèyè ne: “Nudi dijinga ne ndambù wa bwanga bwà kulaaba pa mèsù ènù, ne nebùàkangule.”

¹⁹² Mvwa ne ciibidilu, pàncìvwà mwànà mukesè wa balùme. . . Nkaadi mulonde bwalu ebu, ngèèla meeji, ndi mufwànyine kwikala mubwàmbe ku èkèleeziyà. Eci ncyèci cindwila mu meeji mpindyewu. Ntu mukolèle mu mikùnà yà mu Kentucky mwàmwa, ndambù, nènku tuvwa basòmbèle mu nzùbu wa kale wa mabaya. Maamù, ewu. . . Ne tuvwa ne—tuvwa ne kaaba kakesè lwà kuulu aku, ne tuvwa ne matèlâ à—à bisoosà. Ne pashiishe pamutù pàà matèlâ à bisoosà awu apu pàvwa cibwikilu cyà boyà. Ncyèna mumanye ní nudikù bamanye cibwikilu cyà boyà ncinyi anyi to, anyi bulààlu bwà bisoosà; bulààlù bwà kale, tuvwa bapèle bàà dikèma. Papa ne maman bàvwa bwòbò ne bulààlù mwínshì amu. Nènku tuvwa tubàndila kuulu aku ku kaacibandilu kakesè ne tufika ku lusongo aku, nènku maman ùvwa mwà kutèeka, yimwè—yimwè—yimwè misangu, cipese cyà ntenta lwà pa cibwikilu apu ne bikwàbò, bwà kutwèpula ku. . . Nudi bamanyè’s, nudi nwimana. . . udyàdija mwaba awu ne ubadila mìtootò mu mpùngà yà mabaya à kale awu amu bisambakane ne bukènkè bwà ngondo, nudi bamanyè’s, nènku kwikale masosò manène mu mùsongà amu mùshindù awu.

¹⁹³ Nànku pàvwa nêjè mifwànyine kulòka anyi cikampànda, anyi mvùlà udituuta, twètù bânà batekète tuvwa bafwànyine kudibunya mwínshì mwà cipese cyà ntenta eci—eci, nudi bamanyè’s, bwà kulama abu. . . bwà ne katùlù kubola to. Nènku yimwè misangu nkwaka wa lupeepà lùvwà lupicila mu masosò awu, tuvwa—tuvwa—tuvwa mwà kukwacika cimpumpu ne mèsù ètù àlamakana. Nudi bamanyè’s, àshààla wònsò malamakaja kuulu aku kùdi mashika, mashika malamàkàje mèsù ètù. Nànku maman ùvwa mwà kutùbìikila mu dindà ne: “Tuulukààyi.” Mvwa mufwànyine kwamba ne: “Ncyèna mwà kutùuluka to, maman, bwalu mèsù àànyì mmalamàkàne.” Ndi ne—ndimù ne mpotà, nudi bamanyè’s, mashika kacya àlamakaja mèsù. Kùyìku mwà kukòokeshà kuàkàngula to, nudi bamanyè’s. Mwànà mutekète menemene mulààle mwaba awu, ne mèmè ne Humpy

ne bakwàbò tuteeta bwà kukangula mèsù ètù kàdi katùyìku mwà kuàkangula to, mafofòmijìlwe.

¹⁹⁴ Kaakù wanyì muntu mulùmè ùvwa cilembi mwedi wa matèyi, ùvwa ùkwata nshìmbà, tusengela nshìmbà. Nènku aci ke cìvwa bwanga bwònsò bwà lwondapu kwètù kembèlù, cìvwa mmáfutà à nshìmbà. Bisàbaatà tuvwa tubìfiita mafutà à nshìmbà. Nènku wèwè mwikale ne lukoso lwà lwòshà pa muminu, bàdi bèèlamù ndambù wa térébinthine ne ànu, èyowà, bikukèngela ùbimine, nànkù, bwà lukoso lwà lwòshà alu.

¹⁹⁵ Nènku díbà adi pàvwa mèsù ètù wònsò makàngiìbwe, maman ùvwa mwà kwangata cintakanyi aci. . . “Èyo, indilaayi kakesè, bananga bàànyì.” Ùya lubilu mu cìkukù wàngata dikopo dinène dyà mafutà à nshìmbà awu ne uatèèka mwaba awu, ne uasabisha menemene. Nènku ubanda bwà kutùfiitawù pa mèsù, nwamònu’s, too ne muvwàwu àkwàta mudimu. Nènku paanyimà pàà katancì ndyumvwaku bu ne mvwa mwà kumòna, nkangula mèsù. Ngangata. . . Mafutà à nshìmbà ki àkaakàngula.

¹⁹⁶ Nènku ndi nzwambila ne, tudi bapete nkwaka wa mashika wa wenza bwòwà’s! Nwamònu anyi? Kùdi mashika à enza bwòwà àdì mapite mu ditùnga. Ba-Baptistes bààkamba ne: “Matùkù à bishimà àkaadi mamanè kupìta. Cintu pàaci ne n’Nyumà Mwímpè kacitukù to, ne dyakula dyà mu myakulu kaditukù to. Kakwènakù dibàtiiza mu Dìna dyà Mukalenge Yesù to.” Nènku, kaa, nkwaka yà mishindù kanà yònsò, ne mmikange mèsù àbùngì ne mashika à nyumà à mùshindù kampànda. Nebikèngele cyà citàmbe màfutà à nshìmbà awu bwà kukàngula mèsù awu, mwanèètù. Nebikengelè dibàtiiza dipyadiya dyà Nyumà Mwímpè. . . ? . . . bwà kufiita pa mèsù ènù nènku nudi mwà kumòna, kuumusha butaayitaayi abu pa nwènù bwà nwamòna mwà kumòna Dìyi dyà Nzambi ne ndilelèlè. Ncyà bushùwà. Kaa: “Ndi nñubela bwà kulwa kusumbà ndambù wa bwanga bwà mèsù k’Ùndì, bùdi mwà kulaaba màfutà pa mèsù ènù.” Bwà nwènù. . . Bwà. . .

¹⁹⁷ Balongeshi bàà tèlòlòjì bàdi ne yàbò. . . tèlòlòjì yònsò, ne manànanshi ààbò ne bikwàbò, kàdi bidi bikèngela cyà citàmbe aci. Bidi bikèngela Nyumà Mwímpè bwà kufila cikèènà-kumòna cyà nyumà bwà kumòna mùdì makolè à mu Dyulu àkwàta mudimu. Nyumà Mwímpè, bwanga bwà Nyumà Mwímpè! Bwanga bwà mèsù mmáfutà à luuyà, aci tudi bamanyè, nènku díbà adi Nyumà Mwímpè ke Màfutà à Nzambi.

¹⁹⁸ Ne tèlòlòjì yònsò ne manànanshi byà ne: “Kaa, mwanèètù, munanga, wèwè udi ànu bímpè. Kakwèna cilema bwà. . . Byònsò mbímpè. Èè, tudi ne èkèleeziyà mutàmbe bunène udikù mu cimenga.” Awu manànanshi kaàkwenza bwalu to! To, mukalenge! Neàkufikishe ku dimwenena ànu lwà *apa* (mèsù à bitaayitaayi) wàmba ne: “Èyowà, tudi ne èkèleeziyà mutàmbe bunène.” Kàdi bishi bwà Cilumbulwidi cilwalwà piikala Nzambi

mwà kunùlumbulwisha, nwênù bidimba byà èkèleeziyà wa Laòdikiyà?

¹⁹⁹ Ncyèna ngàmbila nangananga bàdi kaaba aka to, kàdi ndi pa mukàbà wà mèyì ne ùyaaya pa buloba bujimà, nudi numòna's, pa nàнку ndi ngàakula kùdì miliyò yàbùngì yà bantu katàtaakà, nudi numòna's.

²⁰⁰ Nàнку dībà adi ki cyôci. Laòdikiyà! Civùmvu! Mutwè cìmpìngà! Wa mèsù à bitaayitaayi! Ncyèna mumanyè bikwàbò byònsò to. Tumpundu's wè! Kampundu ncintu cisopakaja, kakèèna ne luumvu lwìmpè to twamb'eku twamb'eku. Kàdi paùdì wakula naaku, kàdi kàbàwula maci àakù manène awu, kenza ne: "Hin! Han! Hin! Han!" Kakàtukù ne kalolo to. Kòkù nkasopakaja, kàdi pankaci pàà kabalù ne mpundà. Ki lutatù lùdiku mpindyewu, nudi nutèèka beena Nikàlàwò ne beena Laòdikiyà pàmwè, ne nudi nupeta mpundà cyàkàbìdì. Cidì citùkèngelà... Ncyà bushùwà. Ki mbamanyè to. Wèwè udi ùbàmbila bwà dyondopa dyà kùdì Nzambì, dibatiiza mu Dìna dyà Yesù. Bàdi bàmba ne: "Hin! Han! Mpaasàtà wanyì kàtu... Hin! Han! Twètù katùtu twitabuuja aci bu ba-Presbytériens to." Binyònga's nwè! Aci's ki mùshindù unùdì mwà kucibìikila...?...

²⁰¹ Ncitu munange kampundu to. Kàdi ncinwambìdì, ntu munange kabalù kìmpè, kapòlòbele kakuna ku dikàsà, balumyànà, udi mwà kukàlongeshaku cintu kampànda. Udi mwà kukàlongesha mwà kwinama, ne mwà kuditwala mu cipalu cyà manayi, ne kenza biswa kupetangana ne mùdì muntu mwà kwenza, bwalu kòkù kàdi... nkamanyè cintu kampànda. Kàdi ne mudibu. Kampundu kì nkamanye tatwàkù anyì mamwàkù ne nganyì to, ne kakèèna mwà kulelangana kòkù kiinè to. Ki mùshindù ùdibi ne màngumba à kale, makwàte mashika, à mmwènekèlu wa kwisùkwisù aa, kaèna mwà kujuukuluka kàbìdì to. Pàdì ànu èkèleeziyà ne wàshàadi dingumba, wàmanyi kufwà! Kàadyàkujuukaku kàbìdì to. Ncinyi aci? Mmusopakaja!

²⁰² Martin Luther ùvwa ànu bìmpè, kàdi pààkadìvwijaye bulongolodi cyàkenzaye ncinyi? Ba-Méthodistes bàvwa bìmpè, pààkadìvwijàbo bulongolodi cyàkenzàbo ncinyi? Mpenta ùvwa bìmpè, kàdi panwàkadìvwijà bulongolodi cinwàkenza ncinyi? Nwakacisopakaja, nwakacisopakaja kucibweja mu èkèleeziyà wa Kàtòlikè wa cyena Nikàlàwò. Ànu menemene cinwàkenza's! Kwangata mùshindù wèndè wà dibàtiiza, kwangata ngenzèlù yèndè ne byenzedi, pèndè Bible mmwambe ne: "Wèwè udi mwànà wa bakàji wa mukàji wa masandi, ndumbà. Mwànà wa bakàji wa bandumbà!" Cyà bushùwà menemene!

²⁰³ Kabalù kìmpè kakuna ku dikàsà, èyo, nkàà kalolo. Kaa, nkìmpè, ntu mukànage. Kàdi kakwambika mutù pa makaaya, kananga, kàà musangeelu. Bwà cinyi? Nkamanyè ne tatwàkù nganyì, nkamanyè ne kakwàkù mulùme nganyì, nkamanyè ne

tatwèndè wa kakwàkù ùwà nganyì. Kàdi mwà kwalukila paanyimà buludi, nkamanyè mudibù wàkù.

²⁰⁴ Nènku ntu muswè kumòna mwena Kilistò mulelèlà mukuna ku dikàsà! Kí mmwambùle mukàndà mumufùndila: yèyè m'Méthodiste lumingu lushààle, ne Baptiste elu lumingu, ne mwena Mpenta elu lumingu, ne m'Pèlèrin de la Sainteté lumingu lùdì lùlonda. Kí mmumanye ne papa wendè nganyì anyì ne maman wendè nganyì to. Kàdi lekèlaayi nnwàmbilèku, muntu udi mulediibwe kùdì Nyumà wa Nzambì ùdì mwà kukwangata too ne ku Ditùkù dyà Mpenta; ùdì mwà kukwambila mudibu wèndè, ku mpenta! Amen! Ndi muswè kwikala mpenta awu kuumukila ku lusukì lwànyì too ne mwinshì mwà makàsà. Ncyèna ngàmba Mpenta wa cyena dìngumba to. Ndi nswa kwamba bukolè bulelèlà bwà Kilistò mubiike ku bafwè, Dibènesha dilelèlà dyà Mpenta.

²⁰⁵ Bwanga bwà mèsù, bukangula mèsù èbè mu mùshindù wà ne tudi mwà kwela mèsù paanyimà ne kumòna kùdici cifùmìne. Wèwè muswè kumòna cidì èkèleeziyà leelù ewu; èlà mèsù paanyimà umòne kùdiye mufùmìne, pashìishe tũngunuka ne kuya mutàngile kùdì Nzambì, neuye kule naaci. Èyowa's, mukalenge.

²⁰⁶ Èyo, ndi mumòne cikwàbò cintu, mmwàmba ne: “Bàdi butakà; butakà kàdi kabàyi bacimanyè to.” Bushùwà.

²⁰⁷ Kaa, butakà kàdi kabàyi bacimanyè to. Mpindyewu, muntu awu ùdì mu ngiikàdilù wa dikènga, muntu yèyè mukèngeledi wa luse, mpofo, mwena dikènga, butakà. Mpindyewu, yèyè—yèyè mucimanyè, neàdyenzejèku; kàdi yèyè kàyì mucimanyè to, mukwacikwètù awu's mmufwè mu lungenyì. Ncyà bushùwà anyì? Yoyòyò! Aci's civwà cyà mùshindù mukolè wà kacya. Mufwè mu lungenyì, kì mmumanye cyàdyenza yèyè mwinè to.

²⁰⁸ Wèwè mumòne muntu wènda upweka ne mùsèsèsù, mupèle, mwena dikènga, mpofo, mukèngeledi wa luse, ne butakà, kàdi wèwè kwamba ne: “Mwanèètù, udi butakà.” “Kaa, ndi butakà anyì? Kaa, Kaa, mwanèètù, nkwàcishèku mu mwaba kampànda, nkwàcishèku bwà mvwàlè bilàmbà.”

²⁰⁹ Kàdi uya mutàngile kùdiye aku wamba ne: “Amba tũng, wakapeta Nyumà Mwimpè kacya wítabuuja anyì?”

²¹⁰ “Cyùdì wèwè ewu ncinyì, munsantu mubùnguluki wa mu malaba anyì? Èè, ambà tũng, cyùdì uswa kwamba ncinyì? Kùpimi kungàakwisha mùshindù awu to, mèmè ndi Presbytèrien, ndi Baptiste, ndi wa mu *cikampànda* ne *cikansanga*.”

²¹¹ Butakà kàdi kàyì mucimanyè to! Mpindyewu, kacya kì mmèmè utukù mwambè nànkù to, Bible ngudi mwambè cyòci aci bwà cikondo eci ne: “Butakà kàdi kàyì mucimanyè to. Lwàku ùsumbè ndambù wa bilàmbà Kùndì,” mwàkambà Ye.

... civwàlù citòòke...

Civwàlù citòoke ncyà Bansantu; mbwakàne bwà Bansanrutu. Nwamònu anyi?

212 Butakà? Kaa, bushùwà's! Èyowà's, mukalenge! Kaa, wèwè udi wamba ne: "Mwanèètù Branham, awu kî ng'èkèleeziyà wetù to, wetù kî èkèleeziyà udi muvwàdika mvwadilu mutàmbe bwîmpè mu cimenga!" Bwà aci ncyèna mwà kucyèla mpatà to; yimwè yà ku myòdelè yà ndekeelu, bintu byà bitàmbe bwîmpè, bivwàlù byà ndekeelu byà balumyànà bende luumù bàà mu Hollywood, bitàmbe kwikala byà bisalulangana masandi bifwànyine kukoka ntèmà yà muntu yònsò mu mùsèsèsù. Uh-hum. Bushùwà.

213 Inàbànzà kampànda kungambila, wàmba ne: "Mwanèètù Branham, ke cyùdi uswa kungambila aci anyi? Mpindyewu, tutu tusùmbà nkanzu eyi mu makàjiinyi nènku kî cyònsò citùdi mwà kusùmbà."

214 Mèmè ne: "Bàcìdi ànu basùmbisha bilàmbà bijimà ne benza màshinyi à bilàmbà. Bwà apu kwenaku ne pàà kulingila to."

215 Bible mmwambè ne: "Ewu yònsò udi utàngila mukàji bwà kumwalakana ukaadi mwende nendè masandi." Mmwômò anyi? Èè, dîbà adi, mukàji yèyè muvwàle mvwadilu wa usalulangana masandi ne ukatàdika kumpàla kwà mulùme, udibù ne cyà kudyula bwà bwalu abu nganyi? Mmukàji awu, yèyè ngudi mucyenze. Ncyà bushùwà menemene.

216 Mpindyewu, udi mufwànyine kwikala mukezùke bu cilòngò cyà mbata kùdi bàyebè. Udi mwà kwikala nsongàakàji wa citende utu kacya kùyì mwenze cintu cibì mu nsòmbelu webè to, mwikale virgo pawàkasèdiibwa kùdi bàyebè. Kàdi wèwè muvwàle mùshindù awu ne mufikishe balùme ku dikutàngila mùshindù awu, mulùme wa bwena awu mmumane kwenda *neebè* masandi mu mwoyi wèndè. Ngènzàmpèkààtù uvwa mukutàngile awu. Bu mwena Kilstò udi mwà kwikala ne bilàmbà bìdi bikosa mu mùshindù mutàmbe bwîmpè mu cimenga, byà bitàmbe bwîmpè byà myòsà yà mùkòòkò, kàdi kî mbyàkàne bwà Munsantu wa Nzambi kuvwàlaye mùshindù awu to.

217 [Katùpà kàà mukàbà wà mèyi munda mutupù—Muf.] Kaa, èyowà's, kî mbyàkàne bwà mwànà wa Nzambi to.

218 "Kaa, to," mùdìbo bàmba. Èè, bàdi bàmba ne: "Èkèleeziyà wetù. . ." Wèwè's udi muvwàle bilàmbà bìmpè's? Bàakamba ne bàvwa bàvwàle bìmpè. Bàvwa "babanji, kabàyì dijinga dyà cintu nànsha cimwè." Bushùwà. Mòna's, bàdi bàmba ne: "Nànsha mpaasàtà wetù utu upàtuka ne mùzàbì munène menemene pambidi. Kòralè yònsò utu upàtuka muvwàle mùzàbì munène menemene pambidi." Dyabùlù mmudivùngilemù. Uh-hum. Uh-hum, ncyà bushùwà. Kaa! Hmm, hmm! Èè, bìvwà bitàmbe ne mèmè nciyi mwambe aci mene to. Pa nàнку, ndi mwà kulekela aci. Eyo.

219 Kaa, bintu binène byônsò ebi's! Kòralè miwàle mizàbi, kòralè yifuciibwa, bikèngela kubáfuta bwà kwimbabo. Hmm. Bikèngela kukumbajila muyiishi ndambù wa difwètà cyanààna neàkakebè mûngà mudimu wà ùmufuta bîmpè bitàmbe. Neàkùngwije kasumbù kàà balubuludi wàmba ne: "Mpindyewu, bânà bèètù, ndi—ndi. . . nuvwa bansòmbèshe bîmpè mwab'ewu, nutu numpa nkàmà *yàbùngì be* ku lumingu," anyì cintu kampànda cìkwàbà cyà bwena aci. "Kàdi Èkèleeziyà mukwàbò wa ba-Presbytériens wa. . ." (Ucibiikila ne "mwena Mpenta" anyì ní ncinyi cyônsò cìdiku aci.) "dyàmwàmwa edi, bàdi ne—mbandaye ne nebàmpèèshè *yàbùngì* mitàmbe." Kaa, ekèlekèle!

220 Dìbà adi cìdì naaci munsantu mukwàte ne byà luse ewu ncinyi? Nganyì wabo wàbèèlela meeji? Ncinyi cìdì naaci èkèleeziyà mukesè mùle tètè ne Nyumà Mwîmpè, mpùngà kaayi udibò nendè? Kabèèna mwà kwanyisha bwà cintu bu nàнку kwenzekaci to. Ki Mukalenge kunùjuudila ànu cintu kampànda dìbà adi, amen, udiYe muDyambwile, kumùja ne Nyumà Mwîmpè ne kumutèèkapù bu mukùlù mutàngidi. Kutuma. . . Yèyè ne: "Ndi nkubela bwà kulwa kusùmbà kùdiYe civwàlu citòòke." Bible mmwàmbè ne: "Mizàbi mitòòke yìdi bwakan-. . . bwà bansantu."

221 Mpindyewu, ngèèla meeji ne tudi. . . Twàngatàayi ku mvensà wa—ku mvensà wa 19 mpindyewu. Ngèèla meeji ne cìdì bu ku mvensà wa 20 kutùdì, bwà ku dyànyì pàànyì dimòna. Èyowà, èyowà, netùjikijilepù. Mpindyewu, ikàlaayi bapùwe mpindyewu menemene ne nütèèleje mpindyewu patùdi twenza cyòci eci apa. Tèèlejàayi:

Mònaayi, ndi mwimane ku ciibi, nkòòkola: muntu yèyè mumvwè diyì dyànyì, ne munzùlùle ciibi, nèmbwèlèmu. . . ne nèndye nendè didyà dyà dilòòlò, ne yèyè nèadye naanyì pàmwè.

Kùdi ewu wàcimuna nèmmwanyishile bwà kusòmba naanyì pa nkwasà wanyì wa butùmbi, ànu mene bu mungàakacimùnà pàànyì, ne musòmbè ne Taatù wanyì mu nkwasà wendè wa butùmbi.

Ewu udi ne macì, ùmwè cìdì Nyumà wàmbila maèkèleeziyà.

222 Edi's ki dimwè dyà ku mèyì à matàmbe kwikala à pabwàwù ànkadiku mumòne mu Dipungila Dipyadipyà. Ndi muswè bwà numòne ne: "Ndi mwimane ku ciibi nkòòkola." Eci's bàtu bàcyangata nangananga, bu diyì dyà kubiikila naadi bangènzàmpèkàatù. Ncyà bushùwà anyi? Tudi twambila bangènzàmpèkàatù ne: "Yesù ùdi ku ciibi, ùkòòkola." Kàdi mwab'ewu ùdi ùkòòkola ku ciibi cyà èkèleeziyà bwalu Wàkenda naabò musangu kampànda, kàdi bôbò (ne bulongolodi bwàbò ne maalu à cikwa-pànu ne mashika) bàvwa baMwipàte. ùdi ùsanganyibwa pambèlù pàà èkèleeziyà.

223 Mpindyewu, vùlukaàyi ne, ku mbangilu kwà bikondo byà èkèleeziyà, patùdi tujikija apa, Ûvwa wènda munkaci mwà bitèèkedi byà myèndù byà ngòlò mwandamutekète (Ncyà bushùwà anyi?), bikondo mwandamutekète byà èkèleeziyà. Nènkù ku ndekeelu eku, tudi tuMusangana pambèlù pàà èkèleeziyà anyi? Èkèleeziyà wa Laòdikiyà, wa Laòdikiyà. Pambèlù, bàvwa bapàtùl-. . . baMupàtùle. Mòna's, Yèyè ùvwa mwimànyìne lwà pambèlù uteeta bwà kwalukila munda. Ncimfwànyi kaayi cyà cyèzza luse's wè! Musùngidi wa buloba, mwimàne pambèlù pàà èkèleeziyà udiYe musùmbe ku Mashi Èndè Sungasunga. Bundù bwàbò!

224 “Ndi mwimàne ku ciibi nkòòkola.” Paanyimà pàà mumanè kusàkiibwa pambèlù anyi mwediibwe pambèlù, pashiishe ùteeta bwà kwalukilamù, wènda ùdikòka ne ukòòkola ku ciibi. Eci's ki bujaadiki bwà bütàmba kulenga ku mwoyi mu Dipungila Dipyadipyà. Ngèèla meeji ne kakwèna cintu cidi mwà kwikala citàmbe kwikala cyà dibungama menemene kutàmbe eci to, bwà kumòna Musùngidi wa buloba Mupàtula mu èkèleeziyà Wendè Sungasunga, cikondo cyà Laòdikiyà. Paanyimà pàà Yèyè mumanè kubàmbila cyàkadibo benze, bubanji bwàbò ne bikwàbò byònsò, ne civwàbo, ne mùshindù ùvwabo civùmù ne bikwàbò, ne bwòbò—bwòbò bàvwa ne. . . bwòbò. . . Kabivwa bikèngela bwà kubàtwilaYe mukana to, bwòbò mbàvwà baMutwile mukana. Nènkù ki cyòci cyònsò eci, mucii kale ànu ùkòòkola ku ciibi, ùteeta bwà kwalukilamù. Bwà cinyi? Bwà kubàpèèsha Mwoyi wa Cyendèlèlè. Aba biine bàvwà bàMushebèye ku Kàlvaryò abu, Ûvwa ùteeta bwà kusùngila musùukà wàbò. Ncimfwànyi cyà citàmbe kwenza luse cínkàadiku mumòne bwà kacya bàndela, citù kacyi cyelelakù meeji to.

225 Mwipata! Ûvwa mwipata mu cinyi? Mpindyewu, tèèlejàayi, balunda bàanyi. Pìikala eci ní kacýèna citwa ku mwoyi's! Angàtaayi cimfwànyi cyàci, nucibweje mwinshì mwà mwoyi wènu. Musùngidi wetù, pàvwàYe pa buloba, Yèyè wàkiipaciibwa mu ditùnga Dyèndè Yèyè mwinè. Wàkabèngiibwa, Wàkiipaciibwa. Bàà pa buloba bàakaMwipata ne kuMupoopela ku nkurusè. Ne mpindyewu, mmu èkèleeziyà Wendè Sungasunga, mùdiYe mwipàciibwe. Mu mwaba nànsha ùmwè kí mbaMuswè to, kabèèna Nèndè dijinga to. Bàdi ne dìngumba, kabàvwa Nèndè dijinga to. Bàdi ne paapà, cikwàbò nè cyàkuMujingila ki cinyi? Bàdi ne mwèpiskòpò wa mutàmbedile, ne mukùlù mutàngidi, Nyumà Mwimpè kènakù ne dikwacisha kùdìbo nànsha ùmwè. Kabàvwa Nèndè dijinga kàbìdi nànsha. Kilistò, Nyumà Mwimpè, kabàvwa Nèndè dijinga to. Pa nànkù bàdi. . .

226 Ncyèna ngèèla meeji ne bàvwa ànu bajuuke ne baMwele pambèlù to, bwalu kabàvwa batàbalèèle ne Kàvwamù to. Kabàvwa batàbàlelele ne Kàvwamù to, bwalu bacivwa ànu

munkaci mwà kuMwimbila misambu. Muiyishi ùcìvwa ànu mumònanngane ne kwakula Bwèndè, nànkù kabàvwa batàbàleele ne Kàvwamù to. Kàdi cikwa-pànù cyàbò ciinè ne bulongolodi bwàbò, munkaci mwà kudìvwija bulongolodi, bàmba ne: “Matùkù à bishimà àkaadi mapite ne kakwènakù cintu pàaci ne *cikampànda* ne *cikansanga* to.”

²²⁷ Ndi nnukonka. Ditàbuluja dyònsò dikaatùku dilwè edi (nànsha dyà munyì, nwènu balongi bàà maalu-malonda), mpindyewu, kacya kale too ne mpindyewu, èkèleeziyà eyi, ditàbuluja dyònsò dikaadiku dilwè edi, kùdi . . . dìvwa misangu yònsò ditwadiibwa ànu pambèlù pàà bulongolodi. Muntu kanà yònsò ukàadikù mutwadije ditàbuluja ewu, ùvwa ùsanganyibwa pambèlù pàà malongolodi. Nènku musangu wònsò wàkabangaku di—ditàbuluja ewu, bàvwa ne bimanyinu ne bishimà byà dyakula dyà mu myakulu ne dyondopa, ne bikwàbò byà mùshindù awu, munkaci mwà kwenzeka. Pàvwa ànu mudijuudi awu ne wáfwe, dìbà adi bàvwa bacìvwija bulongolodi ne benzèlapù bulongolodi kampànda, ne bumba “bafwa” buludi ne Nzambì kàvwakù ùbwèlakana naaci kàbidi nànsha. Aci’s ncyà bushùwà menemene.

²²⁸ Nènku ki Yèyè ewu mu cikondo cyà ndekeelu cyà èkèleeziyà, mwimane pambèlù pàà ciibi, Nzambì wa Bukolè bwònsò. Aci—aci cìdi cìcìbuluula mwoyi wànyì bwà kwela meeji ku cyòci aci. Mukalenge Wanyì mwimàne pambèlù pàà ciibi cyà èkèleeziyà Wèndè Sungasunga, paanyimà pàà mumane kwikala musakila pambèlù kùdi dinanga dyà maalu à pa buloba ne mashika ne dīgumba ne dibenga kucyùka maalu, mwimàne pambèlù pàà ciibi, ùkòkòkòla, ùteeta bwà kwalukilamù. Pàngèdikù meeji, mu katanci emu, mémè kwìnama pa mèèsà ne kukùtula cibòòbo wa mwadi. Mémè kudyàmbidila . . .

²²⁹ Ntu misangu mivùle ndyambidila ne, pàvwa Yesù musòmbè ku nzùbu kwà mufaalèsà wa kale aku, muntu nànsha umwe kààkaMutàbaleela to, pàvwaYe ne makàsà manyaanù apu. Kabààkatwilangana Nèndè ku ciibi bwà kuMwowesha màyi ku makàsà ne kuMwela maanyì to, bwà kuumusha tumvì twà nyama ne bintakanyi mùvwaYe mwendele amu; mùzàbì Wèndè wènda wùbooyangana naabi, mwambulangane ne cimpèpèmpè cyà kale cyà mu njila mùvwa tubalù ne bikwàbò byendele amu, kàdi—kàdi Mwikale ne cimpèpèmpè aci pambidi.

²³⁰ Bàvwa misangu yònsò bwòweshangana màyi ku makàsà, ki cìvwa cilèlè’s. Nènku mwoweshanganyi wa màyi ku makàsà ùvwa kacya ànu wìmana ku ciibi aku. Nènku pàvwa muntu ùlwa, bàvwa mwà kumwowesha màyi ku makàsà èndè, ne bwolola cyanza mwaba awu bàngata mukòlo wà sàndalà yà yimukùmbana, bàmuvwàdika. Nènku bàvwa bamwela maanyì pa mutù ne wèndè . . . ne benza bwà apatule dipembu dimpè, ne dyoshika dyà mu dikoshi dyà ku nsèsè yà dìbà, bamusaamuna nsuki lwànyimà. Ùmba ùbwela.

231 Ne dyakidila dyà mwenyi, mpindyewu s’ki mùshindù ùvwàbo. . . Juukila kuulu kaaba aka ndambù, Pat, ndi muswè kunuleeja cintu kampànda. Ke mùshindù ùvwàbo benza ngwòwò ewu, bàvwa bamwakidila mùshindù ewu. Mpindyewu, ngèèla meeji. . . To, nùnkù ewu, ngèèla meeji ne ncintu kampànda mu mùshindù ewu ewu, bwà kumwakidila nùnkù *ewu*, nwamònu’s, ne bèèlangana mu citupà muntu ne mukwèndè. Nènku ùvwa mwakidila bîmpè.

232 Kàdi pààkalwà Yesù ku difestò edi, ànu mùvwàYe mulwè ku difesto dyà beena Mpenta kaaba aka, muntu kampànda wàkapanga kuMumòna. Bàvwa batàmbe kudifila mu maalu ààbò, bèèpiskòpò ne bakwàbò bàvwa mwaba awu abu. Yesù ùvwa mubiikidiibwe kàdi muntu nànsha umwe kààkaMwowesha mâyi ku makàsà to. Kàdi’s ki Yèyè awu musòmbe lwà mu ditumba, bikolè bwà kumanyabò ne Ùvwa mwaba awu, ne makàsà Èndè ànunka, manyaanu pambidi Pèndè pajimà, lupwishi.

233 Nènku dîbà adi ki mwaba awu kulwaku ndumbà wa kale wa wenza ne luse wènda ùpweka ne mùsèèsù awu, ùvwa ànu ne ndambù mukesè wa mfranga mu kabuta kèndè. Nènku wèla mèsù kuntwaku ne kumònaye Yesù musòmbe mwaba awu ne manyaanu ku makàsà. Kumucìbululaci mwoyi wèndè. Kwambaye ne: “Wàwa’s mmuntu wakafwila mukàjì wàwa luse ku mpèkaatù yèndè. Wàwa’s mmuntu ungààkùmvwa ne mmwenzè dyondopa. Bwà cinyi kabèèna baMutàbaleela?”

234 Bwalu bèèpiskòpò ne bwònsò bwàbò bàvwa mwaba awu, kuMwelabo pambèlù. Ki Yèyè awu. . . KuMubiikilabo bwà kulwa.

235 Mùshindù awu ki utùdì twètù twenza. Tudi tuMubiikila bwà kulwaYe mu masangisha ètù, kàdi pashiishe patùdì tulwa tudi tuMuumvwa bundù. “Kaa, ncyèna mufwànyine kushààla kuulu kwamba ne ‘Mukalenge àtumbè to.’ Kaa, to, Ba-Jones s’mbòbwabu basòmbe, mbafwànyine kwela meeji ne mvwa munsantu mubùnguluki wa mu malaba.” Wèwè mwena lubombo! Ncyà bushùwà. “Ndi ne bwòwà bwà kwakula mu myakulu bwalu mbafwànyine kumbiikila ne ‘mwena myakulu.’” Wèwè udi mwena dikènga mukèngeledi wa luse!

236 Mpindyewu, vùlukaayi, eci cidi cibwela, nudi numòna’s. Wèwè udi mwena dikènga, mukèngeledi wa luse, mupèlè, butakà, ne mpofo, kàdi kùyi mucimanyè to.

237 Yesù musòmbe mwaba awu ne makàsà kaayi mwowesha mâyi to. Kàdi ndumbà wà mu mùsèèsù, ndi mwà kumumòna wènda ùpweka, twanjibi—twanjibi kwakula. . . kumwangata bwà katançi kakesè. Ndi mwà kumumòna upweka ku makàjinyi, wàmba ne: “Ndi. . .” Ne binsonji bimwicikidila pa matàma, ki kwambaye ne: “Ncyèna—ncyèna mwà kucyènza to. Bu—bu—bu mémè ànu mwà kubànda ne cintàkanyi eci kuntu

kwàka, Yèyè's neàmanyè kúndi mupetele mfranga eyi. Yèyè mmumanyè mûndi muyipetè, kàdi's ki cintu cimwèpelè cîndi naaci."

238 Aci's ki cyònsò cìdiYe muswè. Aci's ki cyònsò cìdiYe muswè. Nwamònu anyi? Yèyè kèna ucyùka to. Wèwè lwàkù ne: "Ncyèna ne cîndi ndwa naaci mu byanza byànyì to."

239 Pa nàнку ùvwa ne ndambù wa manànsanshi ne kubandaye naawù. Ki kubàndayè kuntwaku e kudyàmbidila ne: "Kaa, bu mèmè ànu mwà kuMumòna's!" Ki díbà adi kudifindayè ne kufikayè lwà ku ciibi aku mwaba kampànda.

240 Nèнку, to, kabàvwa baMwakidile bîmpè to. Ki kwangatayè mulòndò wà alabasta awu ne kuwùkangulaye ne kuwèlaye pèndè. . . pa makàsà Èndè, ne kutwadija kuMusukula makàsà. Ke kutwadijaye kudila ne: "Kaa, n'Yèyè cyà bushùwà's. Ki Yèyè awu ùndi mubale misangu yònsò mu Bible. Ndi mumanyè ne Yèyè mmufwànyine kucijingulula." Kàdi katanci aka anyi. . . Mmâyì malengapù kaayi bwà makàsà Èndè, binsonji byà kanyinganyinga bîmacila pa makàsà Èndè. Yèyè kàvwa ne cikowelu cyà kuMukupula naaci ku makàsà to, ki kwololayè byanza ne kwangata nsuki yèndè. Nsuki yà mvwàngalà milenga yònsò ayi mikùtulula, ne binsonji bimupwekela pa matàma mùshindù awu. KuMwoweshaye màyi ku makàsà, ne ku musangu ne ku musangu ùvwa mwà, "*kutwà mishìku,*" kuMutwà mishìku ku makàsà, wòwèsha makàsà Èndè màyi mùshindù awu.

241 Yesù ne makàsà manyaanu, ne kakùyi muntu nànsha umwe wa kubùcyùkakù to. Kàdi leelù wa ndaaya mMwambule dîna dyà manyaanu dyà ne munsantu mubùnguluki wa mu malaba, *cintu kampànda* cyà bu nàнку, ne bantu kabàyiiku ne dikima dyà kutwà ku Cyèndè to!

Nèngàmbule nkùrusè mujidila ewu,
Too ne pàndekelelè lufù,

Nèndondè njila pàmwè ne banyaabanya
badyombòdìlbwè bàà Mukalenge,
Ndi mutwàdije ne Yesù, Éyi Mukalenge,
ndombòlèku too ne ku ndekeelu.

242 Ndombòlèku too ne ku ndekeelu, Mukalenge, nànsha byòbi bindòmba cinyì, Bu Yakòbò, ndi ne musààmù wa ditenteka mutù, n'dibwe. Bìdi bishintulula cinyì? CyàkangenzelaYe aci's wè!

243 Kàdi mukàji wa ndumbà mwenze ne luse ewu mwaba awu, wèla mbila, ùdila. Kàdi katanci aka anyì, ki Simonà ewu mwimane kaaba aka, muntu munène uvwa muMubiikidishè bwà kulwa awu, kwambaye ne: "Uhm, uhm, uhm, uhm! Aci's ki cìdi cileeja ne Yèyè mmupròfeta anyi kî n'Yèyè, s'Ùvwa kwikala mumanyè ne mwine awu mmukàji wa ngiikàdilù kaayi wàwa." Mwena lubombo awu's!

244 Ki mukàjì mumanè kujikija... Kàdi Yesù kààkanyungishaku makàsà Èndè to, Ùvwa ànu kacya musòmbe mutàngile mukàjì awu ne umukenketa. Kaa, ntu munange aci's. Kí mbintu binène bitùtù twenza to, ntuntu tukesè tutùtù tupanga kwenza misangu mikwàbò atu. Yèyè kumutàngila, ànu kacya wàmutàngila musòmbe mwaba awu. Kakùyì muntu wa kuMucyùkàkù to; ndekeelu wa byònsò, mukàjì awu muntwamu munkaci mwà kudila ne kuMwowesha makàsà, uvwaku mwenze bu udi umucyùka awu, kukòkabi ntèmà yà bantu. Kàdi Yèyè ùvwa ànu mumutàngile, kàyi wàmba díyi.

245 Simonà mukùlumpè awu mwimàne paanyimà pààpa, wàmba ne: “Uhm! S'nudi numòna ne Yèyè mupròfetà anyi to, kí mmwòmò anyi? S'mvwa munwambile! S'mvwa munwambile! Wikala mupròfetà, nùnkù's mmumanye ne mukàjì awu ùvwa nganyì. Nudi numòna's, tuvwa èkèleeziyà munène kaaba aka, nudi numòna's, tudi bamanyè's, bìdi nànkù. Tudi bamanyè ne Yèyè kí mupròfetà to, Ùvwa mwà kwikala mucimanyè.”

246 Paanyimà yèyè... Paanyimà pàà mukàjì mumanè kujikija, binsonji byà kanyinganyinga abi bmutùnkumukila pa matàma, wowesha makàsà à Yesù. Yèyè... Ngèèla meeji ne kuDyumvwaye ne cyashima ndambù.

247 Éyi Nzambi, mvw'a kujinga ngìkalapù's! Nùnkù's ndi muwowèshe cyàkàbìdì. Éyowa's, mukalenge.

248 Balumyànà wa yààya, mukàjì wa leelù kí mufwànyine kupicila mu cikondo cyà bwalu bukolè bwà kukùpula makàsà ne nsukì yèndè anyi? S'mbifwànyine kumukengela kutwàye mutù panshi bwà kuçyènza, bwà kupeta nsukì búngì bukùmbane yà kukupula naayi. Éyowà's, mukalenge, yònsò mmikòsa.

249 Kàdi mwaba awu, makàsà à Yesù, muntu nànsha umwe wa kutàngila... (ànu basendeki), musòmbe mufwishibwe bundu, ne cimpèpèmpè aci ku makàsà Èndè. KuMusukulayè. Paanyimà pàà Yèyè mumanè—paanyimà pàà Yèyè mumanè kujikija, Wàkatàngila mukàjì awu byenze bu ùswa kwamba ne: “Mbìmpè.”

250 Ùjuula mèsù, kwamba ne: “Simonà, Ndi ne bwalu bwà kukwambila. Wèwè kuMbùkila mwab'ewu, kàdi nànshapù kulwa kuNgaakidila ku ciibi. Kwena muMpèeshèku nànsha màyi bwà kwowesha makàsà Àanyì to. Kwenaku mungeele maanyì pa mutù Wànyì paNgààbwèdì, bwà kuNguumusha dyosha dyà dibà to. Kwenaku muNtwe mishikù yà mwakidilu mulenga paNgààbwèdì nànsha. Kàdi mukàjì mwenze ne luse ewu,” (Kaa, ekèlekèle.) “muntu wa pambèlù ewu, ndumbà wa mu mùsèèsù, kàvwa nànsha ne màyi bwà kuNgwowesha ku makàsà to kàdi muwoweshe ne binsonji byèndè. Kàvwa ne cyàkuàkupula naaci to, kí kwangataye nsukì yèndè, kuàkupula. Ùdi ànu munkaci mwà kuNtwà mishikù ku makàsà. Mpindyewu Ndi muswè kukwambila wèwè ne: mpèkaatù yèndè, yìvwà búngì

kabùyi dibala ayi, mmimufwidiibwe luse.” Ncyà bushùwà, kàyì wambaku bwalu bwà yèndè to. “Yèbè mpèkaatù, yidì búngì kabùyi kubala ayi, mmifwidiibwe luse.”

²⁵¹ Nènku leelù ewu pàdì Yesù, mwimàne pambèlù pàà ciibi cyà malongolodi à cyena Mpenta, malongolodi à ba-Baptistes, malongolodi à ba-Méthodistes, uteeta kwalukilamù cyàkàbìdì ne mpenta, kàdì bantu bàdì munkacì mwà kuMulèngulula. Paanyimà pàà nwènù...bukwa-pànù bwènù ne bikwàbò mbiMusakile pambèlù pàà èkèleeziyà, N’Yèyè ewu mwimane, uteeta, wèla mbila bwà kwalukilamù cyàkàbìdì. Kàdì, kaa, s’ki cintu cyà cyenza luse citàmbe cìndì mumòneku kacya bandela. Kabàyi Nèndè dijinga to! Yèyè, pambèlù, ùkookola, ùteeta bwà kubwelamù. Ki cintu cimwècimwè aci cidìYe ùteeta bwà kwenza. Bwà cinyi? Bwà cinyi? Ùvwa pambèlù.

²⁵² Kabàvwakù baMwimanshe pambèlù to. Bàcivwa ànu baMwimbila, bàyiisha bwà bwalu Bwèndè, kàdì bapange kujingulula ne Yèyè kàcivwa munkacì mwàbò to. Ncyà bushùwà. Bàvwa ànu kacya batùngùnuke. Bwà cinyi? Bàvwa ne mèsù bitaayitaayi. Bàvwa munkacì mwà kutàngila ànu citanda cyàbò cinène aci. Bàvwa babanji. Bàvwa bènda bàkeba bulongolodi bunène bùvwàbò beenamù abu, bateeta kubwibaka, kufikisha bidimba byàbùngì bwà kubwelamù, kàdì kupangabo kujingulula ne Kàcivwakù to. To, to. Dyakula dyà mu myakulu kadivwa dibàpangika to. Kupangabo kujingulula dipangika dyà mikenji minène, yà bukolè yà Nzambi Uvwa ubàlenga ku mwoyi ne utengula mwoyi awu, usùsulakaja bintu byà pa buloba ne unùvula bu ditala. Kaa, bàvwa . . .

²⁵³ Wèwè muiishe mùshindù awu mu èkèleeziyà wabò, mbafwànyine kukwela pambèlù. Kàdì’s ki mùshindù awu ùtù Nyumà Mwimpè uyiisha. Yesù wàkamba ne: “Nwènù lukongo lwà nyòkà yà ntòkà! Nwènù—nwènù nyòka mu bisoosa!” Ne Yone wàkamba cintu cimwècimwè aci, yèyè pèndè, ne bantu banène balaaba, bàvwa misangu yònsò ànu bàlamunangana cisèba ne mfimbù. Ncyà bushùwà.

²⁵⁴ Kàdì bàkapangila kujingulula ne Kàvwa munkacì mwàbò to, bwalu kabàvwa ne Cyà nàнку to. Nwamònu anyi? Pa nàнку bàvwa bòbò ne kaacintu kalengeja ne bilòngù kàvwa kàbàtuuta cyanza paanyimà, kàmba ne: “Wèwè lwàkù ushàale ànu wa mwab’ewu, fùndisha dìnà dyèbè apa, nènku—nènku netùkubweje mu buumambala bwèbè abu. Nènku nda ùkangate mukàndà wèbè kùdì èkèleeziyà mukwàbò awu nàнку netùkwakidile, ne—ne bikwàbò. Mpindyewu, mucipù wèbè newikalè ne mbùngì kaayi ku cidimu cyònsò?” Nudi numòna’s, ki cyòci aci’s: “Mubanji, kàyì dijinga ne cintu nànsha cimwè to.” Kaa! Kàdì bìdì bìkukèngela cintu cidì citàmbe bunène ne kwèna naaCì to, Yesù mwimàne pambèlù ùteeta bwà kwalukilamù ne mpenta.

255 Nudi nwela meeji ne ncinyi cidi cifwànyine kwenzeka dilòòlò edi mu èkèleeziyà wa ba-Méthodistes bu Nyumà Mwímpè mwà kupona pa èkèleeziyà ne kubangabò kwela mbilà, kutùpika, kwakula mu myakulu ne kwenza maalu bu bakwàcike maalà...musumbà wa bantu bakwàcike maalà? Mòna's, Cipàngù aci—aci ncifwànyine kwimansha èkèleeziyà wa ba-Méthodistes awu pambèlù pà Cipàngù aci. Bwà aci's nudi bamanyè. Ncinyi cìvwà cifwànyine kwenzeka mu èkèleeziyà wa ba-Baptistes bu cyà nàнку mwà kwenzeka? Cintu cìmwècìmwè aci. Beena Mpenta? Mòna's, kùdi bààbùngì bàà kùdìbo, ncyenzèke cintu cìmwècìmwè aci. Bushùwà. Èyowà's, mukalenge, kì mbafwànyine kupetangana ne macimbu bu nàнку to. Mbafwànyine kwamba ne: "Mòna's, mbyangakaje mene ne tàpì yètù mipyamùpyà." Uh-hum, cyà bushùwà. Ekèlekèle! Ekèlekèle! Mmusumbà wa beena dikènga's wè. Ncyà bushùwà.

256 Èè, èyo, Ùvwa naabo musangu kampànda, Wàkenda naabo munkaci mwà bitèekedi byà myèndù byà ngòlò mwandamutekète. Kàdi dyandamuna ndyòdi edi: màngumba ne bintu byàbò byà pa buloba, bèèpiskòpò bààbò, baa kàrdinalè, ne dinanga dyàbò dyònsò dyà maalu à pa buloba, bàvwa baMwele pambèlù ne bàvwa bapangile kujingulula dipanga kwikalaku Dyèndè. Nèнку èkèleeziyà . . .

257 Mpindyewu, citwenza ncinganyi bwà kuMwalujamù? PìkalaYe pambèlù pàà èkèleeziyà wa Mpenta mpindyewu, citwenza ncinganyi bwà kuMwalujamù? Nebikèngele masungulangana à cyapàmwè à bantu bwà kuMwaluja anyi? Nebikèngele disungula dyà paapà mupyamùpyà, kàrdinalè mupyamùpyà anyi? Anyi pàmwàpa nebiikèngele—nebiikèngele—nebiikèngele dijuula dyà dìngumba dipyadipya. Aci kacyàkumana bwalu to! Aci kacyèna ne cyenzaci to. Dingumba dipyadipya kadyàkwenza bwalu to, mupyamùpyà—kà—kà—kà—kà—kàrdinalè mupyamùpyà kàakucyènta to, mpaasàtà mupyamùpyà kàakucyènta to, mutangadiki mufucìibwe bimpè kàakucyènta to. Kakwèna cintu nànsha cìmwè pa buloba apa cidi mwà kucyènta to pa kuumusha ànu wèwè mwinè. Mmunyi mutùdi tuMubwejamù? Kì nku masungulangana to. To, mukalenge. Twètù katwèna twela tukàndà bwà kwalujamù Yesù to, bwalu Yèyè kàakubwelamù to.

258 S'ki cyòci eci—ki cyòci eci: "Muntu yèyè muumvwe Dìyi Dyànyì ne mukangule ciibi." Mpindyewu, tudi bamanye ne ciibi ncinyi díbà adi. "Muntu yèyè mukàngùle ciibi, muumvwe Dìyi Dyànyì."

259 Kì ne—kì nne "Bu èkèleeziyà kampànda . . . Bu bulongolodi kampànda . . ." To, mukalenge. Yèyè kàtu ùkwàta naabi mudimu to, mbifwè ne kwàbì nkujike ànu kwònsò kwònsò aku. Yèyè's mmucikine, Ùtu misangu yònsò ànu mucikine. Wàkamba ne Ùtu mucikine! Ne Ùcidi kàbìdi mucikine dilòòlò edi!

²⁶⁰ “Kàdi muntu kanà yònsò ewu,” Méthodiste kanà yònsò ewu, Baptiste kanà yònsò ewu, Presbytérien kanà yònsò ewu, anyi mwena Kàtòlikè kanà yònsò ewu, mwena Église de Dieu kanà yònsò ewu, Nazaréen kanà yònsò ewu, mwena Mpenta kanà yònsò ewu. “Muntu kanà yònsò ùmvwa Diyì Dyànyì ne wàkangula ciibi, Nèmbwèlèmù ne ndye nendè ne yèyè pàmwè Nanyì.” Ki mukenji wa èkèleeziyà wa beena Mpenta ngwòwò awu. Kí nkuteeta kufùùlulula bulongolodi bwà cyena Mpenta to, kàdi kufùùlulula Dibènesha dyà Mpenta mu mwoyi wà muntunkààya. Ki mùshindù ùmwèpelè ngwòwò awu. “Nènku Nèndye pàmwè nendè, ne yèyè, ne Mèmè.”

²⁶¹ Ncinyì cìdì mùsànjeela wa èkèleeziyà...mukenji wà èkèleeziyà ùtùlongesha dībà adi, ùtùlongesha—ùtùlongesha? Kí nditanta mu Nyumà to. To, mukalenge. Ndibwucidila dyà mu Nyumà, tudi dībà dyònsò ne dibwucidila. Ngenzeli... Mì—misànjeela yà èkèleeziyà ne mukenji kùdì cikondo cyà èkèleeziyà cyònsò ùvwa ùpìisha bwena dingumba. Mukenji wònsò mutumina èkèleeziyà, èkèleeziyà ùvwa dībà dyònsò ànu wènda ubwucidila ne kàyì mufwanyine kuMutèèleja to. Mu—mukenji wà èkèleeziyà ùvwa ùdyùla màngumba. Nènku mmalelà beena Kilistò basopakaja, bàà ku dīnà, ncyà bushùwà, bàdi kabàyi ne cidibo bamanyè bwà Nzambì anyi bwà Nyumà Mwimpè to. Aci’s ncilelèlà ànu bu mūndi mwimane ku cibumbà cyà ku cyambilu eku dilòlò emu. Bidimba bimpè byà civùmvù, ànu bwà kutwidiibwa mukana Mwèndè.

²⁶² Pòlò wàkadimwija ne, bàà Bisàmbà byà bendè bàvwa ditàmbà. Mpindyewu, ndi muswè bàmwè bàà kunùdì, bu nwènu mwà kuswà, bwà kubuulula mu Loomò, nshapità wa 11, mvnsà wa 15 too ne ku wa 27, ànu bwà nwamòna mwà kucifùnda, nwènu bwònsò. Nènku pashìishe, bu mùdìbi ne dībà dikaadi diyè bikolè, nènùtèèlele eci mpindyewu ànu kumpàla kwà kushiyangana, bwalu cidi... Mpindyewu, Loomò, nwènu baswè kucifùnda, 11:15 too ne ku makùmi àbìdì ne...too ne ku 27. Pòlò wàkabàmbila, kubàmbilayè, wàkula ne bàà Bisàmbà byà bendè mwaba awu, Loomò, wàkamba ne: “Bu Nzambì...” Mpindyewu, tèèlejàayi patùdì tujikija pa bikondo byà èkèleeziyà apa! Pòlò wàkamba ne: “Bu...Nzambì kààkeepula mucì wà Olivà mulèlèlà to, kàdi wàkawùkosa bwà bupidyà.”

²⁶³ Ncyà bushùwà anyi? Cyàkabàfikisha ku dikòshiiibwa ncinyi? Bwalu bààkabènga Mpenta. Ncyà bushùwà anyi? Mu Ditùkù dyà Mpenta bààkaseka ne kupenda Nyumà Mwimpè.

²⁶⁴ Pàvwà Yesù pa buloba apa, Wàkamba...KuMubiikilabò—kuMubiikila ne: “Beelèzèbùlà,” bàmba ne “Ùvwa dyabùlù,” ne “Ùvwa mwena lubùku,” ne bikwàbò byònsò.

²⁶⁵ KwambaYe ne: “Ndi nufwila luse bwà bwalu ebu, kàdi pààlwà Nyumà Mwimpè kanwàkudiku bibì Bwèndè to; bwalu nwènu bààkule bibì Bwèndè, kacyàdyàkunufwidiibwa luse to.”

266 Ne nùvùlukaàyi pààkatùmà Yesù bayiidi Bèndè ne mudimu ne: “Kanùyì kùdì bàà Bisàmbà byà bendè to.” Ncyà bushùwà anyì? “Kàdì ndàayi ànu kùdì mìkòòkò mìjìmine yà Izalèlèlà.”

267 Mmunyi mwàkadipiishabo bwòbò biinè? Ku dipenda Nyumà Mwìmpè, bàbìkila Nyumà wa Nzambì ne “ncintu cyà bukooya.” KuMusekabo pàvwàbo bàja maja mu Nyumà, ne bikwàbò, mu Ditùkù dyà Mpenta. Cimenga cimwècimwè aci, kuMusekabo, Titus kubàshèbelamù ne mashi ààbò kutuuta nkoka kupatukila ku ciibi cinène. Bààkadya bânà bààbò balela, ne bikwàbò byònsò, mu cicyà cimwècimwè aci. Nènku aci’s ncyà bushùwà. Dimwè dyà ku matùnga matàmbe bunène à pa buloba kuvwijiibwadi dyà ditàmbe kushàadila, ne dyàkatangalajiiibwa ku nte- . . . mpeepèlè yìnaayi yà buloba. Bwà bwalu kaayi? Bwà bupidyà’s! Ne aci’s ki ciwwa cikuuku cyà ku cibangidilu, mucì wà ku cibangidilu, Izalèlèlà.

268 Kàdì Pòlò kì mmucyàmbe mwaba awu anyì? Nganyi udi mupete Mufùndu ànu mwaba awu mene? Udi mucipete anyì, Pat? Juukila kuulu ùbalè kutwadijila ku mvensà wa 15 too ne ku wa 27. [Mwanèètù Pat ùdi ùbala Loomò 11:15-27—Muf.]

[Bwalu pùikalabi ne dimanshiibwa dyàbò dìdì dipungishiibwa dyà buloba, ncinyi cùkala dyakidiibwa dyàbò—dyàbò, s’mmwoyi kuumukila ku lufu?]

[Bwalu pùikala mamuma à kumpàla à cijila, àdì alonda ngàà cijila kàbìdì: ne pùikala muji wà cijila, ke mùdì kàbìdì matàmba.]

[Nènku pùikala àmwè à ku matàmbe makòseke, nènku wèwè, mwikale mucì wà olìva wa mu cisuku, wakasomekiibwamù munkaci mwàbò, ne kwabanyangana naabù muji ne maanyi à mucì wa olivà;]

[Kanùdìtambishi kumpàla kwà matàmbe to. Kàdì wèwè mudìtambishe, kì ngwèwè ùdi utwala mìji to, kàdì mìji ke yìdì mikutwàle.]

[Dìbà adi udi mwà kwamba ne: Matàmbe àkàkòshiibwa, bwà ngaamòna mwà kusomekiibwamù.]

[Èè; mbwà bupidyà ke bwàkàkòshiibwawu, . . .]

Tèèlejàayi: “bupidyà.” Èyo, tùngunukà.

[. . .nènku wèwè udi mwimane ku diitabuujà. Kwìkadi wàdìtambisha to, kàdì ciina:]

[Bwalu pùikala Nzambì kàyì mwepule matàmbe à mu bufuki to, wadimuka bwalu kààkukwepula ne wèwè kàbìdì to.]

[Mònaayi dìbà adi bwìmpè ne disù dikolè byà Nzambì: kùdì aba bàdì badishinde, disù dikolè; kàdì kùdì wèwè,

*bwimpè, pawikala mwà kutungunuka mu bwimpè
bwèndè: cyanààna wèwè pèèbè neükòshuibwè.]*

*[Nèнку bwòbò pààbò, bwòbò kabàyi bashààle
bakalame ànu mu bupidyà to, nebàsomekiibwemù:
bwalu Nzambi mmukumbane bwà kubàsomekamù
cyàkàbìdì.]*

*[Bwalu pìikalabi ne wèwè wàkakòshuibwa ku mucì wà
olivà udi wa cisuku ku ngiikàdilù, ne wakàsomekiibwa
bibèngàngàne ne ngiikàdilù webè ku mucì wà olivà
mwimpè: mmisangu bungi kaayi yikala aba, bàdì biikale
matàmba à ku cifukilu, mwà kusomekiibwa ku mucì
wàbò sungasunga wà olivà?]*

Hmm!

*[Bwalu ncivwa mwà kuswa, bânà bèètù, bwà nwènù
kupanga kumanya bwalu busokoka ebu, bwà kanùlù
kudibala bu beena meeji mu mmwenenu yènù nwènù
biine to; bwà ne citupà cyà Izàlèèlà cyàkapòna mu
bufofo, too ne pààbwela kaabujimà kàà bàà Bisàmbà byà
bèndè.]*

*[Nèнку dìbà adi Izàlèèlà yònsò neàsungidiibwè: bu
mwàkafundàbo ne: Mu Sìònà nemùpàtukè Mupikudi, ne
neùmushile Yakòbò dipeetù dyà maalu à Nzambi:]*

*[Bwalu eci ke cipungidi cyànyì kùdìbo, pangiikala
mwà kuumusha mpèkaatù yàbò.]*

269 Nudi nuCyùmvwà anyì? Pòlò mmwambè ne: “Pìikalàbi
ne Izàlèèlà wàkabànda e kumòna bimanyinu mwab’ewu
byà Nyumà Mwimpè, kàdì kukòshuibwa...” Vùlukàayi ne,
bwalu bààkabènga mukenji wà Pòlò (dibàtiiza mu Dìnà
dyà Yesù, kanyinganyinga ne dibàtiiza mu Dìnà dyà Yesù,
bimanyinu ne maalu à kukèma bilonda mwena kwitabuuja),
kàdì bààkaCibènga. Ki bòbò kwamba ne: “Mònaayi, tudì
tukudimuka tuya kùdì bàà Bisàmbà byà bèndè.” Ncyà bushuwà
anyì?

270 Tùmonèbi, ngèèla meeji ne civwa ku...kwàkabìikilàbo
beena Kilistò bwà musangu wà kumpàla, kùvwà nku Efèsò, anyì,
ku Antiokiyà.

271 Mpindyewu—mpindyewu, pìikalàbi ne—pìikalàbi ne mucì
wà kumpàla wùvwà wà cijila, matàmbà àwù à cijila, mucì
wà ku cibangidilu awu, ne bwalu bààkabènga kwitabuuja
Mukenji wà beena Mpenta úvwà Pòlò ùyiisha (Bìdì nàнку awu
anyì?), Nzambi wàkabàkòsa ne kwangata mucì wà olivà wa mu
cisuku (uwva mwikàlàngàne bàà Bisàmbà byà bèndè, twètù)
ne kutùsomekamù bwà twamòna mwà kwikadila ne mwoyi ku
matàmb-...bìdì bìdìisha mucì awu.

272 Mpindyewu, nebìikale bishi mu ditùkù edi patùdì tubènga
Mukenji wa Mpenta ùdì mutwàdije mu bikondo byà èkéleeziyà

too ne ku ndekeelu, mmisangu búngì kaayi yìdì Nzambi mukumbane bwà kujoomonaku mucì wà kale wà cisuku awu, twamb'eku twamb'eku, ne kwalujaku mukwàbò awu? Bwalu yéyè neàWùbenge, bwà bupidyà. Mpindyewu swikakajàayi aci ne dileesònà dyà mu dindà emu. Nudi bamanyè mwaba utùdì biimànyine mpindyewu, kí mmwòmò anyi? Tukàadi ku cikondo cyà nshìikidilu bwà dyumushiibwa dyà Èkèleeziyà wa bàà Bisàmbà byà bendè, Dyambwibwa Dyèndè; ne dibwela mu cyalu dyà Nyumà Mwìmpè bwà kulwa Yè kùdì beena Yudà, ne bwà Yesù kuDimanyisha, bwà kutwà binunu lukàmà ne makumi anaayi ne binaayi abi cìtampì. Ki bwalu mbwòbù abu's. Kwaluja mucì wà ku cibangidilu (kwalukila mu Dibènesha) mu Izalèlèlà cyàkàbìdì.

²⁷³ Yesù kààkushààla mwimane pambèlù pàà ciibi cyèbè aci bwà kukookola dîbà dyònsò to. Nekùlwe cikondo cyàMutondabi ne kuumukaYè, dîbà adi wèwè ke wàkookola kàdi kwàdyàkuMupeta to. Lwàkù pàcìdiku dîbà apa. Lwàkù pàcìdiku dikookola apa. Kùdìku cibàngà ne cintu nànsha cimwè pàdìci kaciyi dibatiiza dyà Nyumà Mwìmpè wa bwena wakapetabò ku Mpenta awu, ne dibatiiza dyà mu màyi dyà mùshindù ùmwèùmwè adi, bintu bìmwèbìmwè byàkenzàbo kuntwaku abi. Kulekediku cintu nànsha cimwè cìtèèka ní ncinyi ní ncinyi mu mwoyi wèbè pàdìci kaciyi aci to.

²⁷⁴ Mpindyewu, bwenu nwènù balunda bàànyì beena Kàtòlikè, lekelaayi nwwàmbilèku cintu kampànda, nudi nwitabuuja Màriyà virgò awu. Virgò Màriyà, mwikàle maamù wa Yesù Kilistò, byàkamukèngela bwà kuyayè ku Mpenta ne kuujiibwa tètè ne Nyumà Mwìmpè, ne wàkenza maalu bu muntu mukwacike maalà. Úvwa munkaci mwà lukàmà ne makumi àbìdì abu, mwikàle ne dibatiiza dyà Nyumà Mwìmpè, kwàkula mu myakulu ne wènza maalu bu mukàji mukwàcìke maalà mwaba awu, ku bwenzeji bwà Nyumà wa Nzambi. Nènku pìikalàbi ne byàkakèngela bwà virgò Màriyà kwenza nànkù bwà kubwela mu Butumbi, mmunyi munwàbwelaMù, ne ní ncinyi ní ncinyi cyà cishààdile ku aci? Elààyiibi meeji bwà cyòci aci. Ncyà bushùwà.

²⁷⁵ Ba-Baptistes...Muyiishi wa ba-Baptistes awu udi paanyimà apa ewu mmuswè kwikala mutwishiibwe ne ncyambila ba-Baptistes pààbò. Aci's mbwà muntu kanà yònsò, nànsha yéyè nganyi.

²⁷⁶ Pa nànkù ànu kukashààla wa mu èkèleeziyà ne kwamba twitabàayi kampànda, ne kuya mu èkèleeziyà dindà dyònsò dyà dyàlumingu, kabyèna bikwambulwishaku nànsha byà kànà to. Udi munkaci mwà mwà kuseka Nzambi. Anyi ikàlà mwena Kilistò mulelèlà anyi kwikadi cintu nànsha cimwè to. Ikàlà anyi ku luuyà anyi ku mashika. Anyi ikàlà pambèlù...Bwalu kwena mwà kwikala...Kacya kanutuku banji kumòna nyuunyì mufiike mutòòke to, kacya kanùtukù banji kumòna muntu mukwàcìke maalà mwikala kàyi mukwàcìke to, kacya kanùtukù

banji kumòna ngènzàmpèèkààtù munsantu to. To, nànshapu, kabyèna mwà kwenzeka to. Anyi udi múle tètè ne Nyumà Mwímpè ne Nzambì mwikale ne mwoyi munda mwèbè, anyi kwèna nendè nànsha wa mafi to. Udi—udi nàнку anyi kwèna nàнку to.

²⁷⁷ Pa nàнку ki bwà cinyi udi ne cyà—udi ne cyà kuvùluka ne Yesù mmwimane ku ciibi cyèbè, ne vùlukàayi mulayi wà Nzambì kaaba aka ne Yèyè neénzè nàнку mu matùkù aa, bwà cinyi? Bwà dibènga. Cyàkafikisha Izàlèèlà ku dikòshiiwba, ku mucì wa ku cibangidilu awu ncinyi? Bwalu bààkabènga Mukenji wà Pòlò wà Mpenta. Kàdi nudi nwi tabuuja ne eci ki cikondo cyà ndekeelu cyà èkéleeziyà anyi? Bible ngudi mwámbe nàнку's! Mbámbe bishi bwà cìkala mwà kubènzekela? Nebàkòshiiwbe bwà dibènga dyà Mukenji wà Mpenta, ne pashiishe Nzambì neàlukile kùdi beena Yudà.

²⁷⁸ Ne Izàlèèlà mujimà dîbà adi neàsùngidiibwè, bwalu Yèyè neàbàngàtè bu ditùnga, kî mbu muntu-nkààyà to. Kàdi bwènu nwènu ne mèmè mbu muntu-nkààyà, bwalu Yèyè wàkalwa kùdi beena Yudà. . . Byenzedi, mu Mukàndà wà Byenzedi, Wàkalwa kùdi bàà Bisàmbà byà bendè bwà kwangata “cisàmbà mu bàà Bisàmbà byà bendè bwà Dîna Dyèndè,” Mukàj'Èndè-musèla. “Cisàmbà,” ewu apa, ewu pàpa, ewu lwà apa, ne Yèyè ùdi ùkwàta mudimu neetù bu bantu-nkààyà, kàyi ucyùka dikòbà, twitàbàayi, anyi diikala. Ùdi ùkwàta neetù mudimu bu bantu-nkààyà, cintu's n'cilòngò Cyèndè cyàtèèkàYe pa cyoshelu Cyèndè. Kàdi bu beena Yudà, Yèyè wàkakwàta mudimu misangu yònsò ne Izàlèèlà bu ditùnga, bàdi ditùngà dyà bantu, ditùngà Dyèndè.

²⁷⁹ Ndi ne disànkà dilòlò edi dyà ne tudi ne Mukenji ewu. Nèнку ndi ne disànkà dyàbùngi bwà munùdi balwe mwab'ewu, ne dilwa dyènu adi ndi mudyanyishe bikolè be. Ndi nsàkidila bikolè Nzambì wa Bukolè bwònsò bwà kumfikisha ku dimòna cìndi mumòne eci, ne mukùmbane kucifikishila èkéleeziyà ewu, nèнку mpindyewu Cyùmùkù pa mwoyi wànyì. Bwalu cikondo kampànda Nyumà Mwímpè wàkakwàta mudimu mu mwoyi wànyì, nciiyiku mwà kuMusakila to, byàkankèngela ànu bwà mèmè kwenda Nendè.

Kùdi bintu bìbìdi bìndì ndyumvwa mulombodiibwe bwà kwenza.

²⁸⁰ Kuya ku Shreveport, mu Louisiane, bwà disangisha kampànda pàmwè ne Mwanèètù Moore. Nànsha mukàjàànyì udi musòmbe mwaba awu ùdi mwà kunwàmbila. Kukaadi mbingu yìndì ànu ngèela lubila ne: “Ndi muswè kuya ku Shreveport. *Bwà cinyi?*” Kàdi ewu yònsò uvwa kuntwaku ku Shreveport mmumanyè ne *mbwà cinyi* mpindyewu. Kacya kabàtukù banji kumòna anyi bumvwe cintu bu cyòci aci to. Bayiishi bàfùmina myaba yònsò, ba-Baptistes ne bàà mîshindù mîshiilèshiiilàngàne.

Muntu kampànda kwamba ne wàkabanga, ànu ne àtèkè byanza byèndè pa frigo, ki Nyumà Mwímpè kumutuùlukila kwamba ne: “Nda ku Shreveport, mu Louisiane, nebàkwambileku cyà kwenza.” Kumwambila dîna dyànyì ne mwaba wà kupeta... Yèyè ne: “Yèyè neàkwambile cyà kwenza.”

²⁸¹ Mémè kwamba ne: “Ciinà cyà mâyi cidi bwáshi lwà kwinshi kwà bibàndilu kwàka. Wèwè udi dijinga ne dibatiiza dyà Nyumà Mwímpè.” Nènku mwaba awu...

²⁸² Pa nàнку bintu byà mùshindù awu, bantu bààkula, ne—ne biprófetà ne bintu byà didyànjila kwamba maalu àkenzekà ànu mwaba awu munkaci mwètù.

²⁸³ Pashiishe mémè kwamba ne: “Ndi ne cyà kuya ku Jeffersonville bwà kufùnda mukàndà ewu, bwalu ncyèna mumanye ntàntà bule kaayi ùndi ne cyà kwikala mwab’ewu to. Kàdi bu mémè mwà kwamba Eci ne kufùndiibwaCi, paanyimà pàà mémè mumanè kuya Méyi neàtùngunuke ne kwikala ne mwoyi.” Ndi ne maalu-malonda mafùnda kaaba aka ikalà mwà kusanganyibwa mu mukàndà. Nènku ndi mulwè mwaba ewu bwà kucitwala kumpàla kwà èkèleeziyà bwà kupeta disonsodiibwa dyà Nyumà Mwímpè, bwalu ncivwa mumanye maalu aa mémè mwìnè to. Aci’s ncilelèlè. Aci mmu Dîna dyà Mukalenge, aci’s ncilelèlè ne: “Ncivwa mubimanye to.”

²⁸⁴ Mpindyewu ndi ndyùmvwa musùùlùdìibwe, ndi ndyùmvwa ne Nzambi mmutùtwàdile Mukenji. Ndi ngiitabuujà ne tukàadi ku ndekeelu kwà njila, Ndi ngiitabuujà ne dîbà dyàkùmbanyi bwà dimwèneshiibwa dyà Nzambi kumanyishiibwadi munkaci mwètù. Nènku ncyèna mumanye ne nebìnenge ntàntà bule munyi to, kàdi dîbà dikaadi pabwîpi.

²⁸⁵ Netwikale bindile bwà muntu munène awu kujuukaye. Mmufwànyine kulwa mu ditùkù dyànyì, mmufwànyine kulwa mu ditùkù dyà bitende, ncyèna mumanye to. Mmufwànyine kwikala ànu munkaci mwètù mpindyewu, katwèna mwà kumanya to. Nyumà Mwímpè ùdi kaaba aka bwà kutùlombola too ne ku cikondo aci, dîbà adi pàtùlombola mulombodi awu yèyè neikale ànu mulaabiibwe kùdi Nyumà Mwímpè; Eliyà awu—awu, mu bushùwà bwà bwalu, wikala mwà kulwa awu. Kàdi neikale mulombodi wikala mwà kukùdimuna myoyi yà bânà, anyi, kwaluja myoyi yà bânà ku Mukenji wà Taatù, kwalukila ku Mukenji wà Taatù wètù wa mu Dyulu wà mu Ditùkù dyà Mpenta pààkapòngololàYe Nyumà Wendè.

²⁸⁶ Bukesè bwàci ebu, ndi mubùtwàle ànu menemene ne mwànyì mwónsò ku maalu-malonda ne Bible, ne kuleeja ne cintu aci ncitwàdiye kwenzeka ànu mu bikondo byónsò byà èkèleeziyà, ne ki cyòci leelù ewu, kuleeja ne màngumba mmulawu kumpàla kwà Nzambi. Ndi ntèkemena ne aci ncimana kushindika mu meeji ènù, ku Bible, ku byenzi byà bapostòlò, ku maalu-malonda ne byónsò. Aci...

287 Ne kakùtuku kwanji kwikala musangu nànsha ùmwè ukaadiku Nzambì muvwije Èkèleeziyà Wendè bulongolodi to. Mamwëndè wa maèkèleeziyà mavwija malongolodi mbalombodi bàà myanzu bàà Kàtòlikè kàà cyena Loomò. Èkèleeziyà wa Kàtòlikè wa cyena Loomò, ke mamwëndè wa malongolodi awu. Nènku pàdì ànu ditàbuluja dikùtuka mu musumbà kanà wònsò wà beena Mishòònyì, bàdi bàalukila buludi ne benza cintu ànu cimwècimwè aci. Ne Bible mmwambè ne: “Yèyè ùvwa mukàjì wa masandi. Ne yèyè awu, ùvwa ne bàna bàà bakàjì mbwena kwamba ne èkèleeziyà yà mifùmine ku yèyè.” Bìvwa bìkèngela kwikalabò bakàjì, bwà kwikala bandumbà. Ki yèyè awu. Pa nàнку tudi basòmbe. . .

288 Kàdi wàkamba kàbìdì eci ne: “Kanuciinyi to, nwènu kasumbù kakesè kàà mìkòòkò, ndiswa dimpè dyà Tatwènu bwà kunùpèesha Bukalenge.” Pa nàнку byenzekeku ne twètù bwònsò, mu ditùkù adi, nwènu ba-Méthodistes, ba-Baptistes, cyònsò cinùdì aci ne: “Ewu yònsò wakàngula ciibi awu, Nèmbwèlèmù bwà kudyà nendè pàmwè.”

289 Tubadiibweku, bàna bèètù wanyi bàà balùme, bàna bèètù bàà bakàjì, twàbadiibwakù pèètù mu kasumbù kakesè kàà mìkòòkò aku mu ditùkù adi. Twikalèkù pèètù citùpà cyà ku kasumbù kakesè kàà mìkòòkò kùkàla munkaci mwà kwindila pààlwàYe, bu mùdìYe ùlwa bwà kukàmbula kuya naakù dyàmwàmwa dyà buloba. Bwalu Dyambwibwa adi—adi nedùikale dyà buloba bujimà. “Nekwikale bàbìdì pa bulààlù, Nèngàngate umwe; bàbìdì mu budimi, nènku Nèngàngate umwe.” Bileeja ne nebiikale elu luseke lwà buloba bufùku ne mundaamunya ku lukwàbò luseke, nwamònu’s. Pa nàнку, bìdì ne: “Bàbìdì nebiikalè mu bulààlù, bàbìdì nebiikalè mu budimi,” nwamònu’s, “Nèngàngatè umwe wa ku bòbò.”

290 Nènku ànu bu mungàmbì mu dindà emu, nenwikale munkaci mwà kwendesha màshinyi mu njila dìmwè dyà ku matùkù aa, uyiikilangana ne maamù, dyà ukenzakana anyi, yèyè muyè. Nenwikale basòmbe ku mèèsà, munkaci mwà kunwa kàfè kèènu—kèènu anyi mukanci mwà kudyà cyàkudyà cyà dindà, anyi—anyi cikampànda, kàdi katanci aka anyi, dyà ukenzakana anyi papa kàciyipù kàbìdì to. Aci ncyà bushùwà menemene. Cidi cìlwa, kàdi katwèna bamanyè ne ndìbà kaayi to. Kàdi bwalu bùdì ne, pàkaadiku kujike dìbà adi’s nkujike, dìbà adi kakwèna cikwàbò cintu cyùdì mwà kwenza bwà bwalu abu to. Wèwè udi wamba ne: “Nkàadi muumvùmwè aci ntàntà mule.” Kàdi’s nèucyùmvwè bwà musangu wèbè wà ndekeelu. Ncyà bushùwà. Necyenzeke bwalu N’Dìyì dyà Mukalenge. Nènku, nwavùlukaayi ne, Cikaadiku cipangile musangu kampànda munda mwà malòlò mwandamukùlù àmwà munkaci mwà kuyiisha aa anyi? Kàdi cyà—cyàkambà Yesù mwab’ewu, ncyenzeke, ne cikumbaaaje cikondo ne cikondo cyà èkèleeziyà ànu mu cyòcì menemene.

291 Nènku tudi tumòna cikondo cyà èkèleeziyà eci

cidibwinkemù, ne ànu pa dîbà mene. Nànsha mene mu dîndà emu, mu kwangata cimfwànyi cyà virgò, cikondo mene cìvwà virgò mukùtākàne. . . Mpindyewu, nudi bavùlùke ne, Bible mmwambè ne virgò mukùtākàne. . . pààkeediibwa lubilà ne: “Mònaayi, Mubàki nyà ùlwa,” dilwa dyà Mukalenge, diyiiisha dyà Dîyi. Ne pashiishe cyàkenzekà ncinyi? “Cikondo cikaadi pabwîpi, bombes bwà mushîndà ne bikwàbò byònsò mbilongolola,” bayiishi bàdi munkaci mwà kunyemakana mu misèèsù ne batwàdije kukobola Mukenji.

²⁹² Nènku pàdîbo ànu benza nànkù, dîbà adi èkèleeziyà munène, virgò mukùtākàne awu, ùdi wàmba ne: “Aa, èè, twètù’s tudi ba-Presbytériens bàà ntantà mule, pàmwàpa tudi bafwànyine kulonga bwà kujandula. Èyowà, nudi bamanyè’s, ngeèla meeji ne tudi bulelèlè dijinga ne Nyumà Mwîmpè.” Nènku bàdi munkaci mwà kufùnda tuumikàndà twà dibala ne bikwàbò byònsò pa Bwalu abu mpindyewu, ki kumònanganabo naabi eku. Ki bòbò kwamba ne: “Nudikù mwà kutùpèeshakù ndambù wa Wòwò awu anyi?”

Ki abu ne: “To, tudi ànu ne bùngì bukùmbàne bwètù twètù nkààyetù.”

²⁹³ Nànkù pààkayàbo bwà kupeta Nyumà Mwîmpè, kuyabo kasambila, bu mùdì maèkèleeziyà, mwenzenzabo kùdì èkèleeziyà minène leelù ewu, malongolodi awu. Pààkayabo kakeba Maanyì awu, Mubàki kulwa. Pa nànkù bàdi bàteeta kuÀpeta mpindyewu mene, èkèleeziyà minène, malongolodi, masangisha manène à buloba bujimà bwà bwalu Bwàwù mu—mu èkèleeziyà mivwija malongolodi ayi, bàmba ne: “Bikèngela twàlukile ku Dibènesha dyà Mpenta. Bikèngela twikale ne bondopi bàà kwà Nzambì mu èkèleeziyà mwètù. Bikèngela twikale ne baakudi bàà mu myakulu. Bikèngela twikalè ne bumvwiji bàà myakulu. Bikèngela twikalè ne mapà wònsò à Nyumà aa mu èkèleeziyà mwètù, nènku netùtwadije ànu dyenza masangisha bwà kubanga kucyènza.” Bàdi munkaci mwà kwenza bipàngu, mbatwadije kubyenza. Pàdîbo baye bwà kwenza nànkù, ki mu cikondo aci mene mùdì Mubàki ùlwa ne wàngata aba bàvwa ne Maanyì mu myèndù yàbò, ne ùkwàta njila uya.

²⁹⁴ Pashiishe kulwabò, ne cyàkenzekà ncinyi? Bààkeediibwa mu mîdimà yà pambèlu (cikondo cyà Dikènga Dinène) mwikalabo bàdila myadi ne bàtwa mikemu ne bàsumakaja mènù, piinè apu mpàdi Mukàji-musèlà ùsanganyiibwa mu Dyulu. Kaa, èkèlekèle!

²⁹⁵ Pashiishe ku ndekeelu kwà bidimu bisàtù ne citùpà abi, Yèyè neàlwe bu mwàkenza Yòzefù ne kuDìmanyisha kùdì bânà Bààbò. Necìtwale madilu myaba yònsò, ne nebàmbè. . . Nebàtapulule mèkù ààbò, ne badila ne—ne bàmba ne: “Nkwèpi Kùdì mupetele bibangu ebi?” Ne—ne byà bitwibwe mafumà. . .

aba bààkaMutwà difùmà nebàMumòne, ne Yêyè neàDimanyishe kùdi bàna Bààbò.

²⁹⁶ Mpindyewu Ûdi munkaci mwà kuteeta bwà kuDimanyisha kùdi Èkèleeziyà Wendè, kàdi's mbaMusàkile pambèlù. Kàdi Yêyè ùcidi ànu mwimane, ùkookola, wàmba ne: “Kùdikù mukwàbò muntwamu anyi? iUmwe udi mufwànyine kukangula ne kulekela bwà Mémè kubwelamù ne kuyiikila nendè anyi?”

²⁹⁷ Kaa, ndi ne disànkà, ne kusàkidila kwàbùngì bwà bwalu abu . . .kùkaadi bidimu byàbùngì, pabwìpì ne bidimu makumi àbidì ne mwandamukùlù nànkù, kungààkuumvwa dikookola adi ku mwoyi wànyì. Ki mémè . . .KubwelaYe munda mwànyì, kacya ànu piine apu ki mémè kudya Nendè ne Yêyè naanyi eku's. Ki mémè kupeta Dibènesha dyà beena Mpenta, kupeta Nyumà Mwimpè.

²⁹⁸ Ngààkabàtìijiiibwa mu Dîna dyà Yesù Kilistò bwà dilekelediibwa dyà mpèkaatù yànyì, musangu ùmwèpelè ungààkabàtìijiiibwaku kacya bàndela, musangu ùmwè. Pàncìcìvwà ànu mwànà mukesè wa citende, kakùvwaku muntu mwà kungambila ne kùdi Nzambi yisàtù nànsha. To, kuvwakù mwà kunswikila aci mu nshìngù to. Kwena mwà kucipèèsha ní nganyi ní nganyi udiku mumanyè ní ncinyi . . .mumanyè ne Nzambi ncinyi to. Ncyà bushùwà. Nànkù pàngààkabàtìiiza . . .muyiishi kampànda wa ba-Baptiste ngwàkambàtìiiza. Mémè kwamba ne: “Ndi muswè kubàtìijiiibwa mu Dîna dyà Mukalenge Yesù Kilistò.” Docteur Roy E. Davis wàkambatiiza mu Dîna dyà Mukalenge Yesù Kilistò pàncìcìvwà ànu mwànà. Nwamònu anyi? Ncyà bushùwà. Pa nànkù mémè—mémè kuciitabuuja, ntu mushààle naaci, ne ndi mumaè ne m'Bulelèlè. N'Dìyi dyà Nzambi dyà Cyendèlèlè. Ncyà bushùwà. Ncyà bushùwà.

Ndi ne disànkà dyàbùngì dyà kwamba ne ndi umwe wabò.

Ndi umwe wabò, umwe wabò,

Ndi ne disànkà dyàbùngì dyà kwamba ne ndi umwe wabò;

Ndi umwe wabò, umwe wabò,

Ndi ne disànkà dyàbùngì dyà kwamba ne ndi umwe wabò.

Nànsha mùvwà bantu aba kabàyi bafwànyine kwikala balongè to,

Anyi bàdìtàmbishà bwà luumù lwà pa buloba,

Mbapetè bwònsò Mpenta wabò,

Babàtìijiiibwe mu Dîna dyà Yesù;

Ne bàlondelangana leelù, ne kule ne ku nseke yònsò,

Bukolè Bwèndè bùcidi ànu bùmwebùmwebè abu,

Ndi ne disànkà dyàbùngì dyà kwamba ne ndi umwe wa . . .

299 Udi ne disànkà anyì? Pawikalà ne disànkà, elà cianza cyèbè muulu.

Umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò;

Paùdì ànu ushààla Wendé newikale kumutù kwà mpèkaatù yònsò, mu Dìná dyà Yesù Kilistò.

Lwàku, mwanèètù wanyì, kèbanganà ne
dibènesha edi
Dyàkezulà mwoyi wèbè ku mpèkaatù,
Dyàtwadija kudidishà ngonga yà disànkà
Ne dilama musuùkà wèbè ulàkuka kapyà;
Kaa, s'ki kwoshadi mpindyewu eku munda
mwà mwoyi wànyì,
Kaa, butùmbi kùdì Dìná Dyèndè,
Ne ndi ne disànkà dyà kwamba ne ndi umwe
wabò.

Kaa, umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò; (Àlèluuyàh!)
Umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò.

Bàvwa badisangishe mu cibambalu cyà kuulu,
Bwònsò munkacì mwà kusambila mu Dìná
Dyèndè,
Bààkabàtìijibwa ne Nyumà Mwîmpè,
Ne bukolè bwà mudimu kulwabù;
Mpindyewu cyàkabènzelaYè ditùku adi
Yéyè neàkwenzèlè byà mwomùmwè,
Ndi ne disànkà dyàbúngì dyà kwamba . . .

300 Mpindyewu tulabulanganàayi ku byanza, ne bàdì mumpàla, paanyimà, ne eku ne eku.

Umwe wabò, umwe wabò,
Ndi ne disànkà dyàbúngì dyà kwamba ne ndi
umwe wabò;
Umwe wabò, umwe wabò,
Ndi ne disànkà be dyà kwamba ne ndi umwe
wabò.

Kaa, umwe wabò, umwe wabò,
Ndi ne disànkà dyàbúngì be dyà kwamba ne
ndi umwe wabò;
Umwe wabò, umwe wabò,
Ndi ne disànkà dyàbúngì be dyà kwamba ne
ndi umwe wabò.

Umwe wabò, umwe wabò,

Ndi ne disànkà dyàbûngì be dyà kwamba ne
 ndi umwe wabò;
 Umwe wabò, umwe wabò,
 Ndi ne disànkà dyàbûngì be dyà kwamba ne
 ndi umwe wabò.

Kanwènaayikù ne disànkà dyà kwikalakù umwe wabò anyi? [Disangisha didi dyamba ne: “Èyowà! Amen! Àlèluuyàh!”—Muf.] Ndi munangè aci. Musumbà wa mutooyi wà dikèma!

Shh! Shh! [Mwanèètù wa balùme kampànda udi wakula mu myakulu, mukwàbò mwanèètù wa balùme kampànda udi wàndamuna—Muf.]

³⁰¹ Mùshindù mwine wutùdi tuKusàkidila’s, Taatù, bwà bwìmpè Bwèbè ne luse kutùdi, twètù bàdi kabàyi bakùmbànyine aba. Pa kwela meeji ne Wèwè uvwa mwà kushindika Mukenji Wèbè mpindyewu, Mukalenge, mulaya bantu. Ndi ndòmba, Nzambì, bwà luse Lwèbè lwìkile pambidi pààbò.

³⁰² Kwòkò muntu kaaba aka udi kàyì muMumanyè bu Musùngidi to, udi mufwànyine kuMupeta mpindyewu mene mu myoyi bu Musùngidi, nudikù mwà kujuukila kuulu patùdi tulàmbula disambila bwèbè apa anyi? Wàkamba ne Yèyè ùvwa mwà...muvwiye Mukenji ewu kuntwaku ne Ùvwa muswè kushindika Dìyì Dyèndè kùdi. Kwòkò kwikàle bàmwè kaaba aka bàdi kabàyi baMumanyè ne kabàyi bapetè Nyumà Wendè to, Yèyè ngudi wakula neebè awu.

³⁰³ Èyo, ewu udi paanyimà wàwa. Udikù mwà kujuukila kuulu anyi, mwanèètù? [Mwanèètù wa balùme kampànda ùdi wàkula—Muf.] Yèyè mmuswè kubàtijiibwa mu Nyumà Mwìmpè, mmwòmò anyi, mwanèètù? Nzambì àkubènèshè. Juukila kuulu mwaba wùdi awu. Kùdikù mukwàbò mwà kujuuka kwamba ne: “Ndi muswè kubàtijiibwa mu Nyumà Mwìmpè anyi?” Nzambì àkubènèshè, mwanèètù. Nzambì àkubènèshè. Abi mbìmpè. Imànyìnà ànu kuulu cyanàànà. Shààla wèwè ànu mwimane kuulu. Nkufwànyineku kwikala muntu mukwàbò udi muswè kwakidila Nyumà Mwìmpè ne kubàtijiibwa, muswè bwà kumuvùluka mu masambila ètù mpindyewu mene, bwà kubàtijiibwayè mu Nyumà Mwìmpè anyi? Kùdikù mukwàbò, kumpàla kwà mèmè kwamba cìndi nswa kwamba eci, udi muswe kujuuka ne kudisàkidila?

Kaa, udiku muswè bwà kubadiibwa bu umwe wa ku cisumbù Cyèndè anyi? (Udi muswè kwenza nànkù anyi?)

Ikàlà kùyì katobà munda to, ikàlà mutàbàle ne mwindile dibandila dyà bùlwalwà ebu;

Yèyè ùlwalwa cyàkàbìdi.

³⁰⁴ Yèyè ùlwalwà cyàkàbìdi. Udikù muswè kwikala mulwishi Wendè anyi udikù muswè kwikala mwàn’Endè? Nzambì wa

ciiji mu dindà adi, kààkwitaba cingà cintu to ànu Mashi à Yesù. Yèyè kààdyà. . . Bu mambàla bwèbè bwà mu èkèleeziyà kabwàkuMwambila bwalu to. Ànu Mashi!

Kaa, lwà mushinga mukolè ndukòka alu
Lùdì lùmvwijà mutòòke bu nêjè;

Bitùlùbitùlù.

Ncyèna mumanyè mukwàbò mpokolo to,
Ànu Mashi à Yesù.

Ncinyì cìdì mwà kusukula ne kuumusha
mpékaatù wanyì?

Ànu Mashi à Yesù;

Ncinyì cìdì mwà kungaalujulula kàbìdì?

Ànu Mashi à Yesù.

Kaa, cyà mushinga mukolè ndukòkà alu

Lùdì lùmvwijà mutòòke bu nêjè;

Ncyèna mumanyè mukwàbò mpokolo to,

Ànu Mashi à Yesù.

[Mwanèètù Branham ùdi wimbila mu matàma

Ànu Mashi—Muf.]

Ànu Mashi à Yesù;

Eci ki bwakàne bwànyì bwònsò,

Ànu Mashi à Yesù.

Kùdikù mukwàbò anyì?

Kaa, lwà mushinga mukolè lùdì . . .

Kakwèna cìdì mwà kwimana to, mwanèètù wa balùme, mwanèètù wa bakàjì. Buloba bùdì munkacì mwà kutùkina, bwàbù mbujike!

. . . bu nêjè;

Ncyèna mumanyè mukwàbò mpokolo to,

Ànu Mashi à Yesù.

³⁰⁵ Bitùlùbitùlù, Teddy, bu wèwè mwà kuswà: “Kùdì Mpokolo mùle tètè ne Mashi, makoka mu mijilu yà Emanùwèlè.”

³⁰⁶ Mpindyewu, nwènù balunda bàànyì, nwènù bàdì biimàne kuulu bàdì—bàdì bàteeta kwitaba kalolo kàà Mukalenge Yesù. Bible umweumwe udi utwàmbila ne bintu ebi nebyènzèkè, wàkabifikisha ku dikùmbana ànu menemene mùshindù wàkabìlayàYe awu. “Mpindyewu, mulayì,” mwàkambà Peetèlò, “ùdì bwènù ne bwà bânà bèènù balela ne bwà aba bàdì kule, mu búngì bwònsò bwàbìikila Mukalenge Nzambi wetù abu.”

³⁰⁷ Wèwè uvwa mwimane kuulu bwalu udi muswè dibènesha dyà Nzambi pambidi pèèbè. Nènku bu musadìdì Wendè, ndi nkusambidila, nensambile bwà Nzambi àkupèeshe dibatiiza dyà Nyumà Mwìmpè. Nènku ndi ndikonka ní udiku mwà kwenza cyòcì eci mu mwoyi wèbè, pawikalà ne meeji matòòke, bu wèwè mwà kwenza mulayì ewu kùdì Nzambi ne: “Nzambi, mmémè

ewu, kubangila ànu ku cikondo eci, mwimàne kuulu, nkèba dibàtiiza dyà Nyumà Mwímpè edi, nensambile ku musangu ne ku musangu nengìindile too ne paWàngùja ne Nyumà Mwímpè.” Udikù mwà kwenzela Nzambì mulayì awu mu dyela dyà byanza byèbè muulu anyì? “Nènsambilè ku musangu ne ku musangu, dibà dyònsò, too ne paWàngùja ne kalolo ne bwímpè bwà Nyumà.”

Ndi nkulàmbula disambila dyànyì mpindyewu patùdi twinyika mitù yètù apa:

³⁰⁸ Taatù wetù wa mu Dyulu, bôbò ki bitàdi byà bucimunyi byà Bwikadi Bwèbè. Mbamanyè ne Mèyì aa mmalelèlè bwalu Ngèèbè. Mbamanyè ne mmafidiibwe kùdi Nyumà Mwímpè, bwalu wówò ki Dìyì dyà Nzambì. Nènku mbatwishiiibwe ne bàdi Neebè dijinga, bwà ne bàdi dijinga ne kalolo kàà Nyumà Mwímpè mu nsòmbelu wabò bwà kubàpèèsha bukolè bwà bucimunyi. “Nènku nebàpetè bukolè bwà ku Dyulu,” bapeta bukolè bwà kwikala ne nsòmbelu wa bwena Kilistò, bwà kupeta bukolè bwà kucimuna mateeciibwa. Bu musambu utùvwà tufùma ku dimba ne: “Bààkasangila mu nzùbu wa kuulu ne bàvwà basambila mu Dìna Dyèndè, bààkabàtìijiiibwa ne Nyumà Mwímpè ne bukolè bwà mudimu kulwabù.” Ki cìdìbo baswè, bukolè bwà mudimu bwà kulwabù pambidi pààbò.

³⁰⁹ Ndi nKulòmba, Taatù, bu musadidi Webè, bu Mùdi mubàmòne beele byanza kuulu, mbacipe cyèlekà Kùdi ne benze mulayì ne kabààkulekela to, kabààkucilekela ku luseke to, kàdi nebàsambile too ne muWàbùja, Mukalenge, ne citùpà cidi cisanakisha cyà Bwikadi Bwèbè bwà Cijila mu nsòmbelu wabò. Nyèwù nsambila bwàbò, Mukalenge, bu musadidi Webè, bwà bààmòna mwà kùjiibwa ne Nyumà Mwímpè. Mukalenge, ndi ndòmba bwà kabùumuku mu èkèleeziyà emu aci kaciyì cyanji kwenzeka to, bwà ne nebiikalè ànu kaaba aka too ne pàdi musùukà wònsò mùjiibwe tètè ne Nyumà Mwímpè. Enzàku nànkù, Mukalenge.

³¹⁰ Wèwè udi Nzambì, wa Bukolè bwònsò, Wèwè wàkamwèneshiibwa mu mubidi bwà kuumusha mpèkaatù yà bàà pa buloba. Wakabiika ku lufù mu ditùkù diisàtù, kubanda mu Dyulu. Ne Wèwè udi kaaba aka dilòlò edi, munkaci mwètù, ne mu dìnà dyà Nyumà Mwímpè. Nènku tudi tulòmba, Taatù, bwà Wèwè, Mukalenge wetù wa musinga mukolè awu, ùjakù yònsò wa kùdìbo ne Wèwè Mwinè Sungasunga. Nènku swàkù bwà biikale di—dibènesha bwà Bukalenge Bwèbè ne mu buloba buciwalwà. Nènku dīngà ditùkù paWàfika ndekeelu wa byònsò ku ndekeelu wa njila, cidi mwà kwikala leelù ewu kàbidi, katwèna bamanyè dibà diikalaci to. Kàdi swàkù bwà ngiikaleku mukùmbàne, Mukalenge; ngiikale mubadiibwe munkaci mwà aba bàyaayà mu Dyambwibwa. Swàkù bwà aba biikale bàdi bàya mu Dyambwibwa. Swàkù bwà muntu yònsò, Bwikadi bwà

Bunzambi ne aba bônso bàdi bújiibwe ne Nyumà, bàdi bàà Nzambi, bàye mu Dyambwibwa.

³¹¹ Bwejaku aba dilòlòlò edi, Taatù. Bàdi Bèèbè mpindyewu, ndi mbàlàmbula Kùdi. Mu Dìnà dyà Yesù Kilistò. Amen.

³¹² Mpindyewu ndi muswè bwà bwónso bàà kunùdi bàdi biimane pabwipi ne bantu aba, bàdi ne Nyumà Mwímpè, juukilaayi kuulu, nubàtentèkele byanza.

. . . Mpokolo mûle tètè ne Mashi,
 Makoka mu mijilu yà Emanùwèlè,
 Ne bangènzàmpèkàatù biinyija mwinshi mwà
 lukòkà alu,
 Bàdi bàjimija dikeji dyàbò dyónso dyà dipiilà.
 Bàdi bàjimija dikeji dyàbò dyónso dyà dipiilà,
 Bàdi bàjimija dikeji dyàbò dyónso dyà dipiilà;
 Ne bangènzàmpèkàatù biinyija mwinshi mwà
 lukòkà alu,
 Bàdi bàjimija dikeji dyàbò dyónso dyà dipiilà.
 Mwìvì uvwa upunga ne lufù wàkasànka bwà
 kumòna
 Mpokolo awu mu ditùkù dyèndè;
 Ne mwómò amu ndi mwà, nànsha mûndi mubi
 bu yèyè emu,
 Kukùpula mpèkaatù yàanyi yónso.
 Kukùpula mpèkaatù yàanyi yónso,
 Kukùpula mpèkaatù yàanyi yónso;
 Ne bangènzàmpèkàatù biinyija mwinshi mwà
 lukòkà alu,
 Bàdi bàjimija mpèkaatù yàanyi yónso.

³¹³ Mpindyewu elàayi byanza byènu muulu kùdi Nzambi ne nuMupèèshè ànu butùmbi cyanààna. Ambàayi ne: “Twasàkidila, Mukalenge. Ndi mwimanyine kuulu, nènKupèèshe butùmbi. NènKusàkidila bwà mabènesha Èbè, bwà bwímpè Bwèbè, ne bwà kumpèèsha dibàtiiza dyà Nyumà Mwímpè.” Twasàkidila, Mukalenge! Twasàkidila, Mukalenge! Ndi nKusàkidila, Nzambi munanga, bwà ditupèèsha. . . Wèwè udi ulama mulayi Wèbè, Wèwè ngwàkàmbà nànkù. Tudi tuKwitabuujà.

³¹⁴ Kanwènaayikù ne disànkà anyi? Ambàayi ne: “Mukalenge àtumbè!” Teddy, ndekèlèku. . . ànu mukwàbò kàbìdi ne: “Tudi tusangana bantu bààbùngì bàdi kabàyi mwà kuumvwa. . .” *Eci Ncyenze Bu Dyulu Bwànyi Mèmè.*

Tudi tusangana bantu bààbùngì bàdi kabàyi
 mwà kuumvwa to
 Bwà cinyi tudi ne disànkà dyàbùngì ne
 badìshikàmìne;
 Tudi basabukè dyàmwàmwà dyà Yadèna bayè
 ku Buloba bulenga bwà Kanààna,
 Ne eci cidi bu Dyulu bwànyi mèmè.

Kaa, eci ncyenze bu Dyulu bwànyì mêmè,
 Kaa, eci ncyenze bu Dyulu bwànyì mêmè;
 Kaa, tudi basabukè dyàmwàmwà dyà Yadènà
 bayè ku Buloba bulenga bwà Kanaana,
 Ne eci ncyenze bu Dyulu bwànyì mêmè.

Kaa, pândi nsànka, ndi ngìmba ne ngèèla
 mbila,
 Dyabùlù kèna ùCìitabuujà to, ndi mmòna;
 Kàdi ndi mùjùbwe tètè ne Nyumà, kakwèna
 mpatà to,
 Nènku ki lutàtu lúndi naalù mêmè alu.

Kaa, aci's ki cidi...Dyulu bwànyì mêmè,
 (Nzambi àtumbè!)

Kaa, eci ncyenze bu Dyulu bwànyì mêmè;
 Ndi musabùke dyàmwàmwà dyà Yadènà bayè
 ku Buloba bulenga bwà Kanààna,
 Ne eci ncyenze bu Dyulu bwànyì mêmè.

³¹⁵ Kabyèna binwenza disànka anyi? Bìmpè. Labùlàngànaayi ku
 cyanza ne muntu kampànda, nwamba ne: "Mukalenge àtumbè!"
 Eci cidi bu Dyulu, Mukalenge.

Angata Dìna dyà Yesù wëndè naaDì,
 Wèwè mwànà wa tunyinganyinga ne dikènga;
 Nedikupè disànkà ne busàmbi,
 Nda naaDì kwònsò kùyaaya.


Dìna dyà mushinga, Éyì dyà bupolè be!
 Ditàkemena dyà buloba ne disànkà dyà Dyulu;
 Dìna dyà mushinga, Éyì dyà bupolè be!
 Ditàkemena dyà buloba ne disànkà dyà Dyulu.

Twinamina Dìna dyà Yesù,
 Tupòna mikookwela ku makàsà Èndè,
 Mfùmù wa bamfùmù mu Dyulu netùMwasè
 cifulu cyà butùmbi,
 Pààjika lwendu lwètù.

Dìna dyà mushinga, Éyì dyà bupolè be!
 Ditàkemena dyà buloba ne disànkà dyà Dyulu;
 Dìna dyà mushinga, Éyì dyà bupolè be! (Dyà
 bupolè be!)
 Ditàkemena dyà buloba ne disànkà dyà Dyulu.

Mpindyewu, mu cimùmà, ne mitù yètù miinyika:

... Dìna dyà Yesù kashidi,
 Bu Ngabu ku butèyi bwònsò;
 Pàdì mateeciibwa akunyungulukila,
 Nungàna ànu Dìna dyà Cijila adi mu
 disambila.

Dìna dyà mushinga, Éyì dyà bupolè be! 

60-1211E Cikondo Cyà Èkèleeziyà Wa Laòdikiyà
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org